

NUMERA

Israel taudia e duahidia

1 ¹ Aigupto amo e raka lasi murinai laḡanina iharuana ena hua iharuana ai, hua dinana gini-gunana ai Iehova ese Mose e hereva henia, Sinai tano ḡaḡaena ai, hebou kalagana Ialonai. ² E hamaoroa, eto, Israel oreana idoinai ba duahidia, edia iduhu ta ta ai, ta ta tamadia edia ruma ai. Mamaruane iboudiai ladadia ba tore, ³ laḡani ruahui vada e hanai tataudia iboudiai; Israel tataudia tuari baela diba iboudiai na oi bona Aaron ese ba duahidia, edia orea ta ta ai. ⁴ Iduhu ikwaradia taudia bavabidia, iduhu ta ta ai tatau ta ta bavabidia, idia ese bae durumui.

⁵ Idurumui taudia bini. Ruben ena idudu ai: Elisuru Sedeuru. ⁶ Simeon ena iduhu ai: Selumiele Surisadai, ⁷ Iuda ena iduhu ai: Nason Aminadab. ⁸ Isakara ena iduhu ai: Netanele Suara. ⁹ Sebulun ena iduhu ai: Eliab Helon. ¹⁰ Efraim Iosef ena iduhu ai: Elisama Amihud. Manase Iosef ena iduhu ai: Gamaliel Pedasuru. ¹¹ Beniamina ena iduhu ai: Abidan Gideon. ¹² Dan ena iduhu ai: Ahiesere Amisadai. ¹³ Asere ena iduhu ai: Pagiele Okran. ¹⁴ Gad ena iduhu ai: Eliasaf Reuele. ¹⁵ Napatali ena iduhu ai: Ahira Enan. ¹⁶ Tatau bini Israel oreana ai e abidia hidi, edia ruma biagudia bona edia iduhu ikwaradia taudia.

¹⁷ Ladadia unu e hatodia toma taudia na Mose bona Aaron ese e abidia. ¹⁸ Bena hua iharuana ena dina gini-gunana ai idia ese orea idoinai e haboudia, laḡani ruahui vada e hanai tataudia iboudiai na ladadia e tore, edia iduhu ta ta ai, ta ta tamadia edia ruma ai. ¹⁹ Iehova ese Mose e haḡania hegeregerena, Mose ese taunimanima unu e duahidia toma, Sinai tano ḡaḡaena ai

²⁰ Ruben, Israel natuna roboana, garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ²¹ iboudiai na 46,500. Ruben iduhuna ena numera bunai.

²² Simeon garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ²³ iboudiai na 59,300. Simeon iduhuna ena numera bunai.

²⁴ Gad garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ²⁵ iboudiai na 45,650. Gad iduhuna ena numera bunai.

²⁶Iuda garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ²⁷iboudiai na 74,600. Iuda iduhuna ena numera bunai.

²⁸Isakara garana e duahidia, edia iduhu ai bona tamadia edia ruma ai. Laḡani ruahui vada (Ia e hanai tatudia, tuari baela diba, ²⁹iboudiai na 54,500, Isakara iduhuna ena numera bunai.

³⁰Sebulun garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ³¹iboudiai na 57,400. Sebulun iduhuna ena numera bunai.

³²Efraim Iosef garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ³³iboudiai na 40,500. Efraim iduhuna ena numera bunai.

³⁴Manase Iosef garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ³⁵iboudiai na 32,200. Manase iduhuna ena numera bunai.

³⁶Beniamina garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ³⁷iboudiai na 35,400. Beniamina iduhuna ena numera bunai.

³⁸Dan garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ³⁹iboudiai na 62,700. Dan iduhuna ena numera bunai.

⁴⁰Asere garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ⁴¹iboudiai na 41,500. Asere iduhuna ena numera bunai.

⁴²Napatali garana e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ⁴³iboudiai na 53,400. Napatali iduhuna ena numera bunai.

⁴⁴Mose bona Aaron bona Israel iduhudia ikwaradia taudia gwautararuosi ese e duahidia taudia bini. ⁴⁵Israel besena e duahidia, edia iduhu ai bona tamadia edia ruma ai. Laḡani ruahui vada e hanai tataudia, tuari baela diba, ⁴⁶iboudiai na 603,550.

⁴⁷A Levi garana na idia ida asie duahidia hebou. ⁴⁸Badina be Iehova ese Mose e hamaoroa, eto, ⁴⁹Levi iduhuna taudia na Israel taudia ida basio duahidia hebou bona ladadia basio tore hebou. ⁵⁰Levi taudia na ba duanaidia, taravatu mauana dubuna mai kohuna mai ḡauna iboudiai ida bae naridia. Idia ese dubu mai kohuna ida bae huaia lao; bae gimaia bona bae hataruhaia heḡeḡe. ⁵¹Taravatu mauana dubuna ba laolaolaia negana ai, Levi taudia ese bae rohoa, ma bae haginia lou; idau iduhu tauna ta baine raka henia kahi, vada bae alaia mase. ⁵²Israel taudia na edia iduhu ta ta ai bae taruha, iduhu ta ta ena taruha ena taruha ai, edia pepe bae ha-oda heḡeḡe. ⁵³A Levi taudia na taravatu mauana dubuna bae taruhaiaheḡeḡe, badu Israel oreana enai ilao-ahuna totona. Taravatu

mauana dubunana Levi taudia ese bae naria. ⁵⁴Israel taudia na unu e kara toma, Iehova ese Mose e haġana heġereġerena.

Israel edia Taruha

2 ¹Iehova ese Mose bona Aaron e haġanidia, eto, ²Israel taudia na iduhu ta ta ai edia taruha bae haġini, edia iduhu pepedia badibadidiai; taruha iboudiai na hebou kalagana bae vaira henia bona bae ġeġea ahu.

³Mairiveina ai, dina e daemu kahana ai, Iuda taudia bae taruha, edia iduhu pepena badibadinai. Ikwaradia tauna na Nason Aminadab; ⁴bona ena tuari taudia iboudiai na 74,600. ⁵Ia badibadinai Isakara taudia bae taruha. Ikwaradia tauna na Netanele Suara; ⁶bona ena tuari taudia iboudiai na 54,400. ⁷Ma ia badibadinai na Sebulun taudia bae taruha. Ikwaradia tauna na Eliab Helon; ⁸bona ena tuari taudia iboudiai na 57,400. ⁹Taunabunai Iuda oreana ena tuari taudia ibouboudiai na 186,400. Laolao negadia ai, idia na bae raka lasi guna.

¹⁰Diho kahana Ruben taudia edia pepe bae hadaia bona bae taruha. Ikwaradia tauna na Elisuru Sedeuru; ¹¹bona ena tuari taudia iboudiai na 46,500. ¹²Ia badibadinai Simeon taudia bae taruha. Ikwaradia tauna na Selumiele Surisadai; ¹³bona ena tuari taudia iboudiai na 59,300. ¹⁴Ma ia badibadinai Gad taudia bae taruha. Ikwaradia tauna na Eliasaf Reuele; ¹⁵bona ena tuari taudia iboudiai na 45,650. ¹⁶Taunabunai, Ruben oreana ena tuari taudia ibouboudiai na 151,450. Idia na raka lasi oreana iharuana

¹⁷Idia muridiai Levi taudia ese hebou kalagana bae huaia lasi, edia taruha kalagadia ida; tuari oreadia bogaragidiai bae huaia lao. Iboudiai edia taruha ta ta ai bae raka lasi, oreana ta ta ena pepe ena pepe muridiai.

¹⁸Lahara kahana Efraim taudia edia pepe bae hadaia. Ikwaradia tauna na Elisama Amihud; ¹⁹bona ena tuari taudia iboudiai na 40,500. ²⁰Ia badibadinai Manase taudia bae taruha. Ikwaradia tauna na Gamaliel Pedasuru; ²¹bona ena tuari taudia iboudiai na 32,200. ²²Ma ia badibadinai Beniamina taudia bae taruha. Ikwaradia tauna na Abidan Gideon; ²³bona ena tuari taudia iboudiai na 35,400. ²⁴Taunabunai, Efraim oreana ena tuari taudia ibouboudiai na 108,100. Idia na raka lasi oreana ihatoina.

²⁵Mirigini kahana Dan taudia edia pepe bae hadaia. Ikwaradia tauna na Ahiesere Amisadai; ²⁶bona ena tuari taudia iboudiai na 62,700. ²⁷Ia badibadinai Asere taudia bae taruha. Ikwaradia tauna na Paginele Okran; ²⁸bona ena tuari taudia iboudiai na 41,500. ²⁹Ma ia badibadinai Napatali taudia bae taruha. Ikwaradia tauna na Ahira Enan; ³⁰bona ena tuari taudia iboudiai na 53,400. ³¹Taunabunai, Dan oreana ena tuari taudia ibouboudiai na 157,600. Idia na raka lasi oreana gini gabena; edia iduhu ta ta ai bae raka lasi.

³²Israel taudia edia iduhu ta ta ai e duahidia bini. Tuari taudia, edia iduhu ta ta amo e duahidia, ibouboudiai na 603,550. ³³A Iehova ese Mose e haġania heġereġerena, Levi taudia na Israel taudia ida asie duahidia hebou.

³⁴Israel taudia na unu e kara toma. Iehova ese Mose e haġania heġereġerena, idia ese edia pepe ta ta badibadidiai e taruha, bona edia orea ta ta ai bona edia iduhu ta ta ai edia taruha amo e raka lasi.

Levi taudia iduahidia

3 ¹Aaron bona Mose garadia bini, Iehova ese Mose Sinai ororona ai e hereva henia negana amo. ²Aaron natuna ladadia bini: Nadab, tau roboana, bona Abihu, bona Eleasara, bona Itamara. ³Aaron natuna bunu, e horodia bona e hahelaġadia, hahelaġa taudia ai e halaodia. ⁴A Nadab bona Abihu na Iehova vairanai e mase, Sinai tano ġaġaena ai, lahi idauna Iehova vairanai e vareailaia negana ai. Idia na asi natudia. Taunabunai, Eleasara bona Itamara ese hahelaġa ġaukaradia e karava, tamadia Aaron vairanai.

⁵Iehova ese Mose e haġania, eto, ⁶Levi taudia ba hakaudia mai, hahelaġa tauna Aaron vairanai bae gini, ia isiaina bae lao heni. ⁷Ia vairanai bona hebou taudia iboudiai vairadai hebou kalagana bae reġua, bona dubu ġaukaradia bae kara. ⁸Hebou kalagana kohudia iboudiai bae naridia, bona hahelaġa karadia bae kara dubu ai, Israel taudia daidiai. ⁹Levi taudia na Aaron mai natuna ida imadia ai bavatodia kau; Israel taudia iboudiai bogaragidia amo idia bavabidia, ia ba henia. ¹⁰Aaron mai natuna ida ba gwauraidia hidi, hahelaġa dagina na ediai baine mia. Idau tauna ta baine raka kahi, vada bae alaia mase.

¹¹Iehova ese Mose ma e hamaoroa, eto, ¹²A itaia, lau ese Levi taudia vada na abidia hidi, Israel taudia bogaragidia amo, Israel taudia edia roboa mamaruanedia ibolodia. Idia na lauegu. ¹³Badina be roboa mamaruanedia be lauegu, Aigupto taudia natudia mamaruanedia roboadia iboudiai na aladia mase dinana ai, lau ese roboa mamaruanedia iboudiai na abidia lauegu, taunimanima natudia roboadia bona mauri ġaudia iboudiai natudia roboadia. Idia na lauegu: lau binai Iehova.

¹⁴Iehova ese Mose e hereva henia, Sinai tano ġaġaena ai, eto, ¹⁵Levi taudia iboudiai ba duahidia, tamadia edia ruma ai bona edia iduhu ai; hua ta vada - e hanaia mamaruanedia iboudiai ba duahidia. ¹⁶Taunabunai, Mose ese e duahidia, Iehova ese ena hereva ai e haġania heġereġerena. ¹⁷Levi natuna ladadia bini: Gerson bona Kohat bona Merari. ¹⁸Gerson ese e havaradia iduhudia bini: Libni bona Simei. ¹⁹Kohat ese e havaradia iduhudia bini: Amram bona Isahara bona Heberon bona Usiele. ²⁰Merari ese e havaradia iduhudia bini: Mali bona Musi. Levi iduhudia bunu: ihavaradia taudia ladadia e nemiaidia.

²¹Gereson garana na Libni taudia bona Simeï taudia: Gereson iduhudia bunu. ²²Edia mamaruane e duahidia, hua ta e hanaia amo, iboudiai na 7,500. ²³Gereson taudia edia taruha gabuna be dubu murina, lahara kahana ai. ²⁴Ikwaradia tauna na Eliasaf Laele. ²⁵Hebou kalagana lalonai Gereson taudia bae reġu ġaudia bini: dubu bona kalaga dabuadia, bona guhi dabuadia, bona kalaga iduarana dabuadia, ²⁶bona maġu dabuadia, bona dubu maġuna ikoukouna dabuadia, bona ihaboulaina patana, bona kwanau iboudiai. Bae reġu ġaudia bunu.

²⁷Kohat garana na Amram taudia bona Isahara taudia bona Heberon taudia bona Usiele taudia: Kohat iduhuna bunu. ²⁸Edia mamaruane e duahidia, hua ta e hanaia amo, iboudiai na 8,600; idia na dubu inarina taudia. ²⁹Kohat taudia edia taruha gabuna be dubu diho kahana ai. ³⁰Ikwaradia tauna na Elisafan Usiele. ³¹Bae reġu ġaudia bini: maua helaġana, bona pata helaġana, bona lamepa patana bona ihaboulaina patadia, bona gabu helaġana ena kohu iboudiai, hahelaġa taudia ese kara helaġadia e karalaimu ġaudia, bona seseahu. Bae reġu ġaudia bunu. ³²Eleasara, hahelaġa tauna, Aaron natuna, na Levi taudia iboudiai ikwaradia, bona gabu helaġana ġaukaradia ikaradia taudia edia heitatao tauna.

³³Merari garana na Mali taudia bona Musi taudia: Merari iduhudia bunu. ³⁴Edia mamaruane e duahidia, hua ta e hanaia amo, iboudiai na 6,200. ³⁵Ikwaradia tauna na Suriele Abihaili. Edia taruha gabuna na dubu mirigini kahana ai. ³⁶Bae reġu ġaudia bini: dubu habana kahadia, bona raroraro, bona ihua-ihua, bona hahelai-kau ġaudia mai kohudia iboudiai; ³⁷bona maġu duna iboudiai mai ihahelai-kaudia ġaudia, bona edia ikokobona edia kwanau.

³⁸Dubu mairiveina kahana ai bae taruah taudia, hebou kalagana vairanai, dina e daemu kahana ai, be Mose bona Aaron mai natuna ida. Idia ese gabu helaġana ġaukaradia bae kara, Israel taudia daidiai. Idau tauna ta baine raka kahi, vada bae alaia mase. ³⁹Levi taudia, Mose bona Aaron ese iduhu ta ta amo e duahidia, Iehova ena haheġani dainai, ibouboudiai, hua ta e hanaia amo, na 22,000.

Roboa mamaruanedia ibololaidia

⁴⁰Iehova ese Mose e hamaoroo, eto, Israel taudia natudia mamaruanedia roboadia ba duahidia, bona ladadia ba tore, hua ta vada e hanaia amo. ⁴¹Bena Levi taudia bavabidia, lau Iehova egu, hari Israel taudia natudia mamaruanedia roboadia ibololaidia; Levi taudia edia boromakau danu bavabidia, Israel taudia edia boromakau natudia mamaruanedia roboadia ibololaidia. ⁴²Taunabunai, Mose ese Israel taudia natudia mamaruanedia roboadia e duahidia, Iehova ese e haġania heġereġerena. ⁴³Roboa mamaruanedia dia iboudiai hua ta e hanaia amo, e duahidia bona ladadia e tore. Ibouboudiai na 22,273.

⁴⁴Bena Iehova ese Mose e hamaoroa, eto, ⁴⁵Levi taudia bavabidia, Israel taudia natudia mamaruanedia roboadia ibololaidia, bona Levi taudia edia boromakau bavabidia, edia boromakau ibololaidia. Levi taudia na lauegu: lau binai Iehova. ⁴⁶A Israel taudia natudia mamaruanedia roboadia sinahu-rua hitu-ahui toi asi ibololaidia Levi oreana amo be davadia bakara: ⁴⁷ta ta amo sekele ima ima amo ba heni. Unu sekele be gabu helaḡana ena sekele: sekele ta lalonai gera^a be ruahui. ⁴⁸Bena una moni, hari roboa mamaruanedia ese Levi taudia e hereadia taudia davadia, be Aaron mai natuna ida ba henidia. ⁴⁹Taunabunai hari Levi taudia ese asie bololaidia taudia davadia be Mose ese e abi, ⁵⁰Israel taudia natudia mamaruanedia roboadia edia amo, sekele daha-ta sinahu-toi tauratoi-ahui ima, gabu helaḡanaena sekele heḡereḡerena. ⁵¹Bena Mose ese una moni na Aaron mai natuna ida e henidia, Iehova ese e haḡania heḡereḡerena.

Levi taudia edia ḡaukara

4 ¹A Iehova ese Mose bona Aaron e haḡanidia, eto, ²Levi garana bogaragidia amo Kohat garana ba duahidia, edia iduhu ta ta ai, ta ta tamadia edia ruma ai. ³Laḡani toi-ahui ela bona laḡani imahui taudia, hebou kalagana ḡaukaradia bae kara diba taudia iboudiai na ba duahidia. ⁴Kohat garana edia ḡaukara binai hebou kalagana lalonai: helaḡa herea ḡaudia bae reḡu. ⁵Taruha irohona negana ai, Aaron mai natuna ida bae raka vareai, seseahu bae kokia oho, taravatu mauana bae ḡovalai. ⁶Bena nani kopina amo ma bae ḡovaia, ma ia murimurinai dabua vaiurina amo bae ḡovaia. Ena maduna danu bae toi hanai.

⁷Bena vairagu ai a atoamu flaoana patana na dabua vaiurina amo bae Iahaia; ia latanai mereki bona nau bona bio bona kehere bae laidia, bona flaoa helaḡana danu bae laia kau. ⁸Bena dabua kakakakana amo bae ḡovadia ahu, bona ia latanai nani kopina. Ena maduna danu bae toi hanai.

⁹Bena dabua vaiurina bae abia, lamepa patana mai ena lamepa bona ihaḡoevadia ḡaudia bona momoru iudadia merekidia bona dehoro kavabudia iboudiai bae kumilai. ¹⁰Bena nani kopina amo ma bae kumidia, bona ihualaina patana ai bae hiri kau.

¹¹*Gold* patana na dabua vaiurina amo bae ḡovaia ahu, bona nani kopina bae kumilai bona ena maduna bae toi hanai. ¹²Bena gabu helaḡana kohudia iboudiai dabua vaiurina ai bae kumidia, ma nani kopina ai bae kumidia, bona ihualaina patana ai bae hiri kau.

¹³Una murinai ihaboulaina patana kahuna bae negea, bona ihaboulaina patana na dabua mia-kakana amo bae lahaia. ¹⁴Bena una

^a 3.47 “Sekele” bona “gera” be Heberu taudia edia metau haheotoho ḡaudia. Sekele ena metau be 16 grams sisivana. Sekele ta lalonai gera be ruahui.

dabua latanaiihaboulaina patana kohudia iboudiai bae lai kau: rahurahu bona kahi bona kahu iudalaina urodia bona ikadolaina gagadia. Bena idoinai na nani kopina amo ba ḡovaia ahu, bona maduna ba toi hanai.

¹⁵Aaron mai natuna ida hari gabu helaḡana mai kohuna idoinai bae kumi vaitani, bona Israel taudia ese edia kalaga bae hua negana ai Kohat garana ese ihuadia totona bae raka kahi mai; ḡau tamona, ḡau helaḡana ta basie daua toho, bae mase na garina. Kohat garana edia huahua ḡaudia bunu, hebou kalagana lalona amo.

¹⁶Hahelaḡa tauna Aaron natuna Eleasara baine reḡu ḡaudia na lamepa dehorona, bona muramura mai bonadia, bona boubou floana, bona dehoru helaḡana. Ia ese danu dubu mai kohuna idoinai bona gabu helaḡana mai kohuna idoinai baine ita tao.

¹⁷Bena Iehova ese Mose bona Aaron e hamaorodia, eto, ¹⁸Kohat taudia na Levi oreana amo basio negedia daure; ¹⁹a ini ba karadia toma, basie mase to bae mauri helaoreana, ḡau helaḡadia bae raka henidia kahi negana ai: Aaron mai natuna ida bae raka vareai, ta ta ena ḡaukara ena ḡaukara, bona ta ta ena maduna ena maduna, bae henidia; ²⁰a idia be basie raka vareai, ḡau helaḡadia basie haḡeredia, lasi ona lasi vaitani, bae mase na garina.

²¹Iehova ese Mose ma e haḡania, eto, ²²Gerson garana ba duahidia, edia iduhu ta ta ai, ta ta tamadia edia ruma ai. ²³Laḡani toi-ahui elabona laḡani imahui taudia, hebou kalagana ḡaukaradia bae kara diba taudia iboudiai, na bae duahidia. ²⁴Gerson garana edia ḡaukara, bae kara karadia bona bae hua ḡaudia, bini: ²⁵dubu habana dabuadia, bona hebou kalagana mai guhina ida bona nani kopidia ia latanai heheato danu, bona hebou kalagana iduarana dabuadia, ²⁶bona maḡu dabuadia, bona dubu bona ihaboulaina patana e ḡeḡedia ahumu maḡuna dabuadia, bona maḡu ikoukouna dabuadia, bona edia kwanau, bona edia ḡaukara ikaralaidia kohudia iboudiai. Unu koku iḡaukaralaidia ḡaukaradia iboudiai idia ese bae kara. ²⁷Gerson taudia edia ḡaukara bona edia koku ihuadia idoidiai na Aaron mai natuna ida ese bae hadibadia; umui ese ba haḡanidia, dahaka dahaka bae kara bona dahaka dahaka bae hua. ²⁸Gerson taudia edia ḡaukara bunu, hebou kalagana lalonai. Hahelaḡa tauna Aaron natuna Itamara ese baine itadia tao.

²⁹Merari garana ba duahidia, edia iduhu ta ta ai, ta ta tamadia edia ruma ai. ³⁰Laḡani toi-ahui ela bona laḡani imahui taudia, hebou kalaganagaukaradia bae kara diba taudia iboudiai, na bae duahidia. ³¹Edia ḡaukara hebou kalagana Ialonai be dubu habana kahadia, bona raroraro, bona ihua-ihuamai ihahelai-kaudia ḡaudia ida, bae hua. ³²Maḡu dudia danu mai ihahelaikaudia ḡaudia ida, bona ikoko, bona kwanau, bona maḡu kohuna idoinai bona ihaginina ḡaudia iboudiai, idia ese bae hua; ta ta ena maduna ena maduna ba duanilai henidia. ³³Merari taudia

edia g̃aukara hebou kalagana ai bunai; hahelaḡa tauna Aaron natuna Itamara ese baine itadia tao.

³⁴Taunabunai, Mose bona Aaron bona hebou ikwaradia taudia ese Kohat taudia e duahidia, edia iduhu ta ta ai, ta ta tamadia edia ruma ai; ³⁵Laḡani toi-ahui ela bona laḡani imahui taudia, hebou kalagana g̃aukaradia ikaradiamai dibadia taudia iboudiai, na e duahidia. ³⁶Iboudiai na 2,750. ³⁷Kohat taudia edia numera bunai, Mose bona Aaron ese iduhu ta ta amo hebou kalagana g̃aukaradia ikaradia mai dibadia taudia e duahidia negana ai. Iehova ese e haḡanidia heḡereḡerena, idia ese unu e duahidia toma.

³⁸Gerson taudia danu, edia iduhu ta ta ai, ta ta tamadia edia ruma ai, e duahidia; ³⁹laḡani toi-ahui ela bona laḡani imahui taudia, heboukalagana g̃aukaradia ikaradia mai dibadia taudia iboudiai, e duahidia. ⁴⁰Iboudiai na 2,630. ⁴¹Gerson taudia edia numera bunai, Mose bona Aaron ese iduhu ta ta amo hebou kalagana g̃aukaradia ikaradia mai dibadia taudia e duahidia negana ai. Iehova ese e haḡanidia heḡereḡerena, idia ese unu e duahidia toma.

⁴²Merari taudia danu, edia iduhu ta ta ai, ta ta tamadia edia ruma ai e duahidia, ⁴³laḡani toi-ahui ela bona laḡani imahui taudia, hebou kalagana g̃aukaradia ikaradia mai dibadia taudia. ⁴⁴Iboudiai na 3,200. ⁴⁵Merari taudia edia numera bunai, Mose bona Aaron ese e duahidia negana ai. Iehova ese e haḡanidia heḡereḡerena, idia ese unu e duahidia toma.

⁴⁶Levi taudia ibouboudiai, Mose bona Aaron bona Israel ikwaradia taudia ese edia iduhu ta ta ai, ta ta tamadia edia ruma ai, e duahidia, ⁴⁷laḡani toi-ahui ela bona laḡani imahui taudia, hebou kalagana g̃aukaradiaikaradia mai dibadia bona madunadia ihuadia mai goadadia taudia. ⁴⁸Iboudiai na 8,580. ⁴⁹Iehova ese Mose e haḡania heḡereḡerena, idia ta ta ena g̃aukara ena g̃aukara bona ena maduna ena maduna e henidia. Unuhetomana Mose ese e duahidia, Iehova ese e haḡania heḡereḡerena.

Gorere metaudia taravatudia

5 ¹Iehova ese Mose e hereva henia, eto, ²Israel taudia ba haḡanidia, lepra taudia iboudiai bona hura-arua taudia iboudiai bona mase g̃audia ediaie dau kau dainai e taubu taudia iboudiai na taruha murimurina bae siaidia lao. ³Iboudiai, mamaruane bona hahine, na taruha murimurina bae raka lasi, lau na noholaiamu taruhana bae hamiroa na garina. ⁴Taunabunai, Israel taudia unu e karadia toma; taruha murimurina e siaidia lao, Iehova ese Mose e haḡania heḡereḡerena.

Kara dika davana

⁵Iehova ese Mose ma e hereva henia, eto, ⁶Israel taudia ba hamaorodia, tau ta eiava hahine ta baine kara dika, Iehova vairanai

baine kerere, ⁷ia ese ena kara dika baine gwauraiia hedinarai, bona ena kara dika ai e hadikaia tauna davana baine henia mai atokauna ida. Atokauna na davana korikori bema karoa, karoa ima, bona karoa ta hegeregereana ma baine atoa kau. ⁸A bema asi dalana ia baine henia eiava varavarana ta baine henia, davana na Iehova baine henia, hahelaḡa tauna ena, bona ena herohemaino boubouna mamoeana danu. ⁹Bona Israel taudia edia helaḡa ḡaudia iboudiai Iehova vairanai bae dudui isi na hahelaḡa tauna ese baine abi, ia ana. ¹⁰Taunimanima iboudiai edia helaḡa ḡaudia hahelaḡa tauna bae henia na iena ḡau.

Mama Herevadia

¹¹Iehova ese Mose ma e hereva henia, eto, ¹²Israel taudia ba hamaorodia, hahine ta baine kerere, ¹³tau ta ida bae heuda hanai; bona baine hunia, adavana asi dibana, tau ta asi dibana, ta danu basine davaria; ¹⁴to adavana baine mama, baine mama henia mai badina eiava baine mama henia asi badina; ¹⁵una tau ese bali flaoana efa^b ta baine karoa, karoa gwauta, bona karoa ta asi dehorona bona asi muramurana baine abia kau, bona hahine baine hakaua lao, hahelaḡa tauna dekenai. Bena hari flaoa baine henia, mama boubouna, kara kerere ilalolaina.

¹⁶Bena hahelaḡa tauna ese hahine baine boiria, baine raka kahi mai Iehova vairanai. ¹⁷Bena hahelaḡa tauna na ranu helaḡa baine abia, raro biona ta ai, bona tano ḡahuna taina dubu lalona amo una ranu ai baine udaia. ¹⁸Bena ia ese hahine huina baine ruhaia, Iehova vairanai; bona hari flaoa, mama boubouna bona kerere ilalolaina ḡauna, na hahine imana ai baine atoa. A hahelaḡa tauna ese hari ranu iditana, hahedika ḡauna, na ia sibona imana ai baine abia. ¹⁹Bena ia ese hahine baine taravaia, baineto “Bema adavamu so koia, tau ta ida so heuda hanai, ina ranu iditana, ena be hahedika ḡauna, to basine hadikamu; ²⁰a bema adavamu o koia, tau ta ida o heuda hanai” ²¹(hahelaḡa tauna ese hahine ma baine taravaia, baineto) “Iehova ese kara havara toana bona taravatu itata-utuna toanaai baine halaomu emu bese taudia bogaragidiai; mamumu ruaosi bae mase, bona bogamu baine gudu; ²²momokani, ina hahedika ranuna na bogamu ai baine diho negana ai, bogamu do baine gudu, bona mamumu ruaosi bae mase”. Bena hahine na baineto “Amen, amen”.

²³Una murinai hahelaḡa tauna na unu hahedika herevadia buka ai baine tore, bona una revareva na hari ranu iditana amo ma baine huria heroho. ²⁴Bena una ranu iditana na ia ese hahine baine henia, baine inua totona. Baine inua, bona una hahedika ranuna na ia bogana ai baine

^b 5.15 “Bali” na flaoa ikaralaina reina ta, uit bamona. “Efa” na Heberu taudia edia hahetoho ḡauna ta ladana.

idita. ²⁵A guna, hahelaḡa tauna ese mama boubouna flaoana na hahine imana amo baine abia, Iehova vairanai baine davea; bena baine laohaia ihaboulaina patana badibadinai. ²⁶Bena flaoa taina imana ai baine abia, ihaboulaina patana lahina ai baine haḡolea oho, helalo ḡauna; una murinai hahine ese una ranu iditana baine inua. ²⁷Bema una hahine ese adavana vada e koia, tau ta ida vada e heuda hanai, una ranu iditana baine inua bona bogana ai baine diho negana ai bogana baine gudu bona mamuna bae mase; bena hahedika toana ai bainela, ena bese taudia bogaragidiai. ²⁸A bema asi ena kerere, ia na basine dika; baine mauri, bona baine rogorogo, natuna baine abidia.

²⁹Mama taravatuna bunai, hahine ta ese adavana baine koia, tau ta ida bae heuda hanai, ³⁰eiava tau ta ese adavana baine mama henia, taravatuna. Ia ese Iehova vairanai baine ato; bena hahelaḡa tauna ese hari taravatu karana baine karaia. ³¹Bena hari tau na asi ena kerere; a una hahine be ena kerere davana baine huaia.

Nasiri Gwau-hamatana

6 ¹Iehova ese Mose e hereva henia, eto, ²Israel taudia ba hamaorodia, tau ta eiava hahine ta baine gwau hamata, Nasiri gwau-hamatana baineabia, ia na baine helaḡa, Iehova ena. ³Ia ese vine ranuna eiava kekero ḡauna ta basine inua; inuinu ḡaudia unuhetomadia iboudiai basine inu. Vine huahuadia ranudia basine inu, bona anidia basine ani; vine huahuadia matamatadia eiava kaukaudia basine ani. ⁴Ena helaḡa dinadia iboudiai vine anidia, nadinadidia ela kopidia, na basine ani.

⁵Ena helaḡa dinadia iboudiai danu huina iutuna eiava kwarana inauna aurina na ia kwarana ai basine dau kau. Iehova e gwaurai henia hamata dinadia iboudiai ia na baine helaḡa; huina do baine lata.

⁶Ena helaḡa dinadia iboudiai danu ia ese mase tauna ta basine raka henia kahi. ⁷Ena be tamana eiava sinana eiava taihuna eiava tadikakana baine mase, to mase tauna enai basine miro; badina be vada e gwau hamata, baine helaḡa Iehova ena. ⁸Taunabunai, ena gwau-hamata dinadia iboudiaia na helaḡa, Iehova ena. ⁹A tau ta ia badibadinai bema mase taku, bena unu amo baine miro, dina hitu na baela, bena dina ihahituna ai ihaḡoevana dinana ai, ia ese kwarana baine naua. ¹⁰Dina ihatauranina ai, ia ese kerea rua eiava pune natuna rua baine abidia, hahelaḡa tauna dekena baine mailaidia, hebou kalagana iduarana ai. ¹¹Bena hahelaḡa tauna ese baine hahelaḡadia, ta kara-dika iabi-ohona boubouna, ma ta ḡole-oho boubouna, una tau dainai heroheimaino karana baine karaia; badina be ia na una mase dainai vada e kerere. Una dina ai, ia ese kwarana baine hahelaḡaia lou; ¹²baine helaḡa, Iehova ena, ena gwau-hamata dinadia iboudiai. Mamoemaruanena ta, laḡani tamona ḡauna, danu baine mailaia, kerere iabi-ohona boubouna ai bainela. A dina gunadia be basine duahidia, badina be ena gwauhamata vada e dika.

¹³Nasiri tauna ese ena gwau-hamata dinadia baine haḡuḡurudia taravatuna binai: bae hakaua lao hebou kalagana iduarana ai; ¹⁴unuseni ai, ia ese ena herahia ḡaudia Iehova baine henia, mamoe natuna maruanena ta, asi bebeka-bebekana, laḡani tamona ḡauna, na ḡole-oho boubouna ai baine halaoa; bonamamoe natuna hahinena ta, asi bebeka-bebekana, laḡani tamona ḡauna, nakara-dika iabi-ohona boubouna ai baine halaoa; bona mamoe maruanenata, asi bebeka-bebekana, na herohemaino boubouna ai baine halaoa; ¹⁵bona flaoa, asie hatubua ḡauna, boseana ta, lalonai be flaoa atagadia, flaoa namo-hereana dehoru ida e bulo bena e gabu ḡaudia, bona flaoa atagadia, latadi ai dehoru e seia ḡaudia, bona flaoa boubouna, bona vine ranuna boubouna. ¹⁶Bena hahelaḡa tauna ese Iehova vairanai baine atodia: kara-dika iabi-ohona boubouna bona ḡole-oho boubouna baine hahelaḡadia; ¹⁷herohemaino mamoe danu baine hahelaḡaia, Iehova ena; bona asie hatubua flaoana boseana bona flaoa boubouna bona vine ranuna boubouna, iboudiai baine hahelaḡadia, hahelaḡa tauna ese. ¹⁸Una murinai hari Nasiri tauna ese kwarana baine naua, hebou kalagana iduarana ai; bona huina, ena gwauhamata toana, na herohemaino bouboudia lahina ai baine gabua. ¹⁹Bena hahelaḡa tauna ese mamoe maruanena larolarona maedana baine abia, bona flaoa dehoru ida e buloa atagana ta bona latanai dehoru e seia atagana ta danu baine abidia, hari Nasiri tauna imana ruaosi ai baine ato kau, kwarana baine naua murinai. ²⁰Bena hahelaḡa tauna ese baine abidia lou, Iehova vairanai baine davedia: una na hahelaḡa tauna ahuna helaḡana. Keme, e davea ḡauna, bona mamu, e dudua isi ḡauna, danu ia ahuna. Una murinai hari Nasiri tauna na vine ranuna baine inua.

²¹Nasiri gwau-hamatana e abiamu tauna taravatuna bunai; ena boubou, Iehova baine henia ḡaudia, taravatudia danu unuheto. Ma boubou haida baine heni danu namo. E gwauraia; hamata heḡereḡerena, unu baine kara toma Nasiri taravatuna ihaḡuḡuruna.

Iehova ena Hahenamo

²²Iehova ese Mose ma e hereva henia, eto, ²³Aaron mai natuna ida ba hamaorodia, Israel taudia bae hanamodia negadia ai, ini bae gwau toma:

²⁴Iehova ese baine hanamomui, bona baine gimamui;

²⁵Iehova ese ia vairana diarina amo baine hadiarimui, bona baine harihari henimui;

²⁶Iehova ese baine haḡeremui, bona maino baine henimui.

²⁷Lau ladagu unu bae gwauraia toma Israel taudia latadi ai; bena lau ese baina hanamodia.

Israel iduhudia edia herahia

7 ¹Mose ese dubu e haginia vaitani dinana ai, ia ese dubu mai kohuna idoinai dehoru amo e horodia bona e hahelaḡadia; ihaboulaina

patana danu mai kohuna idoinai dehoru amo e horodia bona e hahelaḡadia. ²Una dina ai danu Israel lohiadia, iduhu ikwaradia taudia, e duahidia taudia iboudiai biagudia, ese ³edia herahia ḡaudia e mailaidia, Iehova vairanai e atodia. Ḡaudia be rerue mai rumarumadia tauratoi bona boromakau mamaruanedia dia gwauta rua: lohia rarua rarua amo rerue ta ta, bona lohia ta ta amo boromakau mamaruanena ta ta; idia ese dubu vairanai e hahelaḡadia.

⁴Bena Iehova ese Mose e hamaoroa, eto, ⁵Edia herahia ḡaudia bavabi, hebou kalagana ena ḡaukara ḡaudia ai baela. Levi taudia ba henidia, ta ta ena ḡaukara ena ḡaukara heḡereḡeredia. ⁶Taunabunai, Mose ese rerue bona boromakau e abidia, Levi taudia e henidia. ⁷Rerue rua bona boromakau mamaruanedia hani Gerson natuna e henidia, edia ḡaukara heḡereḡerena; ⁸ma rerue hani bona boromakau mamaruanedia taurahani Merari natuna e henidia, edia ḡaukara heḡereḡerena: unu ḡaukara be Itamara, hahelaḡa tauna Aaron natuna, ese e biagudia. ⁹A Kohat natuna be ḡau ta se henidia, badina be edia ḡaukara be dubu kohudia helaḡadia paḡadia ai bae hua.

¹⁰Hari lohia taudia ese danu edia herahia ḡaudia haida ma e mailaidia, ihaboulaina patana ihahelaḡana totona ihaboulaina patana dehoru amo e horoa dinana ai. Unu herahia na ihaboulaina patana vairanai e atodia diho. ¹¹Bena Iehova ese Mose e hamaoroa, eto, Dina ta ta ai lohia ta ta ena herahia ena herahia bae hahelaḡadia, unu amo ihaboulaina patana baine helaḡa.

¹²Dina gini-gunana ai Nason Aminadab, Iuda iduhuna tauna, ese ena herahia e hahelaḡaia. ¹³Ena herahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekelehitu-ahui, gabu helaḡana ena sekele heḡereḡerena; unu ḡau ruaosi na flaoa namo-hereana, dehoru ida e buloa ḡauna, vada e honu, flaoa boubouna; ¹⁴bona *gold* nauna ta, metauna na sekele gwauta, muramura mai bonadia vada e honu; ¹⁵bona boromakau natuna maruanena ta; bona mamoe maruanena ta; bona mamoe natuna maruanena ta, laḡani, tamona ḡauna, ia na ḡole-oho boubouna; ¹⁶bona nani maruanena ta, kara-dika iabi-ohona boubouna; ¹⁷bona boromakau mamaruanedia rua, bona mamoe mamaruanedia ima, bona nani mamaruanedia ima, bona mamoe natudia mamaruanedia ima laḡani tamona ḡaudia, unu iboudiai be heroheimaino boubouna. Nason Aminadab ena herahia bunu.

¹⁸Dina iharuana ai Netanele Suara, Isakara Iohiana, ese ena herahia e hahelaḡaia. ¹⁹Ena herahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena: unu ḡau ruaosi na flaoa namo-hereana, dehoru ida e buloa ḡauna, vada e honu, flaoa

boubouna; ²⁰bona *gold* nauna ta, metauna na sekele gwauta, muramura mai bonadia vada e honu; ²¹bona boromakau natuna maruanena ta; bona mamoe maruanena ta; bona mamoe natuna maruanena ta, laḡani tamona ḡauna, ia na- ḡole-oho boubouna; ²²bona nani maruanena ta, kara-dika iabi-ohona boubouna; ²³bona boromakau mamaruanedia rua, bona mamoe mamaruanedia ima, bona nani mamaruanedia ima, bona mamoe natudia mamaruanedia ima, laḡani tamona ḡaudia, unu iboudiai be herohemaino boubouna. Netanele Suara ena herahia bunu.

²⁴Dina ihatoina ai Eliab Helon, Sebulun lohiana, ²⁵ena herahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena; unu ḡau ruaosi na flaoa namo-hereana, dehoroda e buloaḡauna, vada e honu, flaoa boubouna; ²⁶bona *gold* nauna ta, metauna na sekele gwauta, muramura mai bonadia vada e honu; ²⁷bona boromakau natuna naruanena ta; bona mamoe maruanena ta; bona mamoe natuna maruanena ta, laḡani tamona ḡauna, ia na ḡole-oho boubouna; ²⁸bonanani maruanena ta, kara-dika iabi-ohona boubouna; ²⁹bona boromakau mamaruanedia rua, bona mamoe maruanena ima, bona nani mamaruanedia ima, bona mamoe natudia mamaruanedia; ima, laḡani tamona ḡaudia, unu iboudiai be herohemaino boubouna. Eliab Helon ena herahia bunu.

³⁰Dina ihahanina ai Elisuru Sedeuru, Ruben lohiana, ³¹ena herahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena; unu ḡau ruaosi na flaoa namo-hereana, dehoroda e buloaḡauna, vada e honu, flaoa boubouna; ³²bona *gold* nauna ta, metauna na sekele gwauta, muramura mai bonadia vada e honu; ³³bona boromakau natuna maruanena ta; bona mamoe maruanena ta; bona mamoe natuna maruanena ta, laḡani tamona ḡauna, ia na ḡole-oho boubouna; ³⁴bonanani maruanena ta, kara-dika iabi-ohona boubouna; ³⁵bona boromakau mamaruanedia rua, bona mamoe mamaruanedia ima, bona nani mamaruanedia ima, bona mamoe natudia mamaruanedia ima, laḡani tamona ḡaudia, unu iboudiai be herohemaino boubouna. Elisuru Sedeuru ena herahia bunu.

³⁶Dina iha-imana ai Selumiele Surisadai, Simeon lohiana, ³⁷ena herahiāḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena; unu ḡau ruaosi na flaoa namo-hereana, dehoroda e buloaḡauna, vada e honu, flaoa boubouna; ³⁸bona *gold* nauna ta, metauna na sekele gwauta, muramura mai bonadia vada e honu; ³⁹bona boromakau natuna maruanena ta; bona mamoe maruanena ta; bona mamoe natuna maruanena ta, laḡani tamona ḡauna,

ia na ḡole-oho boubouna; ⁴⁰ bonanani maruanena ta, kara-dika iabi-ohona boubouna; ⁴¹ bona boromakau mamaruanedia rua, bona mamoe mamaruanedia ima, bona nani mamaruanedia ima, bona mamoe natudia mamaruanedia ima, laḡani tamona ḡaudia, unu iboudiai be herohemaino boubouna. Selumiele Surisadai ena herahia bunu.

⁴² Dina ihatauratoina ai Eliasaf Reuele, Gad lohiana, ⁴³ ena herahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena; unu ḡau ruaosi na flaoa namo-hereana, dehoroda e buloaḡauna, vada e honu, flaoa boubouna; ⁴⁴ bona *gold* nauna ta, metauna na sekele gwauta, muramura mai bonadia vada e honu; ⁴⁵ bona boromakau natuna maruanena ta; bona mamoe maruanena ta; bona mamoe natuna maruanena ta, laḡani tamona ḡauna, ia na ḡole-oho boubouna; ⁴⁶ bonanani maruanena ta, kara-dika iabi-ohona boubouna; ⁴⁷ bona boromakau mamaruanedia rua, bona mamoe mamaruanedia ima, bona nani mamaruanedia ima, bona mamoe natudia mamaruanedia ima, laḡani tamona ḡaudia, unu iboudiai be herohemaino boubouna. Eliasaf Reuele ena herahia bunu.

⁴⁸ Dina ihahituna ai Elisama Amihud, Efraim lohiana, ⁴⁹ ena herahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena; unu ḡau ruaosi na flaoa namo-hereana, dehoroda e buloaḡauna, vada e honu, flaoa boubouna; ⁵⁰ bona *gold* nauna ta, metauna na sekele gwauta, muramura mai bonadia vada e honu; ⁵¹ bona boromakau natuna maruanena ta; bona mamoe maruanena ta; bona mamoe natuna maruanena ta, laḡani tamona ḡauna, ia na ḡole-oho boubouna; ⁵² bonanani maruanena ta, kara-dika iabi-ohona boubouna; ⁵³ bona boromakau mamaruanedia rua bona mamoe maruanena ima, bona nani mamaruanedia ima, bona mamoe natudia mamaruanedia ima, laḡani tamona ḡaudia, unu iboudiai be herohemaino boubouna. Elisama Amihud ena herahia bunu.

⁵⁴ Dina ihatauranina ai Gamaliel; Pedasuru, Manase lohiana, ⁵⁵ ena herahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡanaena sekele heḡereḡerena; unu ḡau ruaosi na flaoa namo-hereana, dehoroda e buloa ḡauna, vada e honu, flaoa boubouna; ⁵⁶ bona *gold* nauna ta, metauna na sekele gwauta, muramura mai bonadia vada e honu; ⁵⁷ bona boromakau natuna maruanena ta; bona mamoe maruanena ta; bona mamoe natuna maruanena ta, laḡani tamona ḡauna, ia na ḡole-oho boubouna; ⁵⁸ bona nani maruanena ta, karadika, dika iabi-ohona boubouna; ⁵⁹ bona boromakau mamaruanedia rua, bona mamoe mamaruanedia ima, bona nani mamaruanedia ima, bona mamoe natudia

mamaruanedia ima, laḡani tamona ḡaudia, unu iboudiai be herohemaino boubouna. Gamaliel Pedasuru ena herahia bunu.

⁶⁰Dina ihataurahani-tana ai Abidan Gideoni, Beniamina lohiana, ⁶¹enaherahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena; unu ḡau ruaosi na flaoa namo-hereana, dehoru idae buloa ḡauna, vada e honu, flaoa boubouna; ⁶²bona *gold* nauna ta, metauna na sekele gwauta, muramura mai bonadia vada e honu; ⁶³bona boromakau natuna maruanena ta, bona mamoe maruanena ta; bona mamoe natuna maruanena ta, laḡani tamona ḡauna, ia na ḡole-oho boubouna; ⁶⁴bona nani maruanena ta, kara-dika iabi-ohona boubouna; ⁶⁵bona boromakau mamaruanedia rua, bona mamoe mamaruanedia ima, bona nani mamaruanedia ima, bona mamoe natudia mamaruanedia ima, laḡani tamona ḡaudia, unu iboudiai be herohemaino boubouna. Abidan Gideoni ena herahia bunu.

⁶⁶Dina ihagwautana ai Ahiesere Amisadai, Dan lohiana, ⁶⁷ena herahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena; unu ḡau ruaosi na flaoa namo-hereana, dehoru ida e buloaḡauna, vada e honu, flaoa boubouna; ⁶⁸bona *gold* nauna ta, metauna na sekele gwauta, muramura mai bonadia vada e honu; ⁶⁹bona boromakau natuna maruanena ta; bona mamoe maruanena ta; bona mamoe natuna maruanena ta, laḡani tamona ḡauna, ia na ḡole-oho boubouna; ⁷⁰bonanani maruanena ta, kara-dika iabi-ohona boubouna; ⁷¹bona boromakau mamaruanedia; rua, bona mamoe mamaruanedia ima, bona nani mamaruanedia ima, bona mamoe natudia mamaruanedia ima, laḡani tamona ḡaudia, unu iboudiai be herohemaino boubouna. Ahiesere Amisadai ena herahia bunu.

⁷²Dina ihagwauta-tana ai Paginele Okran, Asere lohiana, ⁷³ena herahia ḡaudia bini: *silver* merekina ta, metauna na sekele sinahu-ta toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena; unu ḡau ruaosi na flaoa namo-hereana, dehoru ida e buloaḡauna, vada e honu, flaoa boubouna; ⁷⁴bona *gold* nauna ta, metauna na sekele gwauta, muramura mai bonadia vada e honu; ⁷⁵bona boromakau natuna maruanena ta; bona mamoe maruanena ta; bona mamoe natuna maruanena ta, laḡani tamona ḡauna, ia na ḡole-oho boubouna; ⁷⁶bonanani maruanena ta, kara-dika iabi-ohona boubouna; ⁷⁷bona boromakau mamaruanedia rua, bona mamoe mamaruanedia ima, bona nani mamaruanedia ima, bona mamoe natudia mamaruanedia ima, laḡani tamona ḡaudia, unu iboudiai be herohemaino boubouna. Paginele Okran ena herahia bunu.

⁷⁸Dina ihagwauta-ruana ai Ahira Enan, Napatali lohiana, ⁷⁹ena herahiaḡaudia bini: *silver* merekina ta, metauna na sekele sinahu-ta

toi-ahui, bona *silver* kibokibona ta, metauna na sekele hitu-ahui, gabu helaḡana ena sekele heḡereḡerena; unu ḡau ruaosi na flaoa namo-
hereana, dehoru ida e buloaḡauna, vada e honu, flaoa boubouna; ⁸⁰bona *gold* nauna ta, metauna na sekele gwauta, muramura mai bonadia
vada e honu; ⁸¹bona boromakau natuna maruanena ta; bona mamoe
maruanena ta; bona mamoe natuna maruanena ta, laḡani tamona ḡauna,
ia na ḡole-oho boubouna; ⁸²bonanani maruanena ta, kara-dika iabi-
ohona boubouna; ⁸³bona boromakau mamaruanedia rua, bona mamoe
mamaruanedia ima, bona nani mamaruanedia ima, bona mamoe natudia
mamaruanedia ima, laḡani tamona ḡaudia, unu iboudiai be herohemaino
boubouna. Ahira Enan ena herahia bunu.

⁸⁴Israel lohiadia na ihaboulaina patana ihahelaḡana herahiadia e heni,
dehoru amo e horoa dinana ai, ḡaudia bini: *silver* merekidia gwauta-
rua; *silver* kibokibodia gwauta-rua; *gold* naudia gwauta-rua. ⁸⁵*Silver*
merekidia ta ena metau ena metau be sekele sinahu-ta toi-ahui; bona
silver kibokibodia ta ena metau ena metau be sekele hitu-ahui. *Silver*
ḡaudia iboudiai ediametau idoinai be sekele daha-rua sinahu-hani, gabu
helaḡana ena sekele^c heḡereḡerena. ⁸⁶Hari *gold* naudia gwauta-ruaosi,
muramura mai bonadiae honu ḡaudia, ta ta ena metau ena metau be
sekele gwauta, gabu helaḡana ena sekele heḡereḡerena; *gold* ḡaudia
iboudiai edia metau idoinai be sekele sinahu-ta ruahui.

⁸⁷Boromakau mamaruanedia, ḡole-oho boubouna ḡaudia, iboudiai
begwauta-rua; mamoe mamaruanedia danu gwauta-rua, bona mamoe
natudia mamaruanedia, laḡani tamona ḡaudia, be gwauta-rua, mai
flaoa bouboudiaida e heni. Nani mamaruanedia, kara-dika iabi-ohona
bouboudia ḡaudia, na gwauta-rua danu. ⁸⁸Boromakau mamaruanedia,
herohemaino bouboudia ḡaudia, na ruahui hani; mamoe mamaruanedia
na tauratoi-ahui; nani mamaruanedia na tauratoi-ahui; mamoe natudia
mamarua nedia, laḡani tamonaḡaudia, danu tauratoi-ahui. Ihaboulaina
patana ihahelaḡana herahiadia bunu, dehoru amo e horoa dinana ai e
heni.

⁸⁹Mose na hebou kalagana lalonai e raka vareai, Iehova ida bae
herevahereva eto. Una negana ai Iehova gadona e kamonai, taravatu
mauana ikaruhina daena amo bona kerubi ruaosi padadia amo ema, e
hereva henia.

Levi taudia ihaḡoevadia

8 ¹Iehova ese Mose e hereva henia, eto, ²Aaron ba hamaoroa, lamepa
na gabudia ai baine atodia negana ai, lamepa hituosi na lamepa

^c 7.85 bona siri haida ai: “Sekele” na Heberu taudia edia hahehetoḡo ḡauna ta. Sekele ta
anina be 16 grams sisivana.

patana vairana kahana bae. ³Bena Aaron na unu e kara toma: lamepa na gabudia e ato, lamepa patana vairana kahana e hadiaria, Iehova ese Mose e haġania heġereġerena. ⁴Hari lamepa na *gold* amo e koroa, aena ela bona heraherana, idoinai na *gold* amo e koroa; Iehova ese Mose e hadibalaia heġereġerena, hari lamepa patana na unu e koroa toma.

⁵Iehova ese Mose e hamaoroa, eto, ⁶Levi taudia na Israel taudia bogaragidia amo bavabidia, ba haġoevadia. ⁷Ini ba haġoevadia toma: ranu helaġana amo ba nevaridia; bena kopidia idoidiai bae naudia, edia dabua bae huridia, bona bae digu. ⁸Una murinai idia ese boromakau natuna maruanena ta bae abia, mai ena flaoa boubouna ida, flaoa namohereana dehoru ida e buloa ġauna. Boromakau natuna maruanena ma ta danu bavabia, kara-dika iabi-ohona boubouna. ⁹Bena Levi taudia nahebou kalagana vairanai ba hakaudia lasi; bona Israel oreana taudia iboudiai ba haboudia. ¹⁰Bena Levi taudia na Iehova vairanai ba haginidia. Israel taudia ese imadia na Levi taudia latadijai bae ato kau; ¹¹beni Aaron ese Levi taudia baine abidia, davedave boubouna ai baine halaodia, Israel taudia edia amo, Iehova isiaina bae lao heni totona. ¹²Bena Levi taudia ese imadia na boromakau mamaruanedia kwaradia ai bae ato kau; ta kara-dika iabi-ohona boubouna ai ba halaoa, ma ta ġole-oho boubouna ai ba halaoa, Iehova ena, Levi taudia daidiai herohe-maino karana ba karaia. ¹³Bena Levi taudia na Aaron mai natuna ida vairadijai ba haginidia, davedave boubouna ai baela Iehova ena.

¹⁴Levi taudia na Israel taudia bogaragidia amo unu ba hididia toma; idia na lauegu. ¹⁵Una negana ai, ba haġoevadia bona davedave boubouna ai ba halaodia murinai, idia na hebou kalagana lalonai bae raka vareai, bona ġaukarana bae karaia. ¹⁶Badina be Israel taudia bogaragidia amo vada o henigu; Israel hahinedia iboudiai natudia mamaruanedia roboadia ibolodia vada na abidia. ¹⁷Badina be roboa mamaruanedia iboudiai Israel ai na lauegu, taunimanima natudia roboadia bona ubu-ubu ġaudia natudia roboadia; Aigupto tanona ai roboa mamaruanedia iboudiai na aladia mase dinana ai na hahelaġadia lauegu. ¹⁸A Israel edia roboa mamaruanedia ibolodia na Levi taudia vada na abidia, ¹⁹Aaron mai natuna ida vada na henidia, Israel taudia bogaragidia; amo; hebou kalagana ġaukaradia bae kara idia daidiai, bona Israel taudia daidiai herohe-maino karana bae karaia, gabu helaġana bae raka henia kahi bena gorere ese baine aladia na garina.

²⁰Ini kara iboudiai Mose bona Aaron bona Israel oreana taudia iboudiai ese Levi taudia e kara henidia; Iehova ese Levi taudia herevadia Mose e haġanilaia heġereġerena, Israel taudia na unu e kara toma. ²¹Levi taudia ese edia kara-dika amo e haheġoeva bona edia dabua e huri; bena Aaron ese davedave boubouna ai e halaodia, Iehova vairanai. Aaron ese herohe-maino karana vada, e karaia, idia daidiai, idia ihaġoevadia totona.

²²Una murinai Levi taudia na hebou kalagana ai e raka vareai, Aaron mai natuna ida idurulaida ḡaukaradia e kara; Jehova ese Levi taudia herevadia Mose e haḡanilaia heḡereḡerena, idia na unu e kara toma.

²³Bena Jehova ese Mose ma e hamaoroa, eto, ²⁴Levi taudia herevadia bini edia vara laḡanidia bae ruahui ima negana ai bae ḡaukara matama, hebou kalagana lalonai; ²⁵ela bona edia vara laḡanidia bae imahui negana ai ḡaukara na bae rakatania, basie karaia lou. ²⁶Una murinai, idia ese varavaradia bae bamodia, hebou kalagana ireḡuna ai, to basie ḡaukara. Levi taudia edia ḡaukara na unu ba henidia toma.

Lagau Hanai Ariana

9 ¹Israel taudia ese Aigupto tanona amo e raka lasi murinai, laḡani iharuana ena hua gini-gunana ai Jehova ese Mose e hereva henia Sinai tano ḡaḡaenaai, ²eto, Israel taudia ese lagau-hanai ariana bae badinaia, ena nega korikoriai. ³Una hua ena dina ihagwauta-hanina adorahina ai ba karaia, ena nega korikorina ai, taravatuna iboudiai heḡereḡerena.

⁴Taunabunai, Mose ese Israel taudia e haḡanidia, lagau-hanai ariana bae karaia eto. ⁵Bena hua gini-gunana ena dina ihagwauta-hanina adorahina ai lagau-hanai ariana e karaia, Sinai tano ḡaḡaena ai; Jehova ese Mose e haḡanilaia karadia iboudiai na a Israel taudia ese e karadia ḡuḡuru.

⁶A tatau haida vada e taubu, mase tauna enai vada e dau kau dainai, taunabunai idia na mai edia hekwakwanai lagau-hanai ibadinana ai una dina ai, bena idia ese Mose bona Aaron dekedia ela una dina ai. ⁷Idia ese Mose e hamaoroa eto, Ai a taubu, mase tauna enai vada a dau kau dainai. Badina be dahaka ai ese Jehova basia boua diba, nega korikorina ai, Israel taudia iboudiai ida ⁸Mose ese e haere henidia, eto, Do ba noho, ela bona lau baina kamoni, Jehova ede baine haḡanilaigu toma umui daimui ai.

⁹Bena Jehova ese Mose e haḡania, eto, ¹⁰Israel taudia ba hamaorodia, baoto: Ena be umui emui ai eiava garamui ediai tau ta baine taubu, mase tauria enai baine dau kau dainai, eiava dauhai baine laolao, to ia be Jehova ena lagau-hanai ariana baine badinaia. ¹¹Idia ese hua iharuana ena dinaihagwauta-hanina adorahina ai bae karaia; mai flaoana, asie hatubua ḡauna, bona mai aniani avadia iditadia ida do bae ania.

¹²Bahu basine mia rani, turiana ta danu basie hakwaidua; lagau-hanai taravatudia iboudiai heḡereḡeredia ai bae karaia. ¹³A tau ta se miromu eiava se laolaomu to lagau-hanai ariana basine badinaia, una tau be ena bese amo bae negea daure; badina be Jehova se boua, nega korikorina ai. Una tau be ena dika do baine huaia. ¹⁴Bema idau tauna ta dekemui ai baine noho hedoa, bena ia baine ura Jehova ena lagau-hanai ariana baine ania, lagau-hanai taravatudia heḡereḡeredia, ia be baine ania diba. Emui taravatu baine tamona, noho-hedoa taudia bona bese korikori taumui.

Ori ese dubu e ġovaia ahu

¹⁵Dubu e haginia dinana ai, ori ese dubu, taravatu mauana kalagana, e ġovaia ahu, ela bona hanua e boi, bena ita-itana na lahi na heto ela bonadaba e rere, dubu daenai. ¹⁶Nega idoinai unu mo heto, ori ese e ġovaia ahu dina ai bona lahi hanuaboi ai. ¹⁷Bena ori ese kalaga e daetania negadia ai, Israel taudia na e tore isi, edia laolao ela; a ori e diho henia gabuna ai, Israel taudia na unuseni ai e taruha. ¹⁸Iehova ena haheġani dainai Israel taudia na e tore isi, bona Iehova ena haheġani dainai idia na e taruha ori ese dubu e ġovaia ahuva negana lalonai, idia na taruha ai e nohova. ¹⁹Ena be ori ese dina hoho dubu e ġovaia ahu, to Israel taudia ese Iehova ena haheġani e laloa tao, bena asie tore isi. ²⁰Nega haida ori ese dina dia hoho dubu e ġovaia ahu; bena Iehova ena haheġani heġereġerena taruha ai e nohova, ma Iehova ena haheġani heġereġerena e tore isi. ²¹Ma nega haida ori na adorahi ai e diho, e mia rani; daba ai ma e dae, bena idia na e tore isi. Eiava dina ta hanuaboi ta e miava, bena e daetanidia negana ai idia na e tore isi. ²²ori ese dubu e ġovaia ahu negana bema dina rua, eiava hua ta, eiava nega daudau, to Israel taudia taruha ai e nohova, asie tore isi; a e daetanidia negana ai idia na e tore isi. ²³Iehova ena haheġani dainai e taruha, ma Iehova ena haheġani dainai e tore isi; idia ese Iehova ena haheġani e badinaia, Iehova ese Mose e haġania heġereġerena.

Silver kibidia

10 ¹Iehova ese Mose e haġania, eto, ²Kibi rua ba kara, *silver* amo ba korodia. Reġedia na taunimanima ihaboudia bona taruha ikokina toadia ai baela. ³Kibi ruaosi bae hiriri negadia ai, taunimanima iboudiai na dekemu ai bae hebou, hebou kalagana iduarana ai. ⁴A tamona bae hiriria negadia ai, bese lohiadia, Israel iduhudia ikwaradia, na dekemu ai bae hebou. ⁵Kibi bae hiriri lalo-dika negana ai, mairiveina kahana taruhana bae kokia, bae huaia lao. ⁶Nega iharuana ma bae hiriri lalo-dika negana ai, diho kahana taruhana bae kokia, bae huaia lao. Hari kibi reġedia be edia tore-isitoana. ⁷A taunimanima ihaboudia ba ura negadia ai, kibi na bae hiriri, to basie hiriri lalo-dika. ⁸Hahelaġa taudia, Aaron garana, ese kibi bae hiriri: emui kibi taravatuna bunai, ela bona uru iboudiai. ⁹Inaimui ese bema hadikamui emui tano ai, bena boma tuari henidia, una negana ai kibi boma hiriri lalo-dika; bena Iehova emui Dirava ese baine lalomui, bona inaimui imadia amo baine hamaurimui. ¹⁰Emui moale dinadia ai danu, bona emui aria dinadia ai, eiava hua matamata negadia ai, emui ġole-oho bouboudia bona emui herohemaino bouboudia ba hahelaġadiamai kibi ihiriridia ida; unu amo emui Dirava ese baine lalomui tao. Lau binai Iehova, emui Dirava.

Israel taudia Sinai e rakatania

¹¹Laḡani iharuana ai, hua iharuana dinana iharuahuina ai, ori ese taravatu mauana dubuna e daetania. ¹²Israel taudia ese Sinai tano ḡaḡaena e rakatania, eha laolao, ela bona ori na Paran tano ḡaḡaena ai e diho. ¹³Edia laolao gini-gunana binai, Iehova ese Mose e haganilaia dalana amo e laolaova. ¹⁴Guna Iuda taruhana taudia edia oreā ta ta amo edia pepe murina amo e raka; edia oreā e gunalaidia tauna na Nason Aminadab. ¹⁵Isakara taudia edia oreā igunalaidia tauna na Netanele Suara. ¹⁶Sebulun taudia edia oreā igunalaidia tauna na Eliab Helon.

¹⁷Bena dubu e kokia, Gereson natuna bona Merari natuna ese e huaia lao. ¹⁸Idia muridiai Ruben taruhana taudia edia oreā ta ta amo edia pepe murina amo e raka; edia oreā e gunalaidia tauna na Elisuru Sedeuru. ¹⁹Simeon taudia edia oreā igunalaidia tauna na Selumiele Surisadai. ²⁰Gad taudia edia oreā igunalaidia tauna na Eliasaf Reuele.

²¹Bena Kohat taudia ese kohu helaḡadia e hua; idia do asie kau ai dubu be vada e haginia guna. ²²Idia muridiai Efraim taruhana taudia edia oreā ta ta amo edia pepe murina amo e raka; edia oreā e gunalaidia tauna na Elisama Amihud. ²³Manase taudia edia oreā igunalaidia tauna na Gamaliel Pedasuru. ²⁴Beniamina taudia edia oreā igunalaidia tauna na Abidan Gideoni.

²⁵Bena gabe oreadia e tore isi. Dan taruhana taudia edia oreā ta ta amo edia pepe murina amo e raka; edia oreā e gunalaidia tauna na Ahiesere Amisadai. ²⁶Asere taruhana taudia edia oreā igunalaidia tauna na Pagiele Okran. ²⁷Napatāli taruhana taudia edia oreā igunalaidia tauna na Ahira Enan. ²⁸Israel taudia e tore isi negana ai edia laolao dalana be unuheto, oreā ta ta amo e raka.

²⁹Mose ese ihana Hobab Reuele, tau Midian, e hereva henia, eto, Ai na baia laolaomu, Iehova ese vada e hamaoromai baine henimai e tomu tanona baia lao henia. Taunabunai ba bamomai, bena namo ba davaria; badina be Iehova ese ḡau namodia vada e abi heḡeḡae, Israel taumai emai. ³⁰A ia e haere, eto, Lau na basina bamomui, egu tano korikori baina lou henia, varavaragu dekedā bainala. ³¹Mose ma eto, Basio rakatanimai; badina be oi dibamu ai na tano ḡaḡaena ai baia taruha, bena oi na ai matamai ai baola. ³²Ba bamomai, bena Iehova ena herahia ḡaudia amo oi ahumu do baia henimu.

³³Taunabunai, idia na Iehova ena ororo amo e laolao matama, dina toi eha laolao, Iehova ena taravatu mauana danu dina toiosi ai idia vairadiai e huaia lao, edia laḡa-ani gabuna e tahua. ³⁴Dina ai, Iehova ena ori esee hahekerukerudia, edia taruha e toretania negadia iboudiai. ³⁵Maua helaḡana e huaia lao negadia ai, Mose eto, Iehova e, a tore isi, inaimu ba hakarohodia; e inai henimumu taudia na oi vairamu ai bae heau. ³⁶Bona

e atoa diho negadia ai ma eto, Jehova e, Israel taudia gerebu gerebu ba lou henidia.

Israel taudia e maumau

11 ¹Israel taudia na e maumau, hereva dikadia e gwaurai Jehova vairanai. Jehova na e kamoni, bena e badu, lahi na latadiai e hadihoa; una lahi ese taruha isena e arai. ²Bena Israel taudia ese Mose e tai henia, bena Mose ese Jehova e noia; bena lahi na e bodo. ³Taunabunai una gabu ladana e hatoa Tabera,^d badina be Jehova ena lahi na bogaragidiai e arava.

⁴Bena orea idau-idau taudia Aigupto tanona amo Israel taudia idae raka lasi hebou taudia, na e gado dikadika, bona Israel taudia ma e taitai lou, eto, vamu be ede amo baita abia? ⁵Aigupto ai gwarume ta ani asi davadia ani? Bona kiukamba bona melon bona liki bona onion bona galik na momo herea ani? ⁶A harihari emai goada vada eme ore; gau ta lasi, ina mana mo e heitamu.

⁷Hari mana be nadinadi kurokurona na heto; ita-itana na bedolak^e nadina na heto. ⁸Taunimanimi ese e hagogo; bena huro nadidia amo e idi patapata, eiava gwada-gwada auna lalonai e gwadaia; bena uro ai e nadua, manemane e kara, mamidia na flaoa dehoru ida e bulo dikeadia mamidia na heheto. ⁹Hanuaboi ai hunu taruha ai e dihova negana ai, hari mana danu e dihova.

¹⁰Israel iduhudia iboudia e taitai, ta ta ena kalaga iduarana ena kalaga iduarana ai; bena Mose ese edia taitai e kamoni. Jehova na e badu laloğarağara; Mose danu e badu. ¹¹Bena Mose ese Jehova e hereva henia, eto, Dahaka dainai emu hesiai tauna ini vada o hadikagu toma? Edeheto oi na so lalo namo henigumu? Edeheto ina bese idoinai ireğuna na lauegu maduna ai vada o halaoa? ¹²Ini taunimanimi loğora na lau natugu a? Lau ese na havaradia dainai oi na o tomu “Imamu ai a rosidia, rata e inuamu merona na heto, ela bona senedia na gwau henilaidia hamata tanona ai” a? ¹³Vamu na edeseni ai baina abia, ini taunimanimi loğora iubulaidia? Badina be idia na lau vairagu ai e taimu, e tomu “Vamu a henimai, baia ania”. ¹⁴Lau na sibogu ini taunimanimi loğora ireğudia asiname heğereğere; maduna na metau herea, ihuana na asi goadagu. ¹⁵Emu ura egu ai bema unuheto, namona be boma bogagu hisi, ina harihari boma alagu mase, bena egu hemarai na basie hedinarai.

¹⁶Bena Jehova ese Mose e hağania, eto, Israel tau-badadia hitu-ahui bavabidia hidi, oi dibamu tau-badadia korikori bona mai siahudia taudia; bena ba haboudia hebou kalagana vairanai, oi ida bae gini. ¹⁷Bena lau

^d 11.3 “Tabera” anina be “e ara”. ^e 11.7 “Bedolak” na Heberu taudia edia herahera nadina ta.

baina diho, baina hereva henimui unuseni ai; bona oi vada na henimu siahuna kahana baina abia lou, idia baina henidia; ini taunimanimu iregūdia madunana na oi ida ba huaia hebou, sibomu basio huaia.

¹⁸Taunimanimu danu ba hamaorodia, baoto: Sibomui ba hahelağa ela bona kerukeru, bena vamu bavania; badina be Iehova o tai henia, oto “Daika ese amai vamu baine henimai? Aigupto ai bogamai e kunuva”. Taunabunai, Iehova ese vamu baine henimui, bavania. ¹⁹Dia dina tamona eiava rua bona eiava ima eiava gwauta eiava ruahui, ²⁰a hua ena dina iboudiai vamu bavania, ela bona ianina ai ba hesiku, bena ba dadaraia. Badina be Iehova, bogaragimui ai e nohomu Diravana, vada o dadaraia, ia vairanai o tai, oto “Dahaka dainai Aigupto a rakatania?”

²¹A Mose eto, Be, egu bese taudia iboudiai be domaga tauratoi^f aedia amo e rakamu: taudia; a oi na o tomu “Vamu baina henidia, bae ania, ela bona hua ta baine ore”. ²²Mamoe seridia bona nani seridia bae aladia ore, adia vamu, a? Eiava davara gwarumedia iboudiai bae abidia ore, idia bogadia ihakunudia a?

²³Iehova ese Mose e haere henia, eto, Iehova imana e tunamu a? Do ba itaia, lauegu hereva baine momokani eiava lasi.

²⁴Taunabunai Mose e raka lasi, Iehova ena hereva na Israel taudia e hamaorolaidia, a Bena tau badadia hitu-ahui e abidia hidi, hebou kalagana murimurinai e haginidia hegege. ²⁵Bena Iehova na ori ai e diho, e hereva henia, a bona e henia siahuna kahana na hari hitu-ahuiosi e henidia; bena hari siahu idia latadiai e kau negana ai idia na e peroveta, to una negana ai mo.

²⁶Tatau rarua taruha ai e nohova, ta ladana na Eledad, ma ta ladana na Medad; bena siahu na idia danu latadiai e kau. Idia be e abidia hidi taudia rarua, a hebou kalagana asiela, bena taruha lalonai e peroveta. ²⁷Bena eregabe tauna ta ese Mose dekena e heau lao, eto, Eledad bona Medad be taruha ai e perovetamu. ²⁸Bena Iosua Nunu, Mose ena hesiai tauna bona ena abi-hidi tauna ta, e hereva, eto, Mose Rahobada e, ba gwaudia tao. ²⁹A Mose ese e haere henia, eto, Lau daigu ai o vağegemu a? Iehova ena ore taudia iboudiai bema peroveta bona Iehova ena siahu be iboudiai latadiai bema kau bema namo. ³⁰Bena Mose, Israel tau-badadia ida, taruha e lou henia.

³¹Una negana ai Iehova ese lai ta e siaia; bena una lai ese kibi momo davara kahana e harohodia diho edia taruha tanona ai, ela bona dina ta laolaona hegeregerena taruha kahana ai, bona ma kahana ai danu dina ta laolaona hegeregerena, tano daenai kiubit rua^g hegeregerena.

³²Bena taruha taudia e tore isi, kibi na e haboudia boi, e haboudia rani, ma dina iharuana ai e haboudia boi; e habou maraği tauna

^f 11.21 Domaga tauratoi: 600, 000. ^g 11.31 Kiubit rua = 88 centimetres sisivana.

ese homere gwauta^h e haboudia. Bena edia kalaga badibadidiai e hakaukaudia. ³³A vamu na dounu ududia ai, do asie hadonoa, Iehova ena badu na ediai e siahu; bena ia ese dai-hanai gorereña dikana ta idia latadiai e siaia. ³⁴Taunabunai, una gabu ladana e hatoa Kibroto-hatava;ⁱ badina be unuseni ai gado esee abidia taudia na e guridia. ³⁵Kibroto-hatava amo eha laolao, ela bona Haseroto ai e kau; unuseni ai e taruha.

Aaron bona Miriama edia Maumau

12 ¹Aaron bona Miriama ese Mose e maumaurai, ia adavana hane Kusu dainai, badina be ia ese Kusu hahinena vada e adavaia. ²Idia eto, Iehova na Mose mo sibona uduna amo vada e hereva a? Eiava ai danu udumai amo vada e hereva? Iehova ese edia hereva e kamoni. ³Hari Mose na tanobada taudia iboudiai bogaragidiai ia mo sibona manau herea. ⁴A Iehova ese Mose bona Aaron bona Miriama e hereva henidia taku, eto, Umui tatoiosi a raka lasi, hebou kalagana baoma. Bena tatoiosi ela. ⁵Bena Iehova na ori dubuna ai e diho, hebou kalagana vairanai e gini, Aaron bona Miriama e boiridia, bena raruosi e raka henia kahi. ⁶Ia eto, Egu hereva a kamoni: daika umui bogaragimui ai be peroveta tauna, lau ese mata-hanai ai baina hahedinarai henia bona nihi ai baina hereva henia. ⁷A egu hesiai tauna Mose na dia unuheto; ia na egu bese ireguna tauna. ⁸Ia ida baia hereva-hereva hedinarai, lau udugu amo, ia uduna amo; basia hereva hehuni. Iehova oromana danu ia ese matana amo baine itaia. Edeheto umui raruosi na egu hesiai tauna Mose imaumauraina asio garimu?

⁹Iehova ena badu e siahu gāgāgara unu raruosi ediai, bena ia ese e rakatanidia. ¹⁰ori ese hebou kalagana e daetania negana ai, Miriama vada e lepra, kopina vada e kuroka-kuroka, *snow* na heto. Aaron ese Miriamae haḡerea, e itaia vada e lepra. ¹¹Bena Aaron ese Mose e hereva henia eto, Ġauka e, ai vada a kara kava, vada a kara dika; mani emu kara emai dika davana basio henimai, ¹²Ina hahine na basine noho mase hahinena na heto, eiava sinana bogana amo e vara mai dikana kekenina na heto. ¹³Bena Mose ese Iehova e noia, eto, Dirava e, lau na noimumu, ba hamauria. ¹⁴A Iehova ese Mose e haere henia, eto, Tamana ese vairana bema kanudia, ia na mai hemaraina ida bema noho ela dina hitu bema ore, ani? Benaini, ia be dina hitu taruha murimurinai baine noho, bena ma bae hakaua vareai.

¹⁵Taunabunai, Miriama na taruha murimurinai e nohova ela bona dina hitu e ore; bona Israel taudia na edia laolao asie matamaia lou ela bona Miriama na taruha lalonai ma e hakaua vareai. ¹⁶Una murinai idia ese Haseroto e toretania, ela, Paran tano-gāgaena ai e taruha.

^h 11.32 Homere gwauta = 3700 litres. ⁱ 11.34 “Kibroto-hatava” anina be “Gado-mase taudia edia gara”.

Hasinadoa taudia

13 ¹Iehova ese Mose e hamaoroa, eto, ²Hasinadoa taudia haida ba siaidia, Kanaan tanona, lau ese Israel taudia baina henidia tanona, baela. Iduhu ta ta amo ta ta ba siaidia, a lohia taudia mo bavabidia. ³Bena Mose ese Paran tano-ḡaḡaena amo e siaidia, Iehova ena hahedua heḡereḡerena; iboudiai na Israel lohiadia. ⁴Ladadia bini: Ruben iduhuna amo, Samua Sakuru; ⁵Simeon iduhuna amo, Safata Hori; ⁶Iuda iduhuna amo, Kaleb lefune; ⁷Isakara iduhuna amo, Igala Iosef; ⁸Efraim iduhuna amo, Hosea Nunu; ⁹Beniamina iduhuna amo, Palti Rafu; ¹⁰Sebulun iduhuna amo, Gadiel Sodi; ¹¹Manase Iosef iduhuna amo, Gadi Susi; ¹²Dan iduhuna amo, Amiele Gemali; ¹³Asere iduhuna amo, Seturu Mikael; ¹⁴Napatali iduhuna amo, Nabi Vopsi; ¹⁵Gad iduhuna amo, Gevele Maki. ¹⁶Hasinadoa taudia Mose ese e siaidia, Kanaan baela, ladadia bunu. A Mose ese Hosea Nunu ladana e nemaia Iosua.

¹⁷Taunabinai, Mose ese e siaidia, Kanaan tanona bae ha itaia. E haḡanidia, eto, Diho kahana amo baola ela bona ororo gabudia. ¹⁸Ba itaia, tano be edeheto, bona tano taudia be edeheto, gogoada eiava mamananoka, hutuma eiava gagadoi; ¹⁹ba itaia danu, e noholaiamu tanona edeheto, namo eiava dika, bona edia hanua be edeheto, taruha mo eiava hanua mai maḡudia. ²⁰Ba itaia danu, edia biru gabudia be edeheto, namo eiava dika, bona au be mimia eiava. Ba goada: tano anidia taidia ba loulai. Una negana be vine e huahua matama negana.

²¹Taunabunai idia na ela, e hasinadoa, Sin tano-ḡaḡaena amo ela bona Rehob, Hamat dalana ai. ²²Diho kahana amo ela, Heberon ai e kau; unuseni ai Ahiman bona Sesai bona Talmi, Anak garana, e nohova. Una Heberon e haginia murinai laḡani hitu vada ela bena Soan e haginia Aigupto ai.

²³Bena Eskol^j kourana ai e kau, unuseni ai vine rigina ta e utua, mai vine huahuana tako ta; tatau rarua ese au ai e huaia. Rimono(, huahuadia haida bona suke huahuadia haida danu e gogo, e hua. ²⁴Una gabu ladana e hatoa Eskol kourana, badina be Israel taudia ese vine takona unuseni ai e utua dainai.

²⁵Dina hari-ahui e ore, bena edia hasinadoa amo e lou ema, ²⁶Mose bona Aaron bona Israel oreana taudia iboudiai dekediai e kau, Kade ai, Paran tano-ḡaḡaena ai. Bena tano sivaraina e hamaorolaidia, bona tanoanidia e haheitalaidia. ²⁷Idia eto, O siaimai baia lao henia tanona ala, ia na rata bona bada-ranuna e arumu tanona; tano huahuadia haida bini. ²⁸To, una tano taudia na gogoada, edia hanua danu babada heherea bona mai maḡudia; Anak garana danu a itadia unuseni ai. ²⁹Diho kahana

^j 13.23 “Eskol” anina be “Tako ta”. “Rimona” bona “suke” na au huahua ladadia.

ai Amalek taudia e nohomu; ororo gabudia ai Hiti taudia bona Iebusu taudia bona Amoro taudia e nohomu; a kone ai bona Ioridane sinavaina isena ai Kanaan taudia na e nohomu.

³⁰Bena Kaleb ese taunimanima e tuidia; bena ia ese Mose e hereva henia, eto, Aitala, una tano baita abia; badina be ita na mai goadada, baita abia diba. ³¹A ia ida ela taudia eto, Una tano taudia basita tuari henidia diba, badina be idia na gogoada, ita na mamanoka. ³²Taunabunai, idia ese edia hasinadoa Israel taudia e hamaorolaidia na hari dikana mo e gwauriaia, eto; Una itana totona ala tanona na taunimanima ihamasedia tanona, bona unuseni ai a itadia taudia iboudiai na babada heherea. ³³Unuseni ai taunimanima gaḡau-babadadia a itadia, Anak garana, Nefili taudia amo evara besena. Ai na a laloa ai na kwadi na heheto, idia vairadiai, bona idia danu unu e itamai toma.^k

Israel taudia e taitaiva

14 ¹Bena hebou taudia iboudiai e tai: Israel idoinai e tai rani. ²Israel taudia iboudiai ese Mose bona Aaron e maumauraidia; hebou idoinai ese e gwau henidia, eto, Aigupto ai baiama mase eiava ina tano ḡaḡaena ai baiama mase bema namo. ³Namona be dahaka Iehova ese una tano ai baine hakaumai vareai? Unuseni ai ai na dare amo bae alamai mase, bona adavamai, bona, natumai bae abidia mauri. Aigupto baia lou henia hari namo, ani?

⁴Bena sibodia e hereva heheni, eto, Biaguda ta baita abia hidi, Aigupto baita lou lao. ⁵Bena Mose bona Aaron na Israel taudia loḡora edia hebou vairanai e goru diho; ⁶bona Iosua Nunu bona Kaleb lefune, hasinadoa taudia rarua, na edia dabua e dare, ⁷Israel oreana idoinai e hamaorodia, eto, Una tano, ai ala a hasinadoa tanona, na tano namo-hereana. ⁸Iehova ese baine lalo namo henida, ia ese una tano ai baine hakauda vareai, baine henida; oibe, hari rata bona bada-ranuna e arumu tanona ia ese baine henida. ⁹Ḡau tamona, Iehova basio inai henia, bona una tano taudia garidia basio gari. Idia na ita ada aniani na heto. Idia na asi igimadia; a Iehova na ita ida. Basio gari henidia.

¹⁰A hebou taudia iboudiai ese nadi amo bae hododia eto. Bena Iehova diaridiarina na hebou kalagana ai e hedinarai, Israel taudia iboudiai vairadiai. ¹¹Bena Iehova ese Mose e hereva henia, eto, Ini taunimanirna na bae dadaraigu ela bona edena nega ai? Toa iboudiai vada na henidia ore. Edena nega ai bae abidadama henigu? ¹²Lau na dai-hanai gorereana amo baina habuadiatari. Idia na lau dihigu ai basielala. Oiemu amo bese ta, idia baine hereadia besena, baina havarai.

¹³Bena Mose, ese Iehova e haere henia, eto, Unu baine heto, Aigupto taudia na bae kamona; badina be oi ese ina bese taudia na idia

^k 13.33 “Kibroto-hatava” anina be “Gado-mase taudia edia gara”.

bogaragidia amo e hakaudia lasi mai siahumu ida. ¹⁴Bena idia ese ina tano taudia bae hamaorodia. Ina tano taudia na vada e kamona oi na ina bese bogaraginai o nohomu, idia ida o hevaira hehenimu, oiemu ori amo o gorudia taomu, bona edia laolao ai o gunalaidiamu, dina ai ori dubuna amo bona hanuaboi ai lahi mamana amo. ¹⁵A harihari oi ese ina bese taudia boma habuadia ore, hari oi harimu e kamona besedia na baeto ¹⁶“Iehova na asi siahuna ina bese na e gwaurai henidia hamata tanona ai baine hakaudia vareai; una dainai ia ese .tano gāgaena ai vada e habuadia ore”. ¹⁷Taunabunai, lau I na noimumu, Gāubada ena siau do baine herea, emu gwau-hamata hegeregerena, oto: ¹⁸Iehova ena badu e halahemu, ena hebogahisi e hesiriumu; ia ese kara dika bona kara havara e gwau taomu; gāu tamona, kara dika taudia na basine kahudia nege, a tama edia kara dika davadia na natudia bona tubudia baine henidia, ela bona uru ihatoina bona ihahanina. ¹⁹Lau na noimumu, emu hebogahisi na bada herea dainai ina bese taudia edia kara dika do ba gwau tao, Aigupto amo ema bona ina gabu ai edia kara dika vada o gwau tao hegeregerena.

²⁰Bena.Iehova eto, Baina bogadia hisi, emu noinoi hegeregerena. ²¹A momokani, lau na maurimu hegeregerena bona Iehova hairaina ese tanobada baine hahonua hegeregerena, ²²ini taunirnanima iboudiai ese lau hairaigu vada, e itaia, bona toa idau-idau Aigupto ai bona tano gāgaena ai vada eitadia, to nega, gwauta vada e dibaiganigu bona eregu asie kamona dainai, ²³idia ese senedia na gwaurai henidia hamata tanona na basie itaia; momokani, vada e dadaraigu taudia ta ese basine itaia. ²⁴A egu hesiai tauna Kaleb, laumana na idau bona eme badinagu mai lalona idoinai dainai, ia be baina hakaua vareai, hari itana ela tanona lalonai; bena ia garana ese bae abia, edia tano. ²⁵A harihari, Amalek, taudia bona Kanaan taudia na koura ai e nohomu dainai umui be kerukeru ba lou, tano gāgaena baola, Davara Kakakakana kahana ai.

²⁶Bena Iehova ese Mose bona Aaron e hereva henidia, eto, ²⁷Ina orea dikana ese lau bae maumauraiгу ela bona edena nega ai? Israel taudia edia hereva, lau e maumauraiгumu herevadia, vada na kamona. ²⁸Ba hamaorodia, baoto: Iehova na e tomu “Lau na maurimu dainai, emui hereva lau vada na kamona hegeregeredia unu baina karamui toma; ²⁹ina tano gāgaena ai vada ba mase. Umui iboumui bogaragimui ai, laḡani ruahui vada e hanai bona vada e maumauraiгу taudia. ³⁰ta na lau ese na gwaurai henimui hamata ba noholaia nato tanona na basine raka vareai, a Kaleb lefune bona Iosua Nunu, idia raruosi mo baeiraka vareai. ³¹A natumui maragidia, umui o tomu bae abidia mauri, na lau ese baina hakaudia vareai, umui ese vada o dadaraia tanona na idia ese bae itaia. ³²A umui be ina tano gāgaena ai do ba mase. ³³Natumui ese laḡani hari-ahui tano gāgaena aiedia mamoe bae reḡudia, emui kara havara

hisidia bae ani, ela bona umui tau-animui bae pata vaitani tano gāgāena ai. ³⁴O hasinadoa dinadia hari-ahui ihahegeregeredia, laḡani hari-ahui emui kara havara hisidia bavani, dina ta ta, davadia laḡani ta ta hisidia bavani. ³⁵Lau Iehova vada na hereva: momokani, ina orea dikana, lau e inai henigumu oreana, na unu baina karadia toma. Ina tano gāgāena ai taudia bae manori, bona ina tano gāgāena ai bae mase.”

³⁶Hari hasinadoa taudia, Mose ese tano itana e siaidia, bena e lou negana ai tano harina dikana amo hebou taudia iboudiai e haherou-heroudia bena Mose e maumauria, ³⁷taudia bunu, tano harina dika e gwauraia taudia, na dai-hanai gorereana ta ese e hamasedia ore, Iehova vairanai. ³⁸A Iosua Nunu bona Kaleb lefune na e mauri, hasinadoa taudia iboudiai idia raruosi mo e mauri.

³⁹Mose ese ini hereva na Israel taudia e hamaorolaidia negana ai, idia na lalodia e hisihisi bada. ⁴⁰Daba maraḡi ai, idia na e tore isi, ororo dorina ela, eto, Ame itamai, ai na iniseni ai, Iehova ese vada e gwaurai henimai hamata tanona hari aiala; badina be ai na vada a kara havara. ⁴¹A Mose eto, Dahaka dainai Iehova ena haheḡani harihari o tataia utumu? Basio kwalimu diba. ⁴²Basiola, inaimui ese bae hadareremui na garina; badina be Iehova ese se barnomuimu. ⁴³Amalek taudia bona Kanaan taudia na vairamui ai; bena edia dare ai ba mase; Iehova ena dala vada o rakatania dainai Iehova ese basine bamomui.

⁴⁴A edia hekokoroku ai e raka lao, ororo dorina arno ela; ḡau tamona, Iehova ena taravatu mauana na taruha ai mia, Mose danu taruha ai noho. ⁴⁵Bena Arnalek taudia bona Kanaan taudia, unu ororo ai e nohova taudia, na ema, e hadareredia, e havadia lao, ela bona Horoma.

Boubou Taravatudia

15 ¹Iehova ese Mose e hamaoroa, eto, ²Israel taudia ba hereva henidia, baoto: Baina henimui ba noholaia tanona ai ba kau, ³beno boromakau ta eiava mamoe ta ba hahelaḡaia Iehova ena, ḡole-oho boubouna eiava gwau-hamata boubouna eiava lalo-namo boubouna eiava aria ta boubouna, bonana namo ḡauna Iehova ena; ⁴una negana ai boubou baine heni tauna ese flaoa namo-hereana efa¹ ta baine karoaia, karoa gwauta, karoa ta baine abia, bona dehoru hini ta baine karoaia, karoa hani, karoa ta baine abia; bena flaoa bona dehoru baine bulodia. ⁵Inuinu boubouna danu bavabia: vine ranuna hini ta ba karoaia, karoa hani, bena karoa ta ba heni; ḡole-oho ḡauna eiava gwau-hamata ḡauna eiava lalo-namo ḡauna ida. ⁶Eiava mamoe maruanena ta ba hahelaḡaia, flaoa namo-hereana efa ta ba karoaia, karoagwauta, bena karoa rua bavabi, bona dehoru hini ta ba karoaia, karoa toi, bena karoa ta bavabia;

¹ 15.4 “Efa” bona “Hini” na Heberu taudia edia hahetoho ḡaudia.

bona flaoa bona dehoru ba bulodia. ⁷Inuinu boubouna danu ba heni; vine ranuna hini ta ba karoaia, karoa toi, bona karoa ta bavabia, bonana namo ḡauna Iehova ena. ⁸Eiava boromakau maruanena ta bavabia heḡaeḡae, emu ḡole-oho boubouna eiava emu lalo-namo boubouna eiava emu gwau-hamata boubouna eiava emu herohemaino boubouna ai bahalaoa, Iehova ena; ⁹boromakau maruanena ida baine heni ḡaudia bini: flaoa namo-hereana efa ta baine karoaia, karoa gwauta, bona karoa toi baineabi, bona dehoru hini ta baine karoaia, karoa rua, bona karoa ta baine abia; bona flaoa bona dehoru baine bulodia. ¹⁰Inuinu boubouna danu ba heni: vine ranuna hini ta ba karoaia, karoa rua, bona karoa ta bavabia, lahi boubouna ai ba halaoa, bonana namo ḡauna Iehova ena.

¹¹Boromakau mamaruanedia ta ta ida, bona mamoe mamaruanedia ta ta ida, bona mamoe natudia mamaruanedia ta ta ida, bona nani natudia ta ta ida, unu ba heni toma. ¹²Mauri ḡaudia hida bavabidia heḡeḡae, unuhohodia mo unu ba heni toma. ¹³Israel taudia korikori na una dala amo bae ḡaukara, edia boubou ḡaudia lahi ai bae ato kau negadia ai; unu hetomana bonana namo ḡaudia ai baela, Iehova ena. ¹⁴Bona idau bese tauna eiava bogaragimui ai e noho hedoamu tauna, emui uru iboudiai lalodiai, baine ura bonana namo ḡauna lahi ai baine gabua Iehova ena, ia ese umui o karaiamu heḡereḡerena ma baine karaia. ¹⁵Emui hebou ai taravatu baine tamona, umui emui, bona idau tauna bogaragimui ai e noho hedoamu ena; taravatu tamona, baine mia hanaihanai taravatuna, emui uru iboudiai lalodiai. Umui bona noho-hedoamu tauna na heḡereḡere, Iehova vairanai. ¹⁶Taravatu be tamona bona haheḡani be tamona, umui latamui ai bona bogaragimui ai e noho hedoamu tauna latanai.

¹⁷Iehova ese Mose e hamaoroa, eto, ¹⁸Israel taudia ba hereva henidia, baoto: Baina hakaumui vareai tanona ai ba kau ¹⁹bona una tano anina bavani matama negana ai, emui herahia ḡaudia ba dudui isi Iehova vairanai. ²⁰Emui flaoa matamatana amo ataga ta ba dudui isi, Iehova vairanai, emui uit ikwadina gabuna amo emui herahia ḡauna o dudui isi heḡereḡerena. ²¹Uru iboudiai lalodiai, emui flaoa matamatana amo emui herahia ḡaudia ba dudui isi, Iehova vairanai.

²²Boma kerere, ini haheḡani iboudiai, Iehova ese Mose vada e henia ḡaudia, basioma badinadia, ²³Iehova ese Mose uduna amo vada e henimui, e heni matama ema bona uru idoidiai lalodiai ma e heni loulou haheḡanidia, ²⁴ibadinadia ai boma kerere, a hebou taudia asi dibadia: hebou idoinai ese boromakau natuna maruanena ta bae heni, ḡole-oho boubouna ai baehalaoa, bonana namo ḡauna Iehova vairanai. Ena flaoa boubouna bona ena inuinu boubouna danu ia ida bae heni, taravatu heḡereḡerena, bona nani maruanena ta danu bae heni, kara-dika iabi-ohona boubouna. ²⁵Bona hahelaḡa tauna ese Israel oreana taudia iboudiai daidiai herohemaino karana baine karaia, unu amo edia dika

bae hegway tao; badina be vada e kerere; to edia boubou na Iehova vada e henia, gōle-oho boubouna bona kara-dikaiabi-ohona boubouna, edia kerere dainai. ²⁶Bena hebou idoinai, Israel taudia bona bogaragidiai e noho hedoamu taudia na, edia dika bae hegway tao, badina be iboudiai na una kara dika ese vada e hakereredia.

²⁷Tau ta baine kara rea, ia ese ena kara-rea iabi-ohona boubouna baineheni, nani hahinena ta, laḡani tamona ḡauna. ²⁸Hahelaḡa tauna ese kerere tauna ena kara rea dainai herohemaino karana baine karaia, Iehova vairanai; unu amo ena dika baine hegway tao. ²⁹Kara rea taravatuna baine tamona, Israel tauna korikori ena bona noho-hedoa tauna ena. ³⁰A Israel tauna korikori eiava noho-hedoa tauna na hekokoroku dainai baine kerere, ia be Iehova se matauraiaimu. Ena bese amo bae neḡea daure; ³¹badina be ia ese Iehova ena hereva vada e dadaraia bona ena taravatu vada e tataia utu, una dainai ia na bae neḡea daure. Ena kara dika na basine hegway tao.

Dina Helaḡa Taravatuna

³²Israel taudia na tano ḡaḡaena ai e nohova ai, idia ese tau ta e itaia, dina helaḡa ai au rakuraku e gogodia. ³³Bena au rakuraku igogodia ai e davarua taudia ese e hakaua lao, Mose bona Aaron bona hebou taudia iboudiai vairadiai. ³⁴Bena idia ese e ḡuia, badina be lalodia asie parara ede.bae karaia toma. ³⁵Bena Iehova ese Mose e haduaia, eto, Aine mase; hebou taudia iboudiai ese bae hodoa mase, taruha murimurinai. ³⁶Taunabunai hebou taudia iboudiai ese e hakaua lao, taruha murimurinai, bena idia ese nadi amo e hodoa mase, Iehova ese Mose e haḡania heḡereḡena.

Helalo Toadia

³⁷Iehova ese Mose e hereva henia, eto, ³⁸Israel taudia ba hamaorodia, edia uru iboudiai lalodiai edia dabua rimudia bae kara, edia dabua daigunidia ai; bona daiguni ta ta rimudia ai varo vaiurina ta ta bae turi kau. ³⁹Bena emui dabua rimudia ba itadia negadia ai Iehova ena haheḡani ba lalodia tao bona ba badinadia; sibomui lalomui bona matamui edia ura basio badinadia, basio halebulebu, ⁴⁰a egu haheḡani iboudiai ba lalodia tao bona ba badinadia, bona ba helaḡa, emui Dirava ena. ⁴¹Lau binai Iehova, emui Dirava; Aigupto amo na hakaumui lasi, emui Dirava ai bainala helaoreana. Lau binai Iehova, emui Dirava.

Kora ena gwau-edeede

16 ¹Kora Isahara, Kohat Levi tubuna, bona Datan Eliab, bona Abiram Eliab, bona Onu Pelete, Ruben iduhuna tauna, hahaniosi e heḡaeḡae; ²benā e tore isi, Mose dekena ela, idia bona orea lohiadia

sinahu-rua imahui, hebou ese e abidia hidi taudia, iboudiai na mai haridia taudia. ³Idia na Mose bona Aaron vairadiai e hebou, e heai henidia, eto, Umui raruosi na o hekokorokumu; badina be hebou taudia iboudiai na hehelaḡa; oibe, ibouboudiai, bona Iehova na bogaragidiai e nohomu. Dahaka dainai umui raruosi ese Iehova ena orea taudia o lohiadiamu?

⁴Mose ese una hereva e kamoni, bona ia na tano ai e goru diho. ⁵Bena ia ese Kora mai ena orea taudia ida e hamaorodia, eto, Daba ai Iehova ese baine hahedinaraia, daika be iena, bona daika na helaḡa, bona daika na ienai baine kahi lao; bona baine abia hidi tauna ese baine raka henia kahi. ⁶Ini ba kara toma: oi Kora, bona emu orea taudia iboudiai, na gida keberedia helaḡadia bavabi; ⁷bona kerukeru gida ba uda, bona muramura mai bonadia na gida latadiai bavato kau, Iehova vairanai; bona Iehova ese baine abia hidi tauna na baine helaḡa. Levi taumui, umui hari o hekokorokumu.

⁸Mose ese Kora ma e hereva henia, eto, Umui Levi taumui ese egu hereva: a kamoni. ⁹Israel Diravana ese umui vada e abimui hidi Israel oreana taudia bogaragidia amo, ba raka henia kahi, Iehova ena dubu ai ba ḡaukara, bona hebou taudia vairadiai ba gini, iena hesiai taudia. Una na ḡau pipikina a? ¹⁰Ia ese vada e boirimui, umui bona varavaramui Levi taudia iboudiai, ia ba raka henia kahi. Be, hahelaḡa dagina danu o tahuamu a? a ¹¹Matona, oi bona emu orea taudia iboudiai vada o hebou, Iehova vada o heai henia. Aaron be daika, umui ese ia o maumauraiamu a?

¹²Bena Mose ese Datan Eliab bona Abiram Eliab e boiridia. A idia eto, Ai na basia vasi. ¹³Rata bona bada-ranuna e arumu tanona amo vadao hakaumai lasi, tano ḡaḡaena ai baia mase dahaka, harihari emai pavapava ai baola o tomu. Una na ḡau pipikina a? ¹⁴Ina danu, rata bona badaranuna tanona ta ai asio hakaumai vareai, uma bona vine imeadia asio henimai, ai ahumai. Ini taunimanima na matadia ba hakepuludia a a Ai na basia vasi.

¹⁵Mose na e badu dikadika, Iehova e noia, eto, Edia boubou basio abi dae. Lau be edia doniki ta asina dadia, bona idia ta asina hadikaia. ¹⁶Bena Mose ese Kora e hamaoroa, eto, Kerukeru emu orea taudia ida baoma, Iehova vairanai ba gini, oi bona emu orea taudia bona Aaron. ¹⁷Emui gida keberedia helaḡadia danu bavabi kau, muramura mai bonadia ba uda; ta ta ena kebere ena kebere bae mailaidia Iehova vairanai, kebere helaḡadia sinahu-rua imahui. Oi danu emu ba mailaia. Aaron danu ena baine mailaia.

¹⁸Taunabunai, idia na ta ta ena kebere ena kebere e abi, gida e uda, bona muramura mai bonadia gida latadiai; bona hebou kalagana iduarana ai e gini, Mose bona Aaron ida. ¹⁹Bena Kora ese orea idoinai

e haboudia idia vairadiai, hebou kalagana iduarana ai. Bena Iehova diaridiarina e hedinarai, hebou taudia iboudiai ese e itaia.

²⁰Bena Iehova ese Mose bona Aaron e hamaorodia, eto, ²¹Ena hebou amo ba raka siri, bona baina habuadia tari. ²²Bena idia na tano ai e goru goru :diho, eto, Dirava e, taunimanima iboudiai laumadia Diravana, tau tamona baine kara dika dainai ina hebou idoinai ba badu henidia a? ²³Bena Iehova ese Mose ma e hamaoroa, eto, ²⁴Hebou taudia ba hamaorodia, Kora bona Datan bona Abiram edia kalaga amo bae raka oho.

²⁵Bona Mose e tore isi, Datan bona Abiram dekedia ela; Israel tau-badadia ese e ġavaia. ²⁶Bena ia ese hebou taudia e hamaorodia, eto, Ene kara havara taudia edia kalaga amo ba raka oho, bona edia ġau ta basio daua toho, idia edia dika ai ba dika na garina. ²⁷Taunabunai, idia na Kora bona Datan bona Abiram edia kalaga amo e raka siri. Bena Datan bona Abiram e raka lasi, idia bona adavadia bona natudia badadia bona natudia maraġidia, edia kalaga iduaradia ai e gini. ²⁸Bena Mose eto, Ini amo ba diba, Iehova ese vada e siaigu, ini ġaukara iboudiai ikaradia totona; dia lau sibogu asina kara. ²⁹Ini tatau be taunimanima iboudiai vaevae edia mase dalana ai bema mase, bona taunimanima iboudiai vaevae edia dika dalana ai bema dika, ba diba Iehova ese se siaigu. ³⁰A Iehova ese kara matamatana ta bema havaraia, tano uduna bema hahaġaia idia bona edia ġau iboudiai bema hadonodia, mauridia ai mase taudia edia gabu ai bema diho, vada ba diba idia ese Iehova vada e dadaraia.

³¹Ena hereva e doko ai, idia henudia tanona e parara; ³²tanobada ese uduna e hahaġaia bona e hadonodia, mai edia ruma taudia ida, bona Kora ena orea taudia iboudiai mai edia kohu ida. ³³Taunabunai, idia mai edia orea idoinai na mauridia ai mase taudia edia gabu ai e diho. Tano ese e habubunidia, hebou taudia bogaragidiai e mase ore. ³⁴Bena Israel taudia, e ginidia heġeġe taudia, ese edia tai lolololo e kamona ai, e heau karoho; eto, Tano ese baine hadonoda na garina. ³⁵Bena lahi na Iehova ena amo e diho, hari tatau sinahu-rua imahuiosi, muramura maibonadia e gabu taudia, e aradia ore.

³⁶Bena Iehova ese Mose ma e hereva henia, eto, ³⁷Hahelaġa tauna Aaron natuna Eleasara ba hamaoroa, lahi bogaragina amo kebere helaġadia baine abidia lasi, gidadia baine bubu nege; badina be idia na hehelaġa. ³⁸Ene kara havara daidiai vada e mase taudia edia gida keberedia na hehelaġa: ba hododia severa-severa, ihaboulaina patana iġovana ġaudia aibaela, badina be Iehova vairanai e hahelaġadia, taunabunai idia na hehelaġa. Unu amo idia na toa ai baela, Israel taudia edia. ³⁹Taunabunai, hahelaġa tauna Eleasara hari auri labora-labora keberedia, lahi ese e aradia taudia edia kebere, e abidia, e hododia severa-severa, ihaboulaina patana iġovana,

⁴⁰bona helalo-tao toana, Israel taudia ese bae laloa tao, idau tauna ta, dia Aaron garana, na Iehova basine raka henia kahi, muramura mai bonana igabuna totona; Kora mai bamona ida heḡereḡeredia ai baela na garina. Iehova ese Eleasara unu e hamaoroa toma, Mose uduna amo.

⁴¹Kerukeru, Israel oreana taudia ibouboudiai ese Mose bona Aaron e maumauraidia, eto, Umui ese Iehova ena oreana taudia vada o aladia mase. ⁴²Ibouboudiai na Mose bona Aaron ialadia totona e hebou; bena e roha lao, hebou kalagana e itaia, ori ese vada e ḡoavaia ahu, bona Iehova diaridiarina vada e hedinarai. ⁴³Bena Mose bona Aaron na hebou kalagana iduarana amo e raka lasi. ⁴⁴Bena Iehova ese Mose e hamaoroa, eto, ⁴⁵Ene e heboumu taudia edia amo a raka siri; lau ese aina habuadia tari. Bena raruosi na tano ai e goru diho. ⁴⁶Bena Mose ese Aaron e hamaoroa, eto, Emu gida keberena bavabia, muramura mai bonadia gida ai bavato kau; ba laohaia haraḡa-haraḡa hebou taudia dekediai, idia daidiai herohemaino karana bakaraia; badina be badu na Iehova ena amo vada e kau, dai-hanai gorere vada e vara. ⁴⁷Bena Aaron ese kebere e abia, Mose ena hereva heḡereḡerena, bena e heau lao hebou taudia bogaragidiai. Dai-hanai gorere na vadae vara matama, taunimania ediai. Bena ia ese muramura mai bonadia na gida ai e ato kau, hebou taudia daidiai herohemaino karana e karaia. ⁴⁸Ia ese mase taudia bona mauri taudia padadai e gini; bena gorere vada e doko. ⁴⁹Gorere ese e hamasedia taudia na gerebu-ta daha-hani sinahu-hitu;^m a Kora ena kara havara dainai e mase taudia be ma idau. ⁵⁰Bena Aaron ese Mose e lou henia, hebou kalagaana iduarana ai Gorere vada e doko.

Aaron ena itotohi e gara kau

17 ¹Iehova ese Mose e haḡania, eto, ²Israel taudia ba hamaorodia, itotohi bae henimu, iduhu ta ta ikwaradia taudia ese edia itotohi ta ta bae henimu: itotohi iboudiai bae gwauta-rua. Itotohi ta ta ai iduhu ikwaradia taudia ladadia ta ta ba tore; ³bona Levi iduhuna taudia edia itotohi ai Aaron ladana ba torea. Iduhu ikwaradia taudia ta ta edia itotohi ta ta bavabi. ⁴Bena hebou kalagana ai bavatodia, taravatu mauana vairanai, ita raruosi ta hedavarimu gabuna ai. ⁵Bena vada na abia hidi tauna ena itotohi baine gara kau: unu amo Israel taudia baina tudia, oi imaumauraimu bae hadokoa.

⁶Taunabunai, Mose ese Israel taudia unu e hamaorodia toma. Bena edia iduhu ikwaradia taudia ese itotohi e henia, iduhu ta itotohi ta iduhu ta itotohi ta, unu e henia toma; itotohi iboudiai na gwauta-rua. Aaronena itotohi danu edia itotohi ida e heato bou. ⁷Bena Mose ese itotohi e abi, Iehova vairanai e atodia, taravatu mauana kalagana lalonai.

^m 16.49 Gerebu-ta daha-hani sinahu-hitu: 14,700.

⁸Kerukeru, Mose na taravatu mauana kalagana lalonai e raka vareai; bona Aaron ena itotohi, Levi iduhuna itotohina, e itaia, vada e gara kau bona vada e huahua, sakadaⁿ huahuadia vada e dobi. ⁹Bena Mose ese itotohi iboudiai na Iehova vairana amo e abidia, e laohaidia, Israel taudia iboudiai dekediai: idia ese e itadia, bona ta ta ena itotohi ena itotohi e abidia.

¹⁰Bena Iehova ese Mose ma e haġania, eto, Aaron ena itotohi bavatoa lou, taravatu mauana vairanai, toa ai baina ini gwau-edeede taudia ediai; unu amo ba tudia, lau e maumauraigumu herevadia bae hadoko, bae mase na garina. ¹¹Mose na unu e kara toma: Iehova ese e haġania heġereġerena, unu mo e kara toma.

¹²Bena Israel taudia ese Mose e hamaoroa, eto, A itaia, ai na vada a masemu, vada ame baia, iboumai ai vada ame baia. ¹³E raka kahiramu, Iehova ena dubu e raka henia kahimu, taudia iboudiai e masemu. Ai iboumai ai baia mase ore a?

Hahelaġa taudia bona Levi taudia ahudia

18 ¹Iehova ese Aaron e hereva henia, eto, Kerere gabu helaġana ai bae vara na oi bona natumu bona emu iduhu taudia latamui ai; bona hahelaġa taudia edia kerere na oi bona natumu latamui ai. ²Varavaramu danu, Levi iduhuna taudia, tamamu ena iduhu taudia, na oi ida bae raka kahi mai, oi ida bae ġaukara hebou, bona oi isiaimu bae lao heni. Ġau tamona, oi mai natumu ida mo taravatu mauana kalagana lalonai ba ġaukara. ³Idia ese oi isiaimu bae lao heni, bona hebou kalagana ġaukaradia bae kara; a gabu helaġana kohudia basie raka henidia kahi, bona ihaboulaina patana basie raka henia kahi, idia bae mase bona umui ba mase na garina. ⁴Idia na oi bae durumu, hebou kalagana inarina ai bona ena ġaukara iboudiai ikaradia ai: idau iduhu tauna ta basine raka henimui kahi. ⁵A umui ese gabu, helaġana ġaukaradia bona ihaboulaina patana ġaukaradia ba kara; unu amo badu na Israel taudia latadiai basine kau lou. ⁶O itaia, varavaramui Levi taudia na Israel taudia bogaragidia amo vada na abidia hidi, vada na henimui, Iehova ena, hebou kalagana ġaukaradia bae kara. ⁷A oi mai natumu ida na hahelaġa taumui; ihaboulaina patana ġaukaradia iboudiai bona seseahu lalonai e karamu karadia, iboudiai na umui ese ba kara. Lau isiaigu ba lao heni; hahelaġa dagina lau ese vada na henimui. Idau tauna ta baine raka kahira, ia na baine mase.

⁸Iehova ese Aaron ma e hamaoroa, eto, A itaia, egu dudu-isi bouboudia vada na henimu: Israel taudia ese e hahelaġadiamu ġaudia iboudiai na vada na henimu; vada e horomui dainai oi vada na henimu

ⁿ 17.8 "Sakada" be Heberu taudia edia au huahua ta.

bona natumu vada na henidia, oi ahumu bona idia ahudia, ela bona hanaihanai. ⁹Gau helaḡadia Iahi bouboudia amo bavabi ḡaudia bini: edia herahia ḡaudia iboudiai; edia flaoa bouboudia iboudiai; edia kara-dika iabi-ohodia bouboudia iboudiai; edia kerere iabi-ohodia bouboudia iboudiai; unu iboudiai bae helaḡa, oi amu bonanatumu adia. ¹⁰Gabu helaḡana ai bavani, mamaruanemui iboumu ai ese; ia na helaḡa, amui aniani. ¹¹Amu bini: bae dudui isi ḡaudia, bona Israel taudia edia davedave bouboudia iboudiai; oi vada na henimu bona natumu mamaruanedia bona natumu hahinedia vada na henidia, oi ahumu bona idia ahudia ela bona hanaihanai, asi mirodia taudia iboudiai emu ruma ai na bae ani diba. ¹²Dehoro namo-hereana bona vine ranuna namo-hereana bona uit namo-hereana bae mailai, edia uma anidia roboadia bona edia imea anidia roboadia Iehova bae henia, idoinai vada na henimu. ¹³Edia uma anidia roboadia bona edia imea anidia roboadia iboudiai, Iehova dekena e mailaidia ḡaudia, na oiamu; asi mirodia taudia iboudiai emu ruma ai na bae ani.

¹⁴Gwau-hamata daidiai Iehova bae henia ḡaudia Israel ai na oiemu. ¹⁵Mauri ḡaudia natudia roboadia iboudiai, taunimanima natudia bona ubu-ubu ḡaudia natudia, na Iehova bae henia, iboudiai na oiemu. Ḡautamona, taunimanima natudia roboadia bona ḡau mirodia natudia roboadia na davadia bae kara. ¹⁶Edia mauri huana tamona baine ore ai na davadia bae kara: davadia vada ba gwaurai, silver sekeledia, ima, gabu helaḡana ena sekele^o heḡereḡerena; una sekele lalonai gera na ruahui. ¹⁷A boromakau natuna roboana eiava mamoe natuna roboana eiava nani natuna roboana na davana basio karaia. Idia na hehelaḡa; raradia na ihaboulaina patana latanai ba nevaria, bona digaradia na ba haḡole oho, bonana namo ḡauna Iehova ena. ¹⁸A hidiodia na oiamu; kemena, e davea ḡauna, bona idiba mamuna na oiamu heḡereḡerena. ¹⁹Herahia helaḡadia, Israel taudia ese Iehova vairanai e dudui isimu ḡaudia, iboudiai name henimu, oiamu bona natumu mamaruanedia adia bona natumu hahinedia adia, umui ahumui ela bona hanaihanai. Ina, na herohemaino damenana Iehova vairanai, oiemu bona oi garamu edia, ela bona hanaihanai.

²⁰Iehova ese Aaron ma e hamaoroa, eto, Oi na emu inoḡo ta basio abia edia tano ai, bona ahumu ta basio abia idia bogaragidiai: lau na oi ahumu, oi na lau dihigu, Israel taudia bogaragidiai. ²¹Israel taudia edia ḡau e karoamu, karoa gwauta, bena karoa ta lau e henigumu, una karoa na Levi taudia; vada na henidiamu, idia ahudia, edia ḡaukara davana, hebou kalagana ai:lau, isiaigu lao henimu dainai. ²²Ina murinai, Israel taudia ese hebou kalagana: basie raka henia kahi, edia kara dika ai bae

o 18.16 “Sekele” bona “gera” na Heberu taudia edia hahetoho ḡaudia.

mase na garina. ²³A Levi taudia ese hebou kalagana ġaukaradia iboudiai bae kara; kerere ta bema vara, una kerere na idia latadiai. Ina taravatu na do baine hesiriu hanaihanai emui uru iboudiai lalodiai. Israel taudia bogaragidiai idia na asi ahudia. ²⁴Badina be hari karoa ihagwautadia, Israel taudia ese Iehova vairanai e dudui isi ġaudia, lau ese Levi taudia vada na henidia, idia ahudia; una dainai vada na hamaorodia, Israel taudia bogaragidiai idia na asi ahudia.

²⁵Bena Iehova ese Mose ma e hereva henia, eto, ²⁶Levi taudia na ba: hamaorodia, baoto: Israel taudia edia karoa ihagwautadia, umui ahumui vada na, henimui ġaudia, bavabi negadia ai na ene karoa ihagwautadia ma ba karoadia, karoa gwauta gwauta, bena karoa ta ta ba dudui isi, Iehova vairanai. ²⁷Bena, ene ba dudui isi ġaudia na emui boubou ġaudia ai baela, uit na emui roge amo eiava vine ranuna na emui vine amo boma dudui isi heġereġerena. ²⁸Unuhetomana umui na emui karoa ihagwautadia, Israel taudia e henimuimu ġaudia, na iboudiai ma ba karoadia, Iehova ena dudui isi boubouna na hahelaġa tauna Aaron ba henia. ²⁹Bae henimui herahiadia iboudiai amo emui boubou ġaudia ba dudui isi Iehova vairanai: namo-hereadia bona mai helaġadia karoadia mo ia ba henia. ³⁰Taunabunai ba hamaorodia, baoto: Karoa namona ba dudui isi, bena orena be Levi taudia adia, uit anina ikwadina gabuna amo bona vine ranuna itaolaina gabuna amo heġereġeredia. ³¹Una na amui aniani: gabu iboudiai bavania, umui bona emui ruma taudia, hebou kalagana ġaukaradia o karamu davana. ³²Bena namo-hereana na ba dudui isi dainai umui na ianina ai basio kerere. A Israel taudia edia ġau helaġadia na basio abi havara, ba mase na garina.

Miro taudia ihaġoevadia

19 ¹Iehova ese Mose bona Aaron e hamaorodia, eto, ²Iehova ena haheġani ta binai. Israel taudia ba hamaorodia, idia ese boromakau hahinena kakakakana ta, asi bebeka-bebekana, maduna ta paġana ai do asie atoa kau ġauna, bae mailaia dekemui ai. ³Hahelaġa tauna Eleasara ba henia; ia ese baine laohaia taruha murimurinai, bena tau ta ese ia vairanai baine alaia mase. ⁴Bena hahelaġa tauna Eleasara ese una boromakau rarana taina baine abia, nega hahitu imana kwakikwakina amo baine daveria, hebou kalagana vairanai. ⁵A boromakau tau-anina na ia vairanai bae haġolea oho, kopina bona hidiona bona rarana bona taġena. ⁶Bena hahelaġa tauna ese sida audia bona muramura avana bona dabua kakakakana na boromakau e ġolea ohomu lahina ai baine tahodia kau. ⁷Bena hahelaġa tauna ese ena dabua baine huri bona baine digu, bena taruha lalonai ma baine raka vareai, bona baine taubu ela bona dina baine diho. ⁸Boromakau e haġolea oho tauna danu ena dabua baine huri bona baine digu, bona baine taubu ela bona dina baine diho. ⁹Bena asi mirona

tauna ta ese boromakau kahuna baine haboua, taruha murimurinai baine atoa, gabu goevaḡoevana ta ai. Una kahu be baine mia, Israel oreana taudia edia. Idia ese ranu ai bae buloa, kara dika ihuri-ohona ḡauna. Ina na kara dikaboubouna ta. ¹⁰A hari boromakau kahuna e habouamu tauna ese ena dabua baine huri, bona baine taubu ela bona dina baine diho. Ina taravatu baine mia hanaihanai, Israel taudia latadiai bona bogaragidiai e noho hedoamu taudia latadiai.

¹¹Ta ese mase tauna baine daua toho, ia na baine taubu ela bona dina hitu bae ore. ¹²Dina ihatoina ai bona dina ihahituna ai ranu ai baine digu, unu amo baine ḡoeva. A dina ihatoina ai bona dina ihahituna ai basine digu, ia na basine ḡoeva. ¹³Ta ese mase tauna tau-anina bainedaua toho bona basine haheḡoeva, ia ese Iehova ena dubu baine hamiroa: Israel amo bae negea daure. Kara dika ihuri-ohona ranuna asie dairilaia dainai ia na miro; mirona na dounu mia enai.

¹⁴Tau ta ena kalaga ai baine mase taravatuna binai: una kalaga ai bae raka vareai bona una kalaga ai e nohomu taudia na bae taubu, ela bona dina hitu bae ore. ¹⁵Bona hodu, uro, nau asi ikaruhidia danu bae miro. ¹⁶Ta ese taruha murimurinai dare amo e alaia mase tauna, eiava e mase kava tauna, eiava tau ta turiana, baine daua toho, eiava gara ai baine dau kau, ia na baine taubu ela bona dina hitu bae ore. ¹⁷Bena taubu taudia ese hari kara-dika iabi-ohona boubouna kahuna taina bae abia, sinavai ranuna ida bae buloa dihu ta ai. ¹⁸Bena asi mirona tauna ta ese muramura avana baine abia, una ranu ai baine urua diho; bena kalaga, bona kalaga kohuna idoinai, bona kalaga taudia, bona turia e daua toho tauna, bona dare amo e alaia mase tauna e daua toho tauna, bona e mase kava tauna e daua toho tauna, bona gara ai e dau kau tauna, baine nevaridia. ¹⁹Asi taubuna tauna ese mai taubuna tauna baine nevaria, dina ihatoina ai bona dina ihahituna ai. Bena dina ihahituna ai ia na sibona baine haheḡoeva: ia na ena dabua baine huri bona baine digu, bena dina baine diho ai ia na baine ḡoeva. ²⁰A taubu tauna na unu basinema haheḡoeva toma, ia na hebou bogaragina amo bae negea daure, badina be ia ese Iehova ena gabu helaḡana vada e hamiroa; miro ihuri-ohona ranuna amo asie nevaria dainai ia na taubu.

²¹Edia taravatu bunai ela bona hanaihanai: kara dika ihuri-ohona ranuna baine nevarilaia tauna ese ena dabua baine huri; bona kara dika iabi-ohona ranuna ai baine dau kau tauna na baine taubu ela bona dina baine diho.

²²Taubu tauna ese baine daua toho ḡauna na baine miro; bona una ḡau ma baine daua toho tauna danu baine taubu ela bona dina baine diho.

Mose ese nadi hagahagana e botai

20 ¹Hua gini-gunana ai Israel taudia oreana idoinai na Sin tano-ḡaḡaena ai e kau, Kade ai e taruha. Unuseni ai Miriama e mase; idia ese una gabu ai e guria.

²Una gabu na asi ranuna, hebou taudia edia. Bena idia na e hebou, Mose bona Aaron e inai henidia. ³Idia ese Mose e gādegāde henia, eto, Varavaramai na Iehova vairanai e mase negana ai, ai danu baiama mase bema namo. ⁴Dahaka dainai ai Iehova ena oreā taumai na ina tano gāgāena ai vada; o hakaumai vareai? Ai baia mase bona emai ubu-ubu gaudia baemase totona a? ⁵Dahaka dainai Aigupto amo vada o hakaumai lasi, emā bona ina gabu dikana? Ina gabu na asi uitina, asi sukena, asi vinena, asi rimonona;^p inuinu ranuna danu lasi.

⁶Bena Mose bona Aaron na hebou taudia edia amo e raka oho, hebou kalagana iduarana ai e goru diho; bena Iehova diaridiarina e itaia. ⁷Iehova ese Mose e hamaoroa, eto, ⁸Itotohi bavabia, taunimānima ba haboudia, oi bona kakamu Aaron dekemui ai; bena vairadiai nadi hagahagana ba haḡania, ranu na iena amo baine aru lasi. Unu amo oi ese ranu na nadi hagahagana amo ba ha-arua lasi, hebou taudia ba henidia bona edia ubu-ubu gaudiaba henidia, bae inua. ⁹Bena Mose ese itotohi Iehova vairana amo e abia, ena haheḡani heḡereḡerena.

¹⁰Bena Mose bona Aaron ese hebou taudia e haboudia, nadi hagahagana vairanai; e gwau henidia, eto, Gwau-edeede taumui e, a hakala; emui ranuna ina nadi hagahagana amo baia ha-arua lasi a? ¹¹Bena Mose ese imanae duduia isi, nadi hagahagana na nega harua ena itotohi amo e botaia. Bena ranu na e aru lasi badabada; hebou taudia ese e inua, bona edia ubu-ubu gaudia.ese danu e inu. ¹²Bena Iehova ese Mose bona Aaron e gwau henidia, eto, Asio abidadama henigu dainai, bona Israel taudia vairadiai lau ladagu asio hahelaḡaia dainai, umui raruosi ese ina oreā taudia basio hakaudia vareai, lau ese vada na henidia tanona lalonai. ¹³Ina ranu na Meriba;^q badina be Israel taudia ese Iehova e gādegāde henia, bena ia ese ena siahu e hahedinarai henidia.

Edom pavapavana e daḡedaḡe

¹⁴Bena Mose ese gwaukau taudia Kade amo e siaidia, Edom pavapavana dekenai, bae hamaoroa, baeto “Tadimu Israel na ini e gwau tomamu: oi dibamu dahaka ḡau dahaka ḡau ese vada e butumai tao; ¹⁵senemai na Aigupto ela, bena nega daudau Aigupto ai a nohova; a Aigupto taudia ese ai bona tamamai e daḡedaḡe henimaiva. ¹⁶Iehova a tai heniava, bena ia ese emai taitai e kamōnai, aneru ta e siaia, Aigupto amo e hakaumai lasi, ama, emu tano hetoana ai a nohomu, Kade hanuana ai. ¹⁷Harihari ai a noimumu, emu tano amo baia raka hanai. Uma ta amo basia raka hanai, eiava vine imeana ta amo basia raka hanai, bona guri ranudia basia inu; Pavapava Dalana ai baia raka. Dala

^p 20.5 “Suke” bona “rimono” na Heberu taudia edia au huahua lalodia. ^q 20.13 “Meriba” anina be “Gādeḡade”.

amo basia raka siri, idiba kahana amo eiava lauri kahana amo, ela bona emu tano hetoana baia rakaia hanai.”

¹⁸Edom ese e haere henia, eto, Basio raka hanai, baina tuari henimu na garina.

¹⁹Israel taudia ese ma e noia, eto, Laolao dalana ai baia raka; emu ranu baia inua eiava emai ubu-ubu gaudia ese bae inu, ai na davana baia henimu. Aemai amo baia raka hanai, vadaeni.

²⁰A ia ma e haere, eto, Basio raka hanai. Bena Edom ese tuari oreana badana mai goadana e hakaua lasi, idia ilao-ahudia. ²¹Taunabunai Edom ese Israel taudia e laodia ahu, ena tano amo basie raka hanai. Bena Israel na idau dala amo ela.

Aaron e mase

²²Idia na Kade amo eha laolao, ela, iboudiai na Horo ororona ai e kau. ²³Bena Horo ororona ai, Edom ena tano hetoana ai, Iehova ese Mose bona Aaron e hamaorodia, eto, ²⁴Aaron na tubu tama dekediai baine hahebou; ia na Israel taudia vada na henidia tanona ai basine raka vareai, badina be ranu gabuna ai Meriba ai egu hereva o utua. ²⁵Aaron mai natuna Eleasara ida bavabidia, Horo ororona ai ba hakaudia dara. ²⁶Bena Aaron a ena dabua ba doki oho, ia natuna Eleasara ba hadokilaia. Aaron be unuse ai baine mase, tubu tama dekediai baine.

²⁷Bena Mose ese Iehova ena hahegani hegeregerena ai e karaia; hebou taudia iboudiai vairadiai idia tatoiosi na Horo ororona e dara dae. ²⁸Bena Mose ese Aaron ena dabua e doki oho, natuna Eleasara e hadokilaia. Bena Aaron na ororo dorina ai e mase, a Mose bona Eleasara na ororo amo e hekei diho. ²⁹Hebou taudia iboudiai ese e itaia Aaron vada e mase, bona Israel taudia iboudiai ese dina toi-ahui ai ia taina e taiva.

Gaigai

21 ¹Arada pavapavana, tau Kanaan, diho kahana ai e nohova, vada e kamoni Israel na Atarim dalana amo e maiva, bona ia ese e tuari henidia bona haida e abidia mauri. ²Bena Israel taudia ese Iehova e gwau henia hamata, eto, Ina bese be ai imamai ai ba henimai, bona ai ese edia hanua baia habuadia tari. ³Bena Iehova ese Israel taudia edia noinoi e abia dae, Kanaan taudia na idia imadia ai e henidia; bona idia ese una bese taudia e aladia ore bona edia hanua e habuadia tari. Taunabunai una gabu ladana e hatoa Horoma.^r

⁴Bena Horo ororona amo ma e laolao, Davara Kakakakana dalana amo e laova, Edom tanona murimurina amo bae raka hanai eto. A dala ai e hesiku, ⁵Iehova bona Mose e maumauridia, eto, Dahaka dainai Aigupto amo o hakaumai lasi,

^r 21.3 “Horoma” anina be “Hebua-tari”.

tano gāgaena ai baia mase helaoreana? Badina be asi amai; ranu danu lasi. A ina aniani gāuna dikana ianina vada ame hesiku. ⁶Bena Iehova ese hekori gaigaidia e siaidia, idia bogaragidiai; gaigai ese e koridia, bena Israel taudia hutuma e mase. ⁷Bena idia na Mose dekenā ela, eto, Ai na vada a kara havara, Iehova vada a maumaurāia, oi danu vada a maumauraimu: Iehova ba noia, ia ese ini gaigai na ai emai amo baine abidia oho. Taunabunai Mose na e gūrigūri, taunimanima daidiai. ⁸Bena Iehova ese Mose e hamaoroa, eto, Gaigai laulauna ta ba koroa, autubua dorina ai ba kapaia kau; bena gaigai ese bae koridia taudia ese bae raraia tao ai na vada bae mauri. ⁹Taunabunai, Mose ese gaigai laulauna ta, auri labora-labora amo e koroa, bona au-tubua dorina ai e kapaia kau, bena gaigai ese e koridia taudia ese una auri labora-labora gaigaina e raraiatao, bena vada e mauri.

Israel ma e laolao

¹⁰Israel taudia ma e laolao, Oboto ai e taruha. ¹¹Oboto ma e toretania, ela, Ieabarim ai e taruha, tano gāgaena ai. Una tano gāgaenana Moab e hevaira henia, mairiveina kahana ai. ¹²Ma e tore isi, ela, Serede kourana ai e tatuha. ¹³Unu amo ma ela, Aranon sinavaina unukahana ai e taruha; una na tano gāgaena ai, Amoro taudia edia tano isena ai. Hari Aranon sinavaina na Moab bona Amoro taudia edia tano hetoana. ¹⁴Una dainai Iehova ena tuari bukana ai vada e tore, eto,

Wahebe Sufa ai,

Bona Aranon kouradia ai;

¹⁵Koura ege-egedia

Ela bona Ara ena noho gabuna,

Bona Moab tanona hetoana.

Israel edia Ane

¹⁶Unu amo ma e laolao ela bona Bere: ranu gurina bunai Iehova ese e gwaurāia, Mose na e hamaorolaia, eto, Taunirnanima ba haboudia, lau ese ranu baina henidia. ¹⁷Bena Israel ese ina ane e abia:

Ranu e, a lohi lohi dae!

Ane avabia!

¹⁸Hanua pavapavadia ese guri e geia,

Hanua lohiadia ese e hadobua,

Dagi auna amo bona itotohi amo.

Una tano gāgaena amo ma e laolao, ela bona gabu ladana Matana;

¹⁹Matana amo ela bona Nahaliele; Nahaliele amo ela bona Bamoto;

²⁰Bamoto amo ela bona koura ta Moab kahana ai; ma unu amo ela bona Piga ororona dorina: unu amo tano gāgaena e roha tari lao.

Israel ese Sihon bona Og e hadareredia

²¹Israel ese gwaukau taudia e siaidia, Sihon, Amoro pavapavana, dekenai, eto, ²²Mani emu kara emu tano amo baia raka hanai. Basia

raka siri, uma ai eiava vine imeana ai basia raka vareai; guri ranudia danu basia inu. Pavapava Dalana amo baia raka, ela bona emu tano amo baia raka lasi. ²³A Sihon ese Israel taudia e gwaudia tao, ena tano amo basie raka hanai eto. Ena ore a taudia iboudiai e haboudia, tano gāgaena ela, Israel taudia ilao-henidia totona; bona Iahasa ai e tuari henidia. ²⁴A Israel taudia ese dare amo e alaia mase, ena tano idoinai e abia, Aranon sinavaina amo ela bona Iabok sinavaina ela bona Amono taudia edia tano; a Amono taudia ese edia tano hetoana e ginia ahu auka masemase. ²⁵Bena Israel taudia ese edia hanua iboudiai e abidia; bona Hesebon bona Amoro hanuadia maraḡidia iboudiai e noholaidia. ²⁶Badina be Hesebon na Sihon, Amoro pavapavana, ena hanua; ia ese gunaguna Moab pavapavana gunana e tuari henia, bona ena tano idoinai e abia ela bona Aranon sinavaina. ²⁷Una dainai ane isisibana taudia eto:

Aoma Hesebon.

Sihon ena hanua baita hadaia,

Bona baita ha-aukaia.

²⁸Badina be lahi Hesebon amo e tubu,

Lahi hururu-hururuna Sihon ena hanua amo e dae;

Ara Moab ai e araia,

Aranon orordia lohiadia e aradia ore.

²⁹Moab e, madi, ihabaimu!

Kemoso o toma henia dihomu taumui e, vada o baia!

Natuna mamaruanedia vada e luludia oho,

Natuna hahinedia vada e abidia mauri,

Sihon, Amoro pavapavana, ese.

³⁰Emai diba amo vada a haberodia;

Hesebon vada e hebua tari ela bona Dibon,

Tano vada a havahua ela bona Nofa, ela bona Medeba.

³¹Unuhetomana Israel na Amoro tanona e noho henia. ³²Bena Mose ese hasinadoa taudia e siaidia, lasere ela; bona lasere hanuadia e abidia, Amoro taudia unuseni ai e nohova na e luludia lasi. ³³Bena idia na e raka lasi, Basan dalana amo ela. Bena Og, Basan pavapavana, mai ena ore a taudia iboudiai ida, e raka lasi, Edrei ai e tuari henidia. ³⁴A Iehova ese Mose e hamaoroa, eto, Basio gari henia; oi imamu ai vada na atoa kau: ia, bona ena ore a taudia iboudiai, bona ena tano idoinai. Sihon, Amoro pavapavana, Hesebon ai o kara henia heḡereḡerena, ina tau danu unu ba kara henia toma. ³⁵Taunabunai idia ese ia bona natuna bona ena ore a taudia iboudiai e hadareredia bona e luludia lasi; bona ena tano e abia, edia tano ai e halaoa.

Balaam

22 ¹Israel taudia ma e laolao, Moab taoradia ai e taruha, Ioridane sinavaina unukahana ai, gabu ladana na Ieriko. ²Balak Siporo

ese Israel taudia edia kara idoinai Amoro taudia e kara henidia vada e itaia. ³Moab ai danu gari na bada, badina be Israel taudia na hutuma herea; una dainai Moab taudia ese Israel taudia garidia e gariva. ⁴Bena Moab ese Midian lohiadia hamaorodia, eto, Ini hutuma na eda gabu idoinai bae habuaia tari, boromakau; ese rei e ani oremu na heto. Una negana ai Balak Siporo(na Moab pavapavana. ⁵Taunabunai ia ese gwaukau taudia haida e siaidia, a Balaam Beoro dekenai, Petoro ai, Sinavai Badana isena ai, Amawa tanona ai, eto, A itaia, bese ta Aigupto amo vada ema, tano idoinai vada e hahonua davana; idia na lau vairagu ai vada e taruha. ⁶Mani emu kara aoma, ina bese ba uduguiraiia, badina be edia goada ese lauegu e hereaiamu; bena readia baina hadareredia diba bona baina luludia diba; badina be lau dibagu oi ese o hanamoamu tauna na baine namo, bona oi ese o uduguiraiamu tauna na baine dika.

⁷Taunabunai, Moab lohiadia bona Midian lohiadia ese idume na imadia ai e abi, ela, Balaam enai e kau, Balak ena hereva e hamaorolaia. ⁸Bena Balaam ese e haere henidia, eto, Hari hanuaboi iniseni ai ba mahuta; bena Iehova ese baine hereva henigu hegeregerena ai baina haere henimui. Taunabunai, Moab lohiadia na Balaam dekenai e nohova. ⁹Bena Dirava na Balaam dekena ema, eto, Ini oi dekemu ai e nohomu taudia be daidia? ¹⁰Balaam ese Dirava e haere henia, eto, Balak Siporo, Moab pavapavana, vada e siaidia dekegu ai, eto, ¹¹O itaia, bese ta Aigupto amo vada ema, tano idoinai vada e hahonua davana; mani emu kara, ina bese ba uduguiraiia, bena baina tuari henidia bona ina tano amo baina luludia lasi. ¹²Dirava ese Balaam e hamaoroa, eto, Idia ida basiola, bona una bese basio uduguiraiia; badina be lau ese vada na hanamodia. ¹³Daba ai Balaam e tore isi, Balak ena lohia taudia e hamaorodia, eto, Emui tano ba lou henia, badina be Iehova ese e rugumu, basina bamomui e tomu. ¹⁴Taunabunai Moab lohiadia e lou ela, Balak dekenai, eto, Balaam na e gwau edeede, se bamomai.

¹⁵Taunabunai, Balak ese lohia haida ma e siaidia; e siaidia guna na dia hoho bona dagi maraḡi taudia, a harihari e siaidia na hoho bona dagi bada taudia. ¹⁶Idia na Balaam dekena ela, eto, Balak Siporo na e tomu, Gau ta basine laomu ahu, vada aoma. ¹⁷Lau ese baina matauraimu, bona ede ba hamaorogu toma unu mo baina kara toma. Taunabunai vada aoma, ina bese ba uduguiraiia, egu noinoi hegeregerena. ¹⁸A Balaam ese Balak ena hesiai taudia e haere henidia, eto, Ena be Balak ese ena ruma, mai ena *silver* idoinai bona ena *gold* idoinai ida, bema henigu, to Iehova egu Dirava ena hahedua basinama ha-idaua diba; basinama hamaraḡia, basinamahabadaia danu. ¹⁹Taunabunai, iniseni ai ba mahuta, hari ina hanuaboi, ela.bona lau baina diba Iehova ede baine haduagu toma. ²⁰Bena hanuaboi ai Dirava ese Balaam e hahedinarai henia, eto, Ini taunimanima)ima na oi iboirimu vada ema. Vadaeni, a tore isi, idia ida baola; a lau ese baina hamaoromu hegeregerena ai mo ba karaia.

Balaam ena a doniki e hereva

²¹Taunabunai, Balaam na daba ai e tore isi, ena doniki e abia heḡaeḡae, Moab lohiadia idoinai ida ela. ²²A ia na ela dainai, Dirava vada e badu; bena Iehova ena aneru ta dala ai e gini, ia ilao-ahuna. Ia be ena doniki ai e gui, ena hesiai taudia rarua danu ia e bamoā. ²³Hari doniki ese Iehova ena aneru e itaia, dala ai gini, mai ena dare imana ai; bena doniki na dala amo e raka siri, rei lalonai. A Balaam ese doniki e kwadia, baine Iou dala ai eto.

²⁴Bena Iehova ena aneru na gabu hekahina ta ai, dala na vine imeadia padadia amo ela gabuna ai, e gini. Dala kahana kahana ai na nadi maḡudia. ²⁵Doniki ese Iehova ena aneru ma e itaia, bena e raka siri maḡu badibadinai; bena Balaam aena e bero maḡu nadidia ai. Bena ma e kwadia lou.

²⁶Una murinai, Iehova ena aneru ma ela, gabu hekahi-hekahina taai e gini, idiba ai bona lauri ai asi raka siri dalana gabuna ai. ²⁷Doniki ese Iehova ena aneru ma e itaia, bena tano ai e hekure diho Balaam henunai. Bena Balaam e badu dikadika, ena, itotohi amo e dadabaia.

²⁸Bena Iehova ese doniki uduna e hahaḡaia, bena ia ese Balaam e hereva henia, eto, Lau ede na karamu toma dainai nega toi o kwadigu? ²⁹Balaam ese doniki e haere henia, eto, Vada o hakavakavagu dainai; imagu bema mai darena, bama alamu mase. ³⁰Bena doniki ese Balaam ma e hereva henia, eto, Lau na emu doniki ani? Emu mauri dinadia iboudiai lau dorugu ai vada o loaloa ani? Lau ese nega ta ini na karamu toma a? Balaam eto, Lasi.

³¹Bena Iehova ese Balaam matana e hapapa; bena Balaam ese Iehova ena aneru e itaia dala ai, imana na mai darena. Bena e goru diho tano ai. ³²Iehova ena aneru ese e gwau henia, eto, Dahaka dainai emu doniki na nega toi o kwadia? O itaia, lau na oi ilao-ahumu vada na raka lasi, badinabe emu kara na dika vairagu ai. ³³Bena doniki e itagu, bona nega toi egu amo e raka siri; basinema raka siri, oi bama alamu mase a ia bama hamauria. ³⁴Bena Balaam ese Iehova ena aneru e haere henia, eto, Lau be na kerere, badina be asi dibagu oi na dala ai gini, o laogu ahu. A bema oi o laloamu bainala na dika, vada baina lou lao. ³⁵Bena Iehova ena aneru ese Balaam e hamaoroa, eto, Idia ida baola; a lau baina hamaorolaimu herevadia mo ba gwaurai. Bena Balaam na Balak lohiadia ida ela.

³⁶Balak vada e kamonaia Balaam na e maimu, bena ia na Moab hanuana ela Aranon sinavaina isena ai, ena tano hetoana ai, bae hedavari eto. ³⁷Bena Balak ese Balaam e hereva henia, eto, Gwau-kau na siaia, na boirimu ani? Dahaka dainai o gwau edeede? Lau na basina hanamomu diba a? ³⁸Balaam ese Balak e haere henia, eto, Vada nama; to lau na

asi siahugu hereva ta baina gwaurai; Dirava ese udugu ai baine atoa herevana, una mo baina gwaurai. ³⁹Bena Balaam na Balak ida ela, Kiriata-husoto ai e kau. ⁴⁰Bena Balak ese boubou ḡaudia e aladia, boromakau bona mamoe, Balaam bona ia e bamoa lohiadia ahudia e siaidia dekediai. ⁴¹Daba ai Balak ese Balaam e hakaua dara, Bamoto-Baal ela; unu amo e roha lao, gabu kahikahidia aie nohova taudia na e nenedia.

Balaam ese Israel e hanamoa

23 ¹Balaam ese Balak e hamaoroa, eto, Ihaboulaina patadia hitu ba lareba iniseni ai; boromakau mamaruanedia hitu bona mamoe mamaruanedia hitu danu bavabi heḡaeḡae. ²Bena Balak ese Balaam ena hereva heḡereḡerena e karaia. Bena Balak bona Balaam ese ihaboulaina patadia ta ta latadi ai boromakau maruanena ta bona mamoe maruanena ta e haḡoledia oho. ³Bena Balaam ese Balak e hamaoroa, eto, Emu ḡole-oho boubouna badibadinai ba gini. Lau be bainala, reana Iehova nadekegu ai bainema eiava; bena ede baine hamaorogu toma ma baina hamaoromu. Bena ororo ta ai e dare dae. ⁴Bena Dirava na ia ida e hedavari. Balaam ese e hereva henia, eto, Lau na ihaboulaina patadia hitu vada na abi heḡaeḡae, bona ta ta latadi ai boromakau maruanena ta bona mamoe maruanena ta vada na haḡoledia oho. ⁵Bena Iehova ese Balaam baine gwaurai herevadia e henia, eto, A lou lao Balak; dekenai, unu ba hamaoroa toma. ⁶Taunabunai ia na e lou lao ia dekenai; Moab lohiadia iboudiai na unusen ai gigini, iena ḡole-oho bouboudia badibadidiai. ⁷Bena Balaam na e haroro, eto,

Balak ese Aram amo e boirigu,
Moab pavapavana ese mairiveina ororodia amo e boirigu;
Aoma, eto, Iakob ba uduguirai,
Aoma, Israel ba ihi-ihirai.

⁸ A Dirava ese se uduguiraiamu tauna na
Ede baina uduguirai toma?
Iehova ese se ihi-ihiraiamu tauna na
Ede baina ihi-ihirai toma?

⁹ Haga amo na itaiamu,
Ororo amo na haḡereamu,
Ia na noho-edea besena,
Bese loḡora ida asie duahia hebou.

¹⁰ Iakob ḡahuna daika ese baine hagaua?
Israel oreana ta daika ese baine duahidia?
Kara maoromaoro tauna ena mase ai baina mase,
Egu mauri baine doko iena mauri dokona heḡereḡerena.

¹¹Bena Balak ese Balaam e gwau henia, eto, Ede vada o karagu toma?
Inaigu iuduguiraidia totona na boirimu, a oi ese ihanamodia herevadia

mo vada o gwaurai. ¹²A Balaam e haere, eto, Iehova ese vada e henigu herevadia na basina gwaurai a?

¹³Bena Balak ma e hamaoroa, eto, Mani a bamogu, gabu ta ma baitala; unu amo ba itadia, a kahikahidia taudia mo ba itadia, iboudiai basio itadia; unuseni ai ba uduguiraidia. ¹⁴Bena ia ese e hakaua lao, Sofimi tanona ai, ela bona Pisga ororona;l dorina; unuseni ai ihaboulaina patadia hitu ma e lareba, bona ta ta latadiai boromakau maruanena ta bona mamoe maruanena ta e haḡoledia oho. ¹⁵Bena Balaam ese Balak e hamaoroa, eto, Emu ḡole-oho boubouna badibadinai ba gini; lau bainala, Iehova ida baia hedavari. ¹⁶Bena Iehova na Balaam dekena ema, baine gwaurai herevadia e henia, eto, A lou lao Balak dekenai, unu ba hamaoroa toma. ¹⁷Taunabunai ia na e lou lao, Balak e davaria, ena ḡole-oho boubouna badibadinai gini, Moab lohiadia ida. Bena Balak ese e nanadaia, eto, Iehova na ede e gwau toma? ¹⁸Bena Balaam ma e haroro, eto,

Balak e, a tore isi, a kamonai!

Siporo natuna e, a kamonai henigu!

¹⁹Dirava na dia taunimanima, mai ena koikoi;

Dia taunimanima natuna, mai ena lalo rua.

Vada e hereva: basine karaia a?

Vada e gwaurai: basine haḡuḡurua a?

²⁰Vada e haḡanigu, baina hanamodia;

Ia ese vada e hanamodia; ena hahenamo iabi-ohona asi dibagu.

²¹Kara dika ta Iakob enai se itaia,

Kara havara ta Israel enai se davaria;

Iehova edia Dirava ese e bamodia,

Pavapava gadona na bogaragidiai.

²²Dirava ese Aigupto amo e hakaudia lasi;

Idia na uda boromakaudia mai doadia na heheto.

²³Mea karadia na asi goadadia Iakob enai,

Babalau karadia na asi siahudia Israel enai.

Harihari Iakob bona Israel bae herevalaidia,

Baeto “Dirava na ede vada e karadia toma?”

²⁴O itaia, ina bese na e tore isimu, leona hahinena na heto;

E gini toremu, leona na heto;

Basine hekure ela bona baine hadareredia taudia hidiodia baine ani,

Bona raradia baine inu.

²⁵Bena Balak ese Balaam e haḡania, eto, Basio uduguiraidia bona basio hanamodia. ²⁶A Balaam ese Balak e haere henia, eto, Na hamaoromu, ani, nato “Iehova ese e gwauriamu herevadia iboudiai na baina kara”.

²⁷Bena Balak ese Balaam e hamaoroa, eto, Mani aitala, gabu idauna ta; reana unuseni ai Dirava baine ura oi ese inaigu ba uduguiraidia.

²⁸Taunabunai, Balak ese Balaam e hakaua lao, raruosi na Peoro dorina ela; unu amo e roha lao, tano gāgaena e itaia. ²⁹Bena Balaam ese Balak e hamaoroa, eto, Ihaboulaina patadia hitu ma ba lareba iniseni ai, bona boromakau mamaruanedia hitu bona mamoe mamaruanedia hitu ma ba henigu. ³⁰Bena Balak ese Balaam ena hereva hegeregereena e karaia, boromakau maruanena ta bona mamoe maruanena ta e haḡoledia oho, ihaboulaina patadia ta ta latadiai.

24 ¹Balaam lalona vada e parara Iehova ena ura be Israel baine hanamodia; una dainai ia na se raka siri, nega gunadia hegeregeredia, kara henuidia se kara. Ia na tano gāgaena e haḡerea, ²e roha lao, Israel iduhudia ta ta ena taruha ena taruha ai e itadia. Bena Dirava ena Lauma ese e rohea, ³e haroro Iou, eto,

Balaam Beoro ena hereva bini;

Matana vada e papa tauna ena hereva bini;

⁴Dirava ena hereva e kamonaimu tauna,
Siahu-idoinai Diravana hairaina e itaiamu
Bena e toma dihomu to matana se hakapuna tauna,
Ena hereva bini.

⁵Iakob e, emu kalaga na namo herea,
Israel e, emu taruha na ḡoeva dae;

⁶Sinavai kouradia na heheto,
Sinavai isena umadia na heheto,
Aloe^s audia Iehova ese vada e hadodia na heheto,
Sida audia ranu gabudia ai na heheto.

⁷Ranu na ena hodu amo baine aru,
Ia garana na sinavai momo isedia ai bae noho,
Ia pavapavana na Agag baine hereaia,
Iena basileia baine herea dae.

⁸Dirava ese Aigupto amo vada e hakaua lasi;
Ia na mai doana, uda boromakauna na heto;
Ia ese inaina baine hadareredia,
Turiadia baine hakwaidudia,
Ena diba amo baine tarakidia.

⁹Ia na e hekuremu leona na heto,
E laḡa animu leona hahinena na heto,
Daika ese baine haoa?
Bae hanamomu taudia na bae hanamodia,
Bae uduguiraimu taudia na bae uduguiraidia.

¹⁰Bena Balak ese Balaam e badu henia, imana ruaosi e pata hekapu, e gwau henia, eto, Inaigu iuduguiraidia totona na boirimu, to oi na nega

^s 24.6 “Aloe” bona “Sida” na Heberu taudia edia au rua ladadia.

hatoi vada o hanamodia. ¹¹A lou haraḡa, emu gabu baola; lau na dagi namona baina henimu nato, to Iehova ese vada e rumu, baina henimu nato dagina na basio abia. ¹²Bena Balaam ese Balak e haere henia, eto, Emu gwaukau taudia na hamaorodia, ani, nato ¹³“Ena be Balak ese ena ruma, mai ena *silver* idoinai bona ena *gold* idoinai ida, bema henigu, to Iehova ena hereva basinama ha-idaua diba; sibogu egu ura ai kara namonata eiava kara dikana ta basinama karaia diba, a Iehova ena hereva mo baina gwauraia”. ¹⁴Benaini, egu gabu taudia baina lou henidia; a guna baina hamaoromu, ina bese taudia ese oiemu bese taudia ede bae karadia toma dina gabedia ai. ¹⁵Bena ma e haroro, eto,

Balaam Beoro ena hereva bini;

Matana vada e papa tauna ena hereva bini;

¹⁶Dirava ena hereva e kamonaimu tauna,

Herea Mikamika ena aonega ai e aonegamu tauna,

Siahu-idoinai Diravana hairaina e itaiamu

Bena e toma dihomu to matana se hakapumu tauna,

Ena hereva bini.

¹⁷Na itaiamu, to dia ina harihari;

Na roha heniamu, to dia gabu kahirana ai;

Hisiu ta Iakob ena amo baine dae,

Dagi auna ta Israel ena amo baine heabi isi;

Moab baguna baine huaria,

Set garana iboudiai kwaradia baine huaridia,

¹⁸Edom taudia baine luludia lasi,

Seiri taudia, ana inai taudia, baine ha-oredia.

Israel baine kwalimu,

¹⁹Iakob baine lohia;

Hanua taudia na ta basine roho mauri.

²⁰Ia ese Amalek e haḡerea, bena ini e haroro toma:

Amalek na herea-dae besena,

A dokona ai baine hebua tari.

²¹Bena Kene taudia e haḡeredia, ma e haroro, eto,

Emu ruma na auka,

Emu kohoro na hagahaga nadina ai,

²²To Kain baine hebua tari,

Asuru ese baine abimu mauri.

²³Ma e haroro, eto,

Inaio, Dirava ini baine kara toma,

Bena daika baine roho mauri?

²⁴Lagatoi na Kitim amo baema,

Asuru bona Ebere bae hahisidia,

Bena idia danu bae hebua tari.

²⁵Una murinai Balaam e tore isi, ena gabu ela; Balak danu e raka oho.

Israel ese Baal e toma henia diho

25 ¹Israel taudia na Sitim ai e nohova; una negana ai idia na Moab hahinedia ida e kara havarava. ²Badina be unu hahine ese e boiridia, edia boubou karadia ai bae heduru; bena Israel taudia na ela, boubou ġaudia e ani, bona Moab taudia edia dirava e toma henidia diho. ³Unuhetomana Israel taudia ese Peoro ena Baal^t e toma henia diho; bena Iehova ese Israel taudia e badu henidia. ⁴Bena Iehova ese Mose e hamaoroa, eto, Iduhu lohiadia iboudiai bavabidia, dina siahuna ai ba taudia dae, Iehova vairanai; unu amo Iehova ena badu ġaraġara na Israel taudia edia amo baine heabi oho. ⁵Nena Mose ese Israel edia hahemaoro taudia e hamaorodia, eto, Umui ta ta emui iduhu taudia hahidaosi Moab hahinedia ida e kara havara bona Peoro ena Baal e toma henia diho na bavaladia mase.

⁶Una negana ai Mose bona Israel oreana taudia iboudiai na hebou kalagana iduarana ai e hebou mai taitaidia ida. Bena idia vairadiai Israel tauna ta be Midian hahinena ta e hakaua lao, varavarana dekediai. ⁷Fineha Eleasara, hahelaġa tauna Aaron tubuna, ese e itadia, bena e tore isi, hebou e rakatania, io e abia imana ai; ⁸beno una Israel tauna murina amo e raka, ela bona ena kalaga ai e raka vareai, unuseni ai ia ese raruosi e gwadadia mase, tau bona hahine danu. Unu amo dai-hanai gororena e doko Israel ai; ⁹ġau tamona gerebu-rua daha-hani^u be gorere ese e hamasedia.

¹⁰Iehova ese Mose e hamaoroa, eto, ¹¹Fineha Eleasara, hahelaġa tauna Aaron tubuna, ese egu badu na Israel taudia edia amo vada e abia oho, badina be lauegu vaġeġe ai e vaġeġe idia bogaragidiai; una dainai egu vaġeġe ai asina aladia ore. ¹²Taunabunai baoto: Lau na ia ida baia herohe-maino; ¹³emai herohe-maino toana be ia bona ia garana na hahelaġa taudia ai baela, ela bona hanaihanai; badina be ena Dirava vaġeġena ai e vaġeġe, unu amo herohe-maino karana vada e karaia, Israel taudia daidiai.

¹⁴Hari Israel tauna, Midian hahinena ida e gwadadia mase tauna, ladana na Simiri Salu, Simeon iduhuna lohiana ta. ¹⁵A Midian hahinena, e gwadaia mase hahinena, ladana na Kosobi Suru; hari Suru na iduhu ta lohiana Midian ai.

^t 25.3 “Baal”: Ina hereva anina be “Lohiabada” eiava “Biaguna”. Bese gunadia Kanaan ai e nohova ese edia dirava ladadia unu e gwaurai tomava. Hanua idau-idau na maiedia dirava idau-idau, a iboudiai ladadia e gwaurai “Baal”. “Baal-Peoro” na Peoro taudia edia dirava. Hari Baal itomadiho-henidia ai lebulu karadia momo e karava. ^u 25.9 Gerebu-rua daha-hani = 24,000.

¹⁶Iehova ese Mose ma e hamaoroa, eto, ¹⁷Midian taudia ba tuari henidia, vada ba hadareredia; ¹⁸badina be idia ese edia kara hedibaḡani amo vada e tuari henimui, Peoro dainai vada e dibaḡanimui, bona taihudia Kosobi, Midian lohiana natuna, dainai; Peoro bagunai gorere ese e butumui tao dinana ai e gwadaia mase hahinena bunai.

Israel iduhudia e duahidia

26 ¹Gorere vada e doko murinai, Iehova ese Mose bona Eleasara Aaron, hahelaḡa tauna, e hereva henidia, eto, ²Israel oreana taudia ibouboudiai ba duahidia, laḡani ruahui vada e hanai taudia iboudiai. Iduhu ta ta amo ba duahidia, tuari mai dibadia taudia iboudiai Israel ai. ³Bena Mose bona hahelaḡa tauna Eleasara ese taunimanima e hamaorodia, Moab taorana ai, Ioridane sinavaina badibadinai, Ieriko ai, eto, ⁴Laḡani ruahui vada e hanai taudia ba duahidia, Iehova ese Mose e haḡania heḡereḡerena. Israel taudia, Aigupto amo e raka lasi, ladadia bini.

⁵Ruben na Israel natuna roboana. Ia natuna be Hanok, Hanok iduhuna e havaraia tauna; bona Palu, Palu iduhuna e havaraia tauna; ⁶bona Hesron, Hesron iduhuna e havaraia tauna; bona Karami, Karami iduhuna e havaraia tauna. ⁷Ruben ena iduhu idoinai bunai: edia numera be 43,730. ⁸Palu natuna ta be Eliab. ⁹Eliab natuna be Nemuele bona Datan bona Abiram. Hari Datan bona Abiram, be hebou ese e abidia. a hidi, bena idia raruosi bona Kora ese Mose bona Aaron e heai henidia, bona Iehova danu e heai henia, ¹⁰ela bona tano ese e hadonodia, idia bona Kora bona Kora ena orea taudia, bena iboudiai e mase. Una negana ai danu lahi ese taunimanima sinahu-rua imahui e aladia mase, matahakani ḡauna ai ela. ¹¹Ḡau tamona, Kora natuna na asie mase.

¹²Simeon natuna mai edia iduhu bini: Nemuele, Nemuele iduhuna e havaraia tauna; bona Iamin, Iamin iduhuna e havaraia tauna; bona Iakin, Iakin iduhuna e havaraia tauna; ¹³bona Sera, Sera iduhuna e havaraia tauna; bona Saul, Saul iduhuna e havaraia tauna. ¹⁴Simeon ena iduhu idoinai bunai: edia numera be 22,200.

¹⁵Gad natuna mai edia iduhu bini: Sefon, Sefon iduhuna e havaraia tauna; bona Hagi, Hagi iduhuna e havaraia tauna; bona Suni, Suni iduhuna e havaraia tauna; ¹⁶bona Osni, Osni iduhuna e havaraia tauna; bona Eri, Eri iduhuna e havaraia tauna; ¹⁷bona Arod, Arod iduhuna e havaraia tauna; bona Areli, Areli iduhuna e havaraia tauna. ¹⁸Gad natuna edia iduhu bunu: edia numera be 40,500.

¹⁹Iuda natuna be Ere bona Onan; a idia na Kanaan tanona ai e mase. ²⁰Iuda natuna mai edia iduhu bini: Sela, Sela iduhuna e havaraia tauna; bona Perese, Perese iduhuna e havaraia tauna; bona Sera, Sera iduhuna e havaraia tauna. ²¹Perese natuna be Hesron, Hesron iduhuna e havaraia

tauna, bona Hamulu, Hamulu iduhuna e havaraia tauna. ²²Iuda ena iduhu idoinai bunai: edia numera be 76,500.

²³Isakara natuna mai edia iduhu bini: Tola, Tola iduhuna e havaraia tauna; bona Puva, Punu iduhuna e havaraia tauna; ²⁴bona Iasub, Iasub iduhuna e havaraia tauna; bona Simron, Simron iduhuna e havaraia tauna. ²⁵Isakara ena iduhu idoinai bunai: edia numera be 64,300.

²⁶Sebulun natuna mai edia iduhu bini: Sered, Sered iduhuna e havaraia tauna; bona Elon, Elon iduhuna e havaraia tauna; bona Ialeel, Ialeel iduhuna e havaraia tauna. ²⁷Sebulun ena iduhu idoinai bunai: edia numera be 60,500.

²⁸Iosef natuna mai edia iduhu bini: Manase bona Efraim. ²⁹Manase natuna bini: Makiri, Makiri iduhuna e havaraia tauna; bona Gilead Makiri, Gilead iduhuna e havaraia tauna. ³⁰Gilead natuna bini: Iesere, Iesere iduhuna e havaraia tauna; bona Helek, Helek iduhuna e havaraia tauna; ³¹bona Asriel, Asriel iduhuna e havaraia tauna; bona Sekem, Sekem iduhuna e havaraia tauna; ³²bona Semida, Semida iduhuna e havaraia tauna; bona Hefere, Hefere iduhuna e havaraia tauna. ³³Selofehad Hefere na asi natuna maruanena ta, hahine mo; Selofehad natuna hahinedia ladadia na Mahala bona Noa bona Hogla bona Milka bona Tirisa. ³⁴Manase ena iduhu idoinai bunai: edia numera be 52,700.

³⁵Efraim natuna mai edia iduhu bini: Sutela, Sutela iduhuna e havaraia tauna; bona Bekere, Bekere iduhuna e havaraia tauna; bona Tahan, Tahan iduhuna.e havaraia tauna. ³⁶Sutela natuna be Eran, Eran iduhuna e havaraia tauna. ³⁷Efraim natuna edia iduhu bunu: edia numera be 32,500. Iosef garana bunu, edia iduhu ta ta ai.

³⁸Beniamina natuna mai edia iduhu bini: Bela, Bela iduhuna e havaraia tauna; bona Asbel, Asbel iduhuna e havaraia tauna; bona Ahiram, Ahiram iduhuna e havaraia tauna; ³⁹bona Sefufam, Sufam iduhuna e havaraia tauna; bona Hufam, Hufam iduhuna e havaraia tauna. ⁴⁰Bela natuna na Arad bona Naaman. Arad ese Arad iduhuna e havaraia, bona Naaman ese Naaman iduhuna e havaraia. ⁴¹Beniamina natuna edia iduhu bunu: edia numera be 45,600.

⁴²Dan natuna be Suhama; ia na Suhama iduhuna e havaraia tauna; Dan ena iduhu idoinai bunai. ⁴³Suhama iduhuna ena numera be 64,400.

⁴⁴Asere natuna mai edia iduhu bini: Imna, Imna iduhuna e havaraia tauna; bona Isvi, Isvi iduhuna e havaraia tauna; bona Beria, Beria iduhuna e havaraia tauna. ⁴⁵Beria natuna bini: Hebere, Hebere iduhuna e havaraia tauna; bona Malkiel, Malkiel iduhuna e havaraia tauna. ⁴⁶Asere natuna hahinena ladana be Sera. ⁴⁷Asere natuna edia iduhu bunu: edia numera be 53,400.

⁴⁸Napatali natuna mai edia iduhu bini: Iaseel, Iaseel iduhuna e havaraia tauna; bona Guni, Guni iduhuna e havaraia tauna; ⁴⁹bona

Iesere, Iesere iduhuna e havaraia tauna; bona Silem, Silem iduhuna e havaraia tauna. ⁵⁰Napatali iduhuna idoinai binai: edia numera be 45,400.

⁵¹Israel taudia ibouboudiai e duahidia be 601,730.

Tano iharina

⁵²Iehova ese Mose e hamaoroa, eto. ⁵³Tano na ba haria, ini taunimanima edia; ladadia bona edia numera hegeregeredia ai ba haria. ⁵⁴Iduhu badana be tano badana ba henia, a iduhu maraġina be tano maraġina ba henia: iduhu ta ta ahudia ba henidia edia numera hegeregeredia. ⁵⁵A edia inoġo be mari amo bae abi; senedia edia iduhu ladadia hegeregeredia ahudia bae abi. ⁵⁶Iduhu badadia ai bona iduhu maraġidia ai, edia inoġo na mari amo bae abi.

Levi taudia e duahidia

⁵⁷Levi taudia danu edia iduhu ta ta ai e duahidia. Gereson be Gereson iduhuna e havaraia tauna; Kohat be Kohat iduhuna e havaraia tauna; Merari be Merari iduhuna e havaraia tauna. ⁵⁸Levi iduhudia bini: Libni bona Heberon bona Mali bona Musi bona Kora. Kohat na Amram tamana. ⁵⁹Amram adavana ladana na Iokebed, Levi natuna hahinena, Aigupto ai e vara. Ia natuna Amram enai e abidia be Aaron bona Mose bona taihudia Miriama. ⁶⁰Aaron natuna be Nadab bona Abihu bona Eleasara bona Itamara; ⁶¹a Nadab, bona Abihu e mase, lahi ida; idauna Iehovavairanai bae hahelaġaia eto negana ai. ⁶²Levi taudia e duahidia, edia numera be 23,000; una be mamaruane hua ta vada e hanaia taudia edia numera. Israel taudia ida asie duahidia hebou, badina be tano iharina ai idia na asi.ahudia, Israel taudia bogaragidiai.

⁶³Ini iboudiai be Mose bona Eleasara, hahelaġa tauna, ese e duahidia; Moab taorana ai, Ioridane sinavaina isena ai, Ieriko ai, unuseni ai e duahidia. ⁶⁴A Mose bona Aaron, hahelaġa tauna, ese Sinai tano-ġaġaena ai e duahidia taudia na ta dia mauri; ⁶⁵badina be Iehova ese vada e herevalaidia, eto “Tano ġaġaena ai bae mase”. Taunabunai ta dia mauri; Kaleb lefune bona Iosua Nunu, idia raruosi mo sibodia dounu e mauri nohova.

Selofehad natuna ahudia

27 ¹Una negana ai Selofehad Hefere natuna hahinedia na e raka kahira. Hari Hefere na Gilead natuna; Gilead be Makiri natuna; Makiri be Manase natuna. Taunabunai, idia na Manase Iosef ena iduhu hahinedia Hahine ladadia be Mahala bona Noa bona Hogla bona Milka bona Tirisa. ²Idia na Mose bona hahelaġa tauna Eleasara bona iduhu lohiadia bona hebou taudia iboudiai vairadi ai e gini, hebou kalagana iduarana ai, eto, ³Tamamai na tano ġaġaena ai e mase: ia na dia Kora ida

Iehova e heai henia oreana tauna ta, to ia sibona ena kara dika dainai e mase. Ia na asi natuna maruanena ta. ⁴Badina be dahaka tamamai ladana na ena iduhu amo baine heabi oho, asi natuna maruanena dainai? Tamamai varavarana bogaragidiai ai ahumai ba henimai.

⁵Mose ese idia sivaraidia na Iehova e hamaorolaia. ⁶Bena Iehova ese Mose e hamaoroa, eto, ⁷Selofehad natuna hahinedia edia hereva na maoro; tamadia varavarana bogaragadiai ahudia ba henidia; tamadia ahuna na idia ese bae abia. ⁸Ina danu, Israel taudia ba hamaorodia, baoto: Tau ta baine mase, asi natuna mase maruanena, natuna hahinena ese ia ahuna baine abia; ⁹bema asi natuna hahinena danu, ahuna na tadikakana ba henia; ¹⁰bema asi tadikakana, ahuna na tamana lahaidia ba henidia; ¹¹a bema asi:tamana lahaina ta, ahuna na varavara-dosina ba henia, ia ese baine abia. Ina na taravatu bona hahegani Israel taudia ediai. Iehova ese Mose vada e henia hegeregerena.

Mose ibolona

¹²Iehova ese Mose e haġania, eto, Ina Abarim ororona ai ba dara dae, ba roha lao, Israel taudia vada na henidia tanona do ba itaia. ¹³Ba itaia murinai oi na tubu tama dekediai ba hahebou, kakamu Aaron hegeregerena; ¹⁴badina be Sin tano-ġaġaena ai umui raruosi ese o gwau edeede henigu, hebou taudia ese e heai henigu negana ai, ranu gabuna ai asio rimodaigu idia vairadiai. Una ranu ladana na Meriba; ia na Kade kahana ai, Sin tanoġaġaena ai. ¹⁵Bena Mose ese Iehova e haere henia, eto, ¹⁶Mani emu kara, Iehova, taunimanima iboudiai laumadia edia Dirava, ese tau ta baine abia hidi, ina ore a taudia baine biagudia. ¹⁷Ia be vairadiai baine raka lasi bona vairadiai baine raka vareai; baine hakaudia lasi bona baine hakaudia vareai. Iehova ena ore a taudia na basie noho kava, mamoe asi ireġudia na heheto. ¹⁸Bena Iehova ese Mose e haġania, eto, Iosua Nunu avabia: ia be lauma ese vada e rohea tauna; oi imamu na ia tubuana ai bavato kau. ¹⁹Bena ba haginia, hahelaġa tauna Eleasara vairanai bona hebou taudia iboudiai vairadiai; bena idia vairadiai dagi ba henia. ²⁰Oiemu sياهو amo ba hasiahua; bena Israel oreana taudia iboudiai ese ia bae kamoni henia edia hebou ai. ²¹Ia be hahelaġa tauna Eleasara vairanai baine gini, bena Eleasara ese ia dainai Iehova ena ura baine tahua, Urim^v ena amo; bena iena hereva dainai bae raka lasi bona iena hereva dainai bae raka vareai, ia bona Israel oreana taudia iboudiai. ²²Bena Mose ese Iehova ena hahegani hegeregerena mo e karaia: Iosua e abia, hahelaġa tauna Eleasara bona hebou taudia iboudiai vairadiai e haginia; ²³ben a imana na ia tubuana ai e atodia kau, dagi e henia, Iehova ena hahegani Mose ena amo e henia hegeregerena.

^v 27.21 “Urim”: Esodo 28, v. 30 ba itaia.

Dina kavakava Bouboudia

28 ¹Iehova ese Mose e hereva henia, eto, ²Israel taudia na ini ba hağanidia toma, baoto: Egu boubou ġaudia, Iahi ai o gabumu agu, bonana namo ġaudia egu, ba lalodia tao bona ba henigu, nega korikoridia iboudiai. ³Ma ba hamaorodia, baoto: Lahi boubouna binai Iehova ba henia, dina ta ta amo mamoe natudia mamaruanedia, laġani tamona ġaudia asi bebeka-bebekadia, rua rua amo ba heni, emu ġole-ohoboubouna ela hanaihanai. ⁴Mamoe natuna ta be daba ai ba henia, iharuana be adorahi ai ba henia. ⁵Flaoa namo-hereana efa ta ba karoaia, karoagwauta, bona dehoru negari-negarina hini^w ta ba karoaia, karoa hani; benaflaoa karoa ta bona dehoru karoa ta bavabi, ba bulo, ba gabu. ⁶Ina na ġole-oho boubouna, dina iboudiai ba hahelaġaia, Sinai ororona ai na haġanimui heġereġerena; ia na bonana namo ġauna, lahi boubouna, Iehova ena. ⁷Inuinu bouboudia danu ba heni: vine ranuna hini ta ba karoaia, karoa hani, bena karoa ta mamoe natuna ta ida, ma karoa ta mamoe natuna ta ida, unu ba heni toma; gabu helaġana ai hari vine ranuna ba seia Iehova ena; emui inuinu boubouna bunai. ⁸Mamoe natuna iharuana na adorahi ai ba hahelaġaia, flaoa boubouna bona inuinu boubouna danu, daba ai o hahelaġadia heġereġerena; ia na lahi boubouna, bonana namo ġauna, Iehova ena.

Dina Helaġa Bouboudia

⁹Dina Helaġa ai, mamoe natudia mamaruanedia rua, laġani tamona ġaudia asi bebeka-bebekadia, ba hahelaġadia; bona flaoa namo-hereana efata ba karoaia, karoa gwauta, bena karoa rua dehoru ida ba bulo, bena ba hahelaġaia; inuinu boubouna danu ba seia. ¹⁰Dina Helaġa iboudiai ġole-oho bouboudia unu ba heni toma, dina kavakava ena ġole-oho boubouna bonaena inuinu boubouna ida ba heni hebou.

Hua matamata Bouboudia

¹¹Hua matamatadia ai Iehova ena ġole-oho boubouna na ini ba heniatora: boromakau natudia mamaruanedia rua, mamoe maruanena ta, bona mamoe natudia mamaruanedia hitu, laġani tamona ġaudia asi bebeka-bebekadia. ¹²Flaoa namo-hereana efa ta ba karoaia, karoa gwauta, bena karoa toi toi be dehoru ida ba bulo, boromakau natudia ta ta ida ba heni; bona karoa rua be dehoru ida ba bulo, mamoe maruanena ida ba heni. ¹³Ma efa ta ba karoaia, karoa gwauta, bena karoa ta ta be dehoru ida ba bulo, mamoe natudia ta ta ida ba heni. Ini be ġole-oho boubouna ġaudia, bonana namoġaudia; bae haġoledia oho, Iehova ena.

^w 28.5 “Efa” bona “Hini” na Heberu taudia edia hahetoho ġaudia ladadia.

¹⁴A edia inuinu bouboudia be iniheto: vine ranuna hini ta ba karoaia, karoa rua, bena karoa ta ta ba sei, boromakau natudia ta ta edia; ma hini ta ba karoaia, karoa toi, bena karoa ta ba seia, mamoe maruanena ena; ma hini rua ba karoadia, karoa hani hani amo, bena karoa ta ta ba sei, mamoe natudia ta ta edia. Ini na hua ta ta edia ḡole-oho boubou ḡaudia, laḡani huadia iboudiai lalodiai.

¹⁵Nani maruanena ta danu ba hahelaḡaia; ia na kara-dika iabi-ohona boubouna Iehova enai. Ini iboudiai na dina kavakava ena ḡole-oho boubouna bona ena inuinu boubouna ida ba heni hebou.

Lagau-hanai Bouboudia

¹⁶Hua gini-gunana ena dina ihagwauta-hanina be Iehova ena Lagau-hanai. ¹⁷Ina hua ena dina ihagwauta-imana na aria dinana: dina hitu lalodia iasie hatubua flaoana mo bae ania. ¹⁸Dina gini-gunana ai hebou helaḡana bavabia. Una dina ai ḡaukara badana ta basio karaia, ¹⁹a lahi boubouna ba haḡolea oho, Iehova ena: boromakau natudia mamaruanedia rua, mamoe maruanena ta, bona mamoe natudia mamaruanedia hitu, iboudiai na asi bebeka-bebekadia ḡaudia mo. ²⁰Edia flaoa bouboudia danu ba haḡole oho: flaoa namo-hereana efa ta ba karoaia, karoa gwauta. Karoa toi toi bedehoro ida ba bulo, boromakau natudia ta ta ida ba heni; bona karoa rua be dehoru ida ba bulo, mamoe maruanena ida ba heni. ²¹Ma efa ta ba karoaia, karoa gwauta; bena karoa ta ta be dehoru ida ba bulo, mamoe natudia hituosi ta ta ida ba heni. ²²Nani maruanena ta danu ba hahelaḡaia, emui kara-dika iabi-ohona boubouna, herohe-maino ḡauna. ²³Ini ḡau bevaia: daba iboudiai o haḡole oho ḡaudia ida ba heni hebou. ²⁴Dina hituosi lalodiai unu mo ba kara toma, dina ta ta ai: boubou vamuna ba haḡolea oho, bonana namo ḡauna Iehova ena; ia bona dina kavakava ena ḡole-oho boubouna bona ena inuinu boubouna ba heni hebou. ²⁵Dinaihahituna ai hebou helaḡana bavabia, una dina ai ḡaukara badana ta basio karaia.

Taboro Bouboudia

²⁶Uma anidia ba utu matama dinana ai, emui pura ariana ai flaoa matamatana boubouna ba hahelaḡaia, Iehova ena; una negana ai hebou helaḡana bavabia, bona ḡaukara badana ta basio karaia. ²⁷Ḡole-oho boubouna bahahelaḡaia, bonana namo ḡauna Iehova ena: boromakau natudia mamaruanedia rua, mamoe maruanena ta, bona mamoe natudia mamaruanedia hitu, laḡani tamona ḡaudia. ²⁸Edia flaoa bouboudia danu ba haḡole oho: flaoa namohereana efa ta ba karoaia, karoa gwauta. Karoa toi toi be dehoru ida ba bulo, boromakau natudia ta ta ida ba heni; bona karoa rua be dehoru ida ba bulo, mamoe maruanena ida ba heni. ²⁹Ma efa ta ba karoaia, karoa gwauta; bena karoa ta ta be dehoru ida ba bulo,

mamoe natudia hituosi ta ta ida ba heni. ³⁰Nani maruanena ta danu ba hahelaḡaia, emui heroheimaina ḡauna. ³¹Ini ḡau be vaia emui ḡole-oho bouboudia mai edia flaoa bouboudia ida ba heni hebou. Ba ita, asi bebefa-bebekadia ḡaudia mo ba hahelaḡadia. Inuinu bouboudia danu ba sei.

Hua ihahituna bouboudia

29 ¹Hua ihahituna ena dina gini-gunana ai, umui na hebou helaḡana ta bavabia; una dina ai ḡaukara badana ta basio karaia. Una dina ai danu kibi ba hiriri, ²bona ḡole oho boubouna ba hahelaḡaia, bonana namo ḡauna Iehova ena: boromakau natuna maruanena ta; mamoe maruanena ta; bona mamoe natudia mamaruanedia hitu, laḡani tamona ḡaudia, asi bebefa-bebekadia. ³Edia flaoa bouboudia danu ba haḡole oho: a flaoa namo-hereana efa ta ba karoaia, karoa gwauta. Karoa toi dehoru ida; a babulo, boromakau ida ba heni; bona karoa rua dehoru ida ba bulo, mamoe maruanena ida ba heni. ⁴Ma efa ta ba karoaia, karoa gwauta, bena karoa ta ta be dehoru ida ba bulo, mamoe natudia hituosi ta ta ida ba heni. ⁵Nani maruanena ta danu ba hahelaḡaia, kara-dika iabi-ohona ḡauna, emui heroheimaino ḡauna. ⁶Ini ḡau be hua matamatana ena ḡole-oho boubouna mai ena flaoa boubouna ida, bona dina kavakava ena ḡole-oho boubouna mai ena flaoa boubouna bona mai edia inuinu bouboudia ida, ba heni hebou, taravatu heḡereḡeredia. Idia na bonana namo ḡauna, Iahi boubouna, Iehova ena.

⁷Hua ihahituna ena dina ihagwautana ai, umui na hebou helaḡana ta bavabia. Ba vaga, bona ḡaukara badana ta basio karaia. ⁸Una dina ai ḡole-oho, boubouna ba hahelaḡaia, bonana namo ḡauna Iehova ena: boromakau natuna maruanena ta; mamoe maruanena ta; bona mamoe natudia mamaruanedia hitu, laḡani tamona ḡaudia, asi bebefa-bebekadia. ⁹Edia flaoa bouboudia danu ba haḡole oho: flaoa namo-hereana efa ta ba karoaia, karoa gwauta. Karoa toi dehoru ida ba bulo, boromakau ida ba heni; bona karoa rua dehoru ida ba bulo, mamoe maruanena ida ba heni. ¹⁰Ma efa ta ba karoaia, karoa gwauta, bena karoa ta ta be dehoru ida ba bulo, mamoe natudia hituosi ta ta ida ba heni. ¹¹Nani maruanena ta danu ba hahelaḡaia, kara-dika iabi-ohona boubouna. Ini be heroheimaino boubouna ida bona ḡole-oho boubouna, dina iboudiai e heni louloumu ḡauna, mai ena flaoa boubouna bona edia inuinu bouboudia ida, ba heni hebou.

¹²Hua ihahituna ena dina ihagwauta-imana ai, umui na hebou helaḡanata bavabia. Ḡaukara badana ta basio karaia; dina hitu lalodiai aria ba karaia, Iehova ena. ¹³Emui ḡole-oho boubouna na lahi ai ba haḡolea oho, bonana namo ḡauna Iehova ena: boromakau natudia mamaruanedia gwauta-toi; mamoe mamaruanedia rua; bona mamoe

natudia mamaruanedia gwauta-hani, laḡani tamona ḡaudia, asi bebeka-bebekadia. ¹⁴Edia flaoa bouboudia ḡaudia danu ba haḡole oho: flaoa namo-hereana efa tauratoi bae karoadia, karoa gwauta gwauta amo. Bena karoa toi toi be boromakau gwauta-toiosi ta ta ida ba heni; karoa rua rua amo be mamoe mamaruanedia ruaosi ida ba heni; ¹⁵bona karoa ta ta be mamoe natudia gwauta-haniosi ta ta ida ba heni. ¹⁶Nani maruanena ta danu ba hahelaḡaia, kara-dika iabi-ohona boubouna. Ini iboudiai be dina kavakava ena ḡole-oho boubouna, mai ena flaoa boubouna bona ena inuinu boubouna ida, ba heni hebou.

¹⁷Aria dinana iharuana ai, emui boubou be boromakau natudia mamaruanedia gwauta-rua, mamoe mamaruanedia rua, bona mamoe natudiamamaruanedia gwauta-hani, laḡani tamona ḡaudia, asi bebeka-bebekadia. ¹⁸Flaoa bouboudia bona inuinu bouboudia danu ba heni, boromakau ta ta edia, mamoe mamaruanedia ta ta edia, bona mamoe natudia ta ta edia, taravatu heḡereḡerena. ¹⁹Nani maruanena ta danu ba hahelaḡaia kara-dika iabi-ohona boubouna. Ini iboudiai be dina kavakava ena ḡole-oho boubouna, mai ena flaoa boubouna bona edia inuinu bouboudia ida, ba heni hebou.

²⁰Dina ihatoina ai emui boubou be boromakau mamaruanedia gwauta-ta, mamoe mamaruanedia rua, bona mamoe natudia mamaruanedia gwauta-hani, laḡani tamona ḡaudia, asi bebeka-bebekadia. ²¹Flaoa bouboudia bona inuinu bouboudia danu ba heni, boromakau ta ta edia, mamoe mamaruanedia ta ta ta edia, bona mamoe natudia ta ta edia, taravatu heḡereḡerena. ²²Nani maruanena ta danu ba hahelaḡaia, kara-dika iabi-ohona boubouna. Ini iboudiai be dina kavakava ena ḡole-oho boubouna, mai ena flaoa boubouna bona ena inuinu boubouna ida ba heni hebou.

²³Dina ihahanina ai emui boubou be boromakau mamaruanedia gwauta, mamoe mamaruanedia rua, bona mamoe natudia mamaruanedia gwauta-hani, laḡani tamona ḡaudia, asi bebeka-bebekadia. ²⁴Flaoa bouboudia bona inuinu bouboudia danu ba heni, boromakau ta ta edia, mamoe mamaruanedia ta ta edia, bona mamoe natudia ta ta edia, taravatu heḡereḡeredia. ²⁵Nani maruanena ta danu ba hahelaḡaia, kara-dika iabi-ohona boubouna. Ini iboudiai be dina kavakava ena ḡole-oho boubouna, mai ena flaoa boubouna bona ena inuinu boubouna ida ba heni hebou.

²⁶Dina iha-imana ai emui boubou be boromakau mamaruanedia taurahani-ta, mamoe mamaruanedia rua, bona mamoe natudia mamaruanedia gwauta-hani, laḡani tamona ḡaudia, asi bebeka-bebekadia. ²⁷Flaoa bouboudia bona inuinu bouboudia danu ba heni, boromakau ta ta edia, mamoe mamaruanedia ta ta edia, bona mamoe natudia ta ta edia, taravatu heḡereḡerena. ²⁸Nani maruanena ta danu

ba hahelaḡaia, kara-dika iabi-ohona boubouna. Ini iboudiai be dina kavakava ena ḡole-oho boubouna, mai ena flaoa boubouna bona ena inuinu boubouna ida, ba heni hebou.

²⁹Dina ihatauratoina ai emui boubou be boromakau mamaruanedia taurahani, mamoe mamaruanedia rua, bona mamoe natudia mamaruanedia gwauta-hani, laḡani tamona ḡaudia, asi bebeka-bebekadia. ³⁰Flaoa bouboudia bona inuinu bouboudia danu ba heni, boromakau ta ta edia, mamoe mamaruanedia ta ta edia, bona mamoe natudia ta ta edia, taravatu heḡereḡerena. ³¹Nani maruanena ta danu ba hahelaḡaia, kara-dika iabi-ohona boubouna. Ini iboudiai be dina kavakava ena ḡole-oho boubouna, mai ena flaoa boubounabona ena inuinu bouboudia ida, ba heni hebou.

³²Dina ihahituna ai, emui boubou be boromakau mamaruanedia hitu, mamoe mamaruanedia rua, bona mamoe natudia mamaruanedia gwauta-hani, laḡani tamona ḡaudia, asi bebeka-bebekadia. ³³Flaoa bouboudia bona inuinu bouboudia danu ba heni, boromakau ta ta edia, mamoe mamaruanedia ta ta edia, bona mamoe natudia ta ta edia, taravatu heḡereḡerena. ³⁴Nani maruanena ta danu ba hahelaḡaia, kara-dika iabi-ohona boubouna. Ini iboudiai be dina kavakava ena ḡole-oho boubouna, mai ena flaoa boubouna bona ena inuinu boubouna ida, ba heni hebou.

³⁵Dina ihatauranina ai, umui na hebou helaḡana ta bavabia; una dina ai ḡaukara badana ta basio karaia. ³⁶Ḡole-oho boubouna ba haḡolea oho, bonana namo ḡauna, Iehova ena: boromakau maruanena ta, mamoe maruanena ta, bona mamoe natudia mamaruanedia hitu, laḡani tamona ḡaudia, asi bebeka-bebekadia. ³⁷Flaoa boubouna bona inuinu bouboudia danu baheni, boromakau; ena, bona mamoe maruanena ena, bona mamoe natudia ta ta edia, taravatu heḡereḡerena. ³⁸Nani maruanena ta danu ba hahelaḡaia, kara-dika iabi-ohona boubouna. Ini iboudiai be dina kavakava ena ḡole-ohoboubouna, mai ena flaoa boubouna bona ena inuinu boubouna ida, ba heni hebou.

³⁹Ini iboudiai na Iehova ba henia, emui aria dinadia ai, emui gwauhamata ḡaudia bona emui herahia ḡaudia ida. Emui ḡole-oho bouboudia bona emui flaoa bouboudia bona emui inuinu bouboudia bona emui herohe-maino bouboudia unu ba heni toma.

⁴⁰Bena Mose ese ini hereva iboudiai na Israel taudia e hamaorolaidia, Iehova ese ia e haḡania heḡereḡerena.

Gwauhamata

30 ¹Mose ese Israel iduhudia lohiadia e hereva henidia, eto, Iehova ena haheḡani binai; ²tau ta ese Iehova baine gwau henia hamata, eiava Iehova vairanai baine gwau hamata kara ta baine karaia, ia na basine koikoi; ena gwau hamata do baine hamomokania.

³Tamana ena ruma ai nohona ai, hane-ulato ta ese Iehova baine gwau henia hamata, bona Iehova vairanai baine gwau hamata kara ta baine karaia, ⁴bona tamana ese ena gwau hamata baine kamoni a hereva ta basine gwauraia, una hane-ulato ena gwau hamata baine gini. ⁵A ena gwau hamata baine kamoni negana ai tamana ese baine gwau tao, ena gwau hamata na asi anina: Iehova ese danu baine gwau tao, badina be hane-ulato tamana ese e gwau tao.

⁶Hane-ulato ese ena gwau hamata karana do basine haḡuḡurua negana ai baine headava, ⁷bona adavana ese ena gwau hamata sivaraina baine kamoni dinana ai hereva ta basine gwauraia, una hahine ena gwau hamata baine gini, anina do baine karaia. ⁸A baine kamoni dinana ai adavana ese baine gwau tao, ena gwau hamata na asi anina; Iehova ese danu baine gwau tao.

⁹Vabu ta, eiava diho hahinena ta, ena gwau hamata do baine gini, anina do baine karaia. ¹⁰Bema adavana dekenai e nohova ai na e gwau hamata, ¹¹bona adavana na e kamoni a hereva ta se gwauraia; gwauraia bona se gwau tao, ena gwau hamata do baine gini, anina baine karaia. ¹²A bema e kamoni dinana ai adavana ese e gwau tao, ena gwau hamata na basine gini: adavana ese vada e gwau tao; Iehova ese danu baine gwau tao. ¹³Hahine ena gwau hamata adavana ese baine hamomokania diba, eiava baine gwau tao diba. ¹⁴A dina haida baela, adavana ese hereva ta basine gwauraia, una be ena gwau hamata hamomokania karana; vada e hamomokania, badina be e kamoni dinana ai ia na se hereva. ¹⁵A baine kamoni murinai baine gwau tao, hahine ena kerere be ia ese baine huaia.

¹⁶Iehova ena haheḡani bunu, ia ese Mose e henia: tau mai adavana ida taravatudia, bona tau mai natuna kekenina ida taravatudia, kekeni na tamana ena ruma nohona ai.

Israel ese Midian e hadareredia

31 ¹Iehova ese Mose na e hereva henia, eto, ²Midian taudia ese Israel taudia vada e ala-ala henidia davana na bavala-ala henidia; una murinai tubu tama dekediai ba hahebou.

³Taunabunai Mose ese Israel taudia e hamaorodia, eto, Umui bogaragimui amo haida ese edia tuari ḡaudia bae abi heḡaeḡae, Midian taudia bae tuari henidia, edia kara davana Iehova ese vada e gwauraia do ba kara henidia. ⁴Israel iduhudia ta ta amo tuari taudia daha-ta daha-ta ba siaidia. ⁵Taunabunai Israel taudia loḡora edia amo iduhu ta ta edia daha-ta ta ta e siaidia: tuari taudia iboudiai be gerebu-ta daha-rua.^x

⁶Bona Mose ese e siaidia, bae tuari; iduhu ta ta amo daha-ta ta ta e siaidia. Hahelaḡa tauna Fineha Eleasara danu e siaia; ia ese gabu

^x 31.5 gerebu-ta rdaha-rua = 12,000.

helaḡana kohudia imana ai e abi kau, bona tuari kibidia danu. ⁷Bena idia ese Midian taudia e tuari henidia, Iehova ese Mose e haḡania heḡereḡerena; bena mamaruanedia iboudiai e aladia ore. ⁸Midian pavapavadia laimaosi danu e aladia mase: Evi bona Rekem bona Suru bona Huru bona Reba. Balaam Beoro danu dare amo e alaia mase. ⁹Midian hahinedia mai natudia ida Israel taudia ese e abidia mauri; edia boromakau iboudiai bona edia mamoe iboudiai bona edia kohu idoinai danu e abi. ¹⁰Edia hanua iboudiai bona edia taruha iboudiai e doudia ore; ¹¹bona e abi kohudia e laohai, bona ubu-ubu ḡaudia bona taunimanima danu e hakaudia lao. ¹²Bena abi-mauri taudia bona seri bona kohu na e laohaidia, Mose bona hahelaḡa tauna Eleasara dekediai, Israel taudia edia hebou ai e hahedinaraidia, edia taruha ai, Ieriko ai, Moab taorana ai, Ioridane sinavaina isena ai.

¹³Bena Mose bona hahelaḡa tauna Eleasara bona ore lohiadia na e raka lasi dekediai, taruha murimurinai idia ida e hedavari. ¹⁴Bena Mose ese tuari lohiadia, daha-ta ta ta biagudia bona sinahu ta ta biagudia, tuari amovada e lou mai, na e badu henidia; ¹⁵e gwau henidia, eto, Dahaka dainai hahine iboudiai o hamauridia? ¹⁶A laloa, idia ese Balaam ena hereva amo Israel taudia e hahekwakwanaidia, Peoro ororona ai, bena gorere ese Iehova ena ore taudia e hamasedia. ¹⁷Taunabunai, memero iboudiai bavaladia mase, bona hahine iboudiai danu; ¹⁸a kekeni bona ulato na ba hamauridia, bavabidia emui. ¹⁹Bena dina hitu taruha murimurinai ba noho, taunimanima o aladia mase eiava mase taudia ediai o dau kau taumui iboumui ai. Dina ihatoina ai bona dina ihahituna ai ba haheḡoeva, bona emui abi-mauri kekenidia bona ulatodia ba haḡoevadia. ²⁰Emui, dabua danu, bona kopi eiava nani huidia eiava au amo e kara taudia, iboudiai ba haḡoevadia.

²¹Bena hahelaḡa tauna Eleasara ese tuari ela taudia e hamaorodia, eto, Haheḡani binai, Iehova ese Mose vada e henia: ²²*gold* bona *silver* bona auri labora-labora bona auri bona *tin* bona *lead*, ²³lahi ai ba gabu diba ḡaudia, iboudiai na lahi ai ba gabudia, bena bae ḡoeva. A ranu helaḡa ai ba huridia danu; bona basio gabu diba ḡaudia danu ranu ai ba huridia. ²⁴Bena dina ihahituna ai emui dabua ba huridia, bena ba ḡoeva. Una murinai umui na taruha lalonai ba raka vareai.

²⁵Iehova ese Mose e hamaoroa, eto, ²⁶Tuari ai e abi ḡaudia, taunimanima bona ubu-ubu ḡaudia, ba hagaudia, oi bona hahelaḡa tauna Eleasara bonaorea lohiadia ese. ²⁷Bena ba haridia, ahu rua: ta be tuari ela taudia ahudia, a ta be kone-noho taudia ahudia. ²⁸Bena tuari ela taudia ahudia ai, sinahu ima ima amo ta ta ba hahelaḡadia Iehova ena, taunimanima bona boromakau bona doniki bona mamoe; ²⁹idia ahudia amo bavabidia, hahelaḡa tauna Eleasara ba henia, boubou ḡaudia ai baela, baine dudui isi Iehova vairanai. ³⁰A kone-noho taudia ahudia ai,

imahui imahui amo ta ta ba hahelaḡadia, taunimanima bona boromakau bona doniki bona mamoe; bona Levi taudia, Iehova ena dubu e reḡuamu taudia, ba henidia. ³¹Bena Eleasara bona Mose na unu e kara toma, Iehova ese Mose e haḡania heḡereḡerena.

³²Tuari taudia ese vada e abidia mauri ḡaudia bini: mamoe 675,000, ³³boromakau 72,000, ³⁴doniki 61,000, ³⁵bona taunimanima 32,000, iboudiai na kekeni bona ulato. ³⁶Tuari ela taudia ahudia bini: mamoe 337,500, ³⁷unu amo Iehova ahuna na 675; ³⁸boromakau 36,000, unu amo Iehova ahuna na 72; ³⁹doniki 30,500, unu amo Iehova ahuna na 61; ⁴⁰bona taunimanima 16,000, unu amo Iehova ahuna na 32. ⁴¹Mose ese Iehova ahuna e abia, boubou ḡauna hahelaḡa tauna Eleasara e henia, Iehova ese Mose e haḡania heḡereḡerena.

⁴²Kone-noho taudia ahudia, Mose ese tuari ela taudia ahudia amo ehididia ḡaudia, ⁴³na iniheto: mamoe 337,500, ⁴⁴boromakau 36,000, ⁴⁵doniki 30,500, ⁴⁶bona taunimanima 16,000. ⁴⁷Bena idia ahudia ai Mose ese imahui imahui amo ta ta e abidia, taunimanima bona ubu-ubu ḡaudia; bona ia ese Levi taudia, Iehova ena dubu e reḡuava taudia, e henidia, Iehova ese Mose e haḡania heḡereḡerena.

⁴⁸Bena tuari lohiadia, daha-ta ta ta biagudia bona sinahu ta ta biagudia, ese Mose e raka henia kahi, ⁴⁹eto, Emu hesiai taudia ese tuari taudia ai henimai ai vada e duahidia ore, ta se boio. ⁵⁰Bena herahia ḡaudia vada a mailaidia, Iehova ena, *gold* ḡaudia tuari ai e abi: ima vaḡivaḡidia bona bae vaḡivaḡidia bona kwakikwaki vaḡivaḡidia, bona gadei, bona ageva; emai herohe-maino ḡaudia Iehova vairanai. ⁵¹Bena Mose bona hahelaḡa tauna Eleasara ese hari *gold* ḡaudia idau-idau idia imadia amo e abidia. ⁵²Hari *gold* idoinai, daha-ta ta ta biagudia bona sinahu ta ta biagudia ese e mailaia, edia herahia ḡauna Iehova bae henia eto, ena metau be sekele 16,750.^γ ⁵³Badina be tuari taudia ta ta ese edia kohu vada e gogo una tuari ai. ⁵⁴Bena Mose bona hahelaḡa tauna Eleasara ese hari daha ta ta biagudia bona sinahu ta ta biagudia e heni *gold-na* e abia, hebou kalagana ai e vareailaia, Iehova vairanai Israel taudia ihelalolaidia ḡaudia a ai bainela totona.

Ruben bona Gad

32 ¹Ruben bona Gad garadia edia seri na momo herea; bona idia ese lasere tanona bona Gilead tanona e itadia, idia na tano namohereadia, seri iubulaidia. ²Taunabunai unu iduhu ruaosi taudia na Mose dekena ela, Mose bona hahelaḡa tauna Eleasara bona hebou biagudia e hereva henidia, eto, ³Ataroto bona Dibon bona lasere bona Nimra bona Hesebon bona Eleale bona Sebam bona Nebo bona Beon

^γ 31.52 Sekele 16,750 = 274 kilograms sisivana, ita eda hahetoho ai.

tanodia bini, ⁴Iehova ese Israel oreana tauda imada ai vada e heni, na seri iubulaidia tanodia namodia; bona ai bini emu hesiai taumai emai seri na momo herea. ⁵Idia ma eto, Oi lalomu bema namo emai ai, mani emu kara ina tano boma henimai, emai tano; basio hakaumai hanai, Ioridane sinavaina unukahana ai.

⁶A Mose ese Ruben bona Gad iduhudia taudia e gwau henidia, eto, Varavaramui ma bae ha tuari, a umui be iniseni ai ba helai diho a? ⁷Dahaka dainai Israel taudia lalodia ba hamanokadia, Iehova ese vada e henidia tanona ai basie raka vareai o tomu? ⁸Tamamui na unu e kara toma, lau ese Kade-baranea amo na siaidia tano bae hasinadoa negana ai. ⁹Idia na ela, Eskol kourana ai e lasi, tano e itaia, bena e lou, Israel taudia lalodia e hamanokadia, Iehova ese vada e henidia tanona ai basie raka vareai eto. ¹⁰Una dina ai Iehova ena badu e vara, bena e gwau hamata, eto ¹¹“Momokani, Israel taudia Aigupto amo vada e raka lasi, laḡani ruahui vada e hanai taudia iboudiai, ta ese lau vada na gwaurai hamata, Abraham bona Isaak bona Iakob baina henidia nato, tanona basine itaia, lasi vaitani, badina be idia na asie abidadama henigu; ¹²una dainai Kaleb lefune, Kenisi tauna, bona Iosua Nunu mo bae itaia, badina be idia raruosi mo Iehova vada e abidadama henia”. ¹³Una negana ai Iehova ese Israel taudia e badu henidia, e siaidia lao, laḡani hari-ahui tano ḡagaena ai e loaloava, ela bona Iehova vairanai e kara havara uruna idoinai vada e mase ore. ¹⁴Matona, umui na tamamui gabudia ai vada o vara isi, kara havara uruna ta, Iehova ena badu Israel latanai ihabadana. ¹⁵Badina be umui na ia iḡavana amo ba raka siri, ia ese idia ma baine siaidia tano ḡagaena ai ma bae noho; bena ina bese idoinai baine dika umui daimui ai.

¹⁶Bena idia na e raka henia kahi, eto, Iniseni ai maḡu baia kara, emai seri ikoulaidia, bona hanua baia hadai, natumai maraḡidia bae noholai. ¹⁷A tuari be baia tuari, Israel taudia vairadiai baiala, ela bona edia gabu ai baia hakaudia lao. Ḡau; au tamona, natumai maraḡidia be hanua mai maḡudia lalodiai bae noho, ina tano taudia daidiai. ¹⁸A ai be emai ruma basia lou heni ela bona Israel taudia iboudiai ahudia bae abi. ¹⁹Ai ahumai na idia ida Ioridane sinavaina unukahana ai eiava gabu ta ai basia abi, badina be ahumai na Ioridane sinavaina inikahana ai vada a abi, mairiveina kahana ai.

²⁰Bena Mose ese e haere henidia, eto, Ene boma kara toma: emui tuari ḡaudia bavabi, Iehova vairanai ba raka lasi, tuari baola. ²¹Emui tuari taudia iboudiai na Ioridane sinavaina bae hanaia, Iehova vairanai, ela bona ana inai taudia na vairadiai baine luludia lasi, ²²bona tano idoinai na Iehova ena tano ai bae halaoa. Una murinai vada ba lou mai, asi emui kerere Iehova vairanai bona Israel taudia vairadiai; bena ina tano bavabia emui, Iehova vairanai. ²³A ene basioma kara toma, umui na ba

kerere Iehova vairanai: emui kara dika davana do bavabia. ²⁴Benaini, hanua ba hadai, natumui maraġidia bae noholai; bona maġu ba kara, emui mamoe edia. Una murinaġ emui gwau hamata ba hamomokania.

²⁵Bena Gad bona Ruben iduhudia taudia ese Mose e haere henia, eto, Ai bini emu hesiai taumai na oi lohia taumu emu haheġani heġereġerena baia karaia. ²⁶Natumai maraġidia bona adavamai bona emai mamoe bona emai boromakau na iniseni ai bae noho, Gilead hanuadia ai; ²⁷a ai bini, emu hesiai taumai, na Iehova vairanai baia hanai, tuari mai dibamai taumai iboumai ai, baia tuari, oi lohia taumu emu haheġani heġereġerena.

²⁸Taunabunai, Mose ese idia herevadia na hahelaġa tauna Eleasara bona Iosua Nunu bona Israel iduhudia lohiadia e haġanilaidia; ²⁹eto, Bema Gad bona Ruben iduhudia taudia na umui ida Ioridane sinavaina bae hanaia, mai edia tuari ġaudia, Iehova vairanai, bena tano idoinai bavabia emui, umui ese Gilead tanona do ba henidia, edia tano. ³⁰A edia tuari ġaudia basie abidia, umui ida basie hanai, idia na umui ida ahumui bae abi Kanaan tanona ai.

³¹Bena Gad bona Ruben iduhudia taudia eto, Iehova ese emu hesiai taumai vada e haġanimai heġereġerena, unu baia kara toma. ³²Emai tuari ġaudia imamai ai baia abi, Iehova vairanai baia hanai, Kanaan tanona ai; bena ahumai ba henimai Ioridane sinavaina inikahana ai.

³³Taunabunai Mose ese Gad iduhuna bona Ruben iduhuna bona Manase Iosef ena iduhu kahana na Sihon, Amoro pavapavana, bona Og, Basan pavapavana, edia basileia e henidia, edia tano idoidiai bona edia hanua iboudiai. ³⁴Bena Gad iduhuna taudia ese ini hanua mai maġudia e hadai: Dibon bona Ataroto bona Aroere, ³⁵bona Atroto-sofan bona lasere bona logobeha, ³⁶bona Bete-nimra bona Bete-haran. Edia seri maġudia danue kara.

³⁷Ruben iduhuna taudia danu hanua mai maġudia e hadai: Hesebon bona Eleale bona Kiriataimi, ³⁸bona Nebo bona Baal-meono (ini ruaosi ladadiae ha-ida) bona Sibma. Idia e hadai hanuadia na ladadia idaudia e henidia.

³⁹A Makiri Manase ena iduhu taudia na Gilead tanona ela, bena e abia, Amoro taudia unuseni ai e nohova na e luludia lasi. ⁴⁰Bena Mose ese Gilead tanona na Makiri Manase e henia, ena noho gabuna. ⁴¹Bena Iairi Manase ela, Gilead hanuadia e abidia, ladadia e hato Havoto-iairi. ⁴²BonaNoba na ela, Kenat tanona mai ena hanua ida e abidia, ladana e hatoa Noba, ia e nemaia.

Israel taudia edia laolao

33 ¹Israel taudia edia laolao daladia bini. Mose bona Aaron ese ore a ta ta ai Aigupto amo e hakaudia lasi negana ai, ²Iehova ese

Mose e haḡania, bona Mose ese edia taruha sivaraidia bona edia tore-isi sivaraidiae tore. Edia tore-isi bona edia taruha herevadia bini: ³hua gini-gunana ena dina ihagwauta-imana ai, idia na Ramese amo e raka lasi; lagau-hanai murina dinana ai Israel taudia na Iehova ena siahui ai e raka lasi, Aigupto taudia iboudiai vairadi, ⁴Aigupto taudia ese natudia roboadia e guridia dinana ai. Badina be Iehova ese natudia roboadia vada e aladia mase, bona edia dirava danu vada e hahemaoro henidia.

⁵Taunabunai Israel taudia na Ramese amo ela, bona Sukoto ai e taruha. ⁶Sukoto amo e tore isi, ela, Etam ai e taruha, tano ḡagaena isena ai. ⁷Etam amo e tore isi, e lou ela, Pi-hahiroto ai e kau: una na Baal-sefon mairiveina kahana ai. Bena Migdol ai e taruha. ⁸Ma e laolao, Hahiroto badina amo ela, davara e rakaia hanai, tano ḡagaena ai e kau; bona dina toi idia na Etam tano-ḡagaena ai e laolao, Mara ai e taruha. ⁹Mara amoe tore isi, ela, Elim ai e kau. Una gabu ai ranu guridia na gwauta-rua, bona pamu audia na hitu-ahui. Bena unuseni ai e taruha. ¹⁰Elim amoe tore isi, ela, Davara Kakakakana isena ai e taruha; ¹¹unu amo ma ela, Sin tano-ḡagaena ai e taruha. ¹²Sin tano-ḡagaena amo e tore isi, ela, Dofka ai e taruha. ¹³Dofka amo e tore isi, ela, Alusu ai e taruha. ¹⁴Alusu amo e tore isi, ela, Refidim ai e taruha; unuseni ai inuinu ranuna ai e dabu. ¹⁵Refidim amo e tore isi, ela, Sinai tano-ḡagaena ai e taruha.

¹⁶Sinai tano-ḡagaena amo e tore isi, Kibroto-hatava ai e taruha. ¹⁷Kibroto-hatava amo e tore isi, ela, Haseroto ai e taruha. ¹⁸Haseroto amo e tore isi, ela, Ritma ai e taruha. ¹⁹Ritma amo e tore isi, ela, Rimon-perese ai e taruha. ²⁰Rimon-perese amo e tore isi, ela, Libna ai e taruha. ²¹Libna amo etore isi, ela, Risa ai e taruha. ²²Risa amo e tore isi, ela, Kehelata ai e taruha. ²³Khelata amo e tore isi, ela, Sefere ororona ai e taruha.

²⁴Sefere ororona amo e tore isi, ela, Harada ai e taruha. ²⁵Harada amo e tore isi, ela, Makeloto ai e taruha. ²⁶Makeloto amo e tore isi, ela, Tahata ai e taruha. ²⁷Tahata amo e tore isi, ela, Tera ai e taruha. ²⁸Tera amo e tore isi, ela, Mitka ai e taruha. ²⁹Mitka amo e tore isi, ela, Hasamona ai e taruha. ³⁰Hasamona amo e tore isi, ela, Moseroto ai e taruha. ³¹Moseroto amo e tore isi, ela, Bene-iakan ai e taruha. ³²Beneiakan amo e tore isi, ela, Horo-hagidigad ai e taruha. ³³Horo-hagidigad amo e tore isi, ela, Iotobata ai e taruha. ³⁴Iotobata amo e tore isi, ela, Abrona ai e taruha. ³⁵Abrona amo e tore isi, ela, Esiono-gebere ai e taruha. ³⁶Esiono-gebere amo e tore isi, ela, Sin tano-ḡagaena ai e taruha (ladanata be Kade). ³⁷Kade amo e tore isi, ela, Horo ororona ai e taruha, Edom tano hetoana ai.

³⁸Bena hahelaḡa tauna Aaron na ororo ai e dara dae, Iehova ena haheḡani dainai. Unuseni ai e mase, laḡani hari-ahui vada ela Israel taudia Aigupto tanona amo e raka Iasi murinai. Hua be hua iha-imana;

dina be dina ginigunana. ³⁹Aaron ena vara laḡanidia na sinahu-ta ruahui toi, Horo ororonaai e mase negana ai.

⁴⁰Israel taudia vada ema harina na Kanaan lohiana ta, Arada pavapavana, ese e kamona. Ia be diho kahana ai e nohova, Kanaan ai.

⁴¹Horo ororona amo e tore isi, ela, Salmona ai e taruha. ⁴²Salmona amo e tore isi, ela, Punon ai e taruha. ⁴³Punon amo e tore isi, ela, Oboto ai e taruha. ⁴⁴Oboto amo e tore isi, ela, Ie-abarim ai e taruha, Moab tanona ai. ⁴⁵Ie amo e tore isi, ela, Dibon-gad ai e taruha. ⁴⁶Dibon-gad amo e tore isi, ela, Almon-diblataim ai e taruha. ⁴⁷Almon diblataim amo e tore isi, ela, Abarim ororodia ai e taruha, Nebo vairanai. ⁴⁸Abarim ororodia amo e tore isi, ela, Ieriko ai e taruha, Ioridane sinavaina isena ai, Moab taorana ai. ⁴⁹Edia taruha na Ioridane sinavaina isena ai, Bet-iesimoto amo ela bona Abele-sitim, Moab taorana ai.

⁵⁰Bena Ieriko ai, Ioridane sinavaina isena ai, Moab taorana ai, Iehova ese Mose e hereva henia, eto, ⁵¹Israel taudia ba hamaorodia, baoto: Ioridane sinavaina ba hanaia, Kanaan tanona ai ba kau, negana ai, ⁵²una tano taudia iboudiai na vairamui ai ba luludia lasi; edia nadi helaḡadia iboudiai ba ḡiḡidia rohoroho, edia kaivakuku iboudiai ba doudia, edia atai gabudia helaḡadia iboudiai ba habuadia tari. ⁵³Tano bavabia emui, ba noholaia: badina be tano na vada na henimui, emui tano korikori. ⁵⁴Tano na mari amo ba haria, iduhu ta ta ahuna ahuna bae abi: iduhu badana be tano badana ba henia, iduhu maraḡina be tano maraḡina ba henia. Tau ta ese mari ai tano ta baine abia, una na iena tano. ⁵⁵A tano taudia iboudiai basiomu luludia lasi vairamui ai, bae noho taudia na ḡahu vairamui ai eiava ginigini kopimui ai na heheto bae hahekwarahimui, ba noholaia tanona ai. ⁵⁶Bena idia baina kara henidia nato karadia na umui baina kara henimui.

Kanaan tanona iharina

34 ¹Iehova ese Mose e hereva henia, eto, ²Israel taudia ba haḡanidia, baoto: Kanaan tanona na emui tano, ela bona ena hetoa iboudiai. Kanaan tanona ai ba kau negana ai, ³emui tano hetoana diho kahana ai na Sin tano-ḡaḡaena amo Edom hetoana ai bainela, ela bona Tadi (Gohuna mairiveina kahana. ⁴Unu amo Akrabim ororona diho kahana amo bainela, ela bona Sin. Unu amo ia na Kade-baranea diho kahana amo bainela, ela bona Hasara-adara, ela bona Asamon; ⁵Asamon amo bainela, ela bona Aigupto Dokana, ma unu amo kone ai baine lasi.

⁶Lahara kahana ai, emui hetoa na Davara Badana konena; emui tano hetoana bunai, lahara kahana ai.

⁷Mirigini kahana ai, emui hetoa na Davara Badana amo bainela, ela bona Horo ororona. ⁸Horo ororona amo bainela, Hamat kahana ai, ela bona Sedad. ⁹Unu amo ma bainela, Sifron kahana ai, ela bona Hasaranan. Mirigini kahana ai emui hetoa bunai.

¹⁰Mairiveina kahana ai, emui hetoa na Hasara-enan amo bainela, elabona Sefam; ¹¹bona Sefam amo bainela, ela bona Ribla, Ain mairiveina kahana ai; unu amo ma bainela, ela bona Kinerete Gohuna^z mairiveina kahana. ¹²Unu amo emui hetoa na Ioridane sinavaina, ela bona Tadi Gohuna. Ini hetoa lalodiai e miamu tanodia iboudiai na umui emui.

¹³Bena Mose ese Israel taudia e haġanidia, eto, Ina tano na emui tano; mari ai ba haria. Iehova vada e hereva, iduhu taurahani-ta bona iduhu ta kahana ese bae abia. ¹⁴Badina be Ruben iduhuna taudia bona Gad iduhuna taudia bona Manase iduhuna kahana taudia na edia tano vada e abia: iduhu lohiadia ta ta ese ahudia vada e abi. ¹⁵Hari iduhu ruaosi mai kahana ese ahudia vada e abi, Ieriko ai, Ioridane sinavaina mairiveina kahana ai, daba e reremu kahana ai.

¹⁶Iehova ese Mose ma e hamaoroa, eto, ¹⁷Tano iharina bae biagua taudia ladadia bini: Eleasara, hahelaġa tauna; bona Iosua Nunu; ¹⁸bona iduhu ta ta amo iduhu lohiadia ta ta bavabidia hidi, tano iharina bae biagua. ¹⁹Ladadia bini: Iuda iduhuna amo, Kaleb lefune; ²⁰Simeon iduhuna amo, Semuel Amihud; ²¹Beniamina iduhuna amo, Elidad Kislon; ²²Dan iduhuna amo, Buki Iogli, edia lohia ta; ²³Iosef garana amo, Haniel Efod, Manase iduhuna lohiana, ²⁴bona Kemuel Siftan, Efraim iduhuna lohiana; ²⁵Sebulun iduhuna amo, Elisafan Paranaka, edia lohia ta; ²⁶Isakara iduhuna amo, Paltiel Asan, edia lohia ta; ²⁷Asere iduhuna amo, Ahihud Selomi, edia lohia ta; ²⁸Napatali iduhuna amo Pedahela Amihud, edia lohia ta. ²⁹Tataudia bunu, Iehova ese e haġanidia, tano bae haria, Israel taudia ahudia bae henidia, Kanaan tanona ai.

Levi taudia edia hanua

35 ¹Ieriko ai, Ioridane sinavaina isena ai, Moab taorana ai, Iehova ese Mose ma e hereva henia, eto, ²Israel taudia ba haġanidia, bae abia tanona lalonai Levi taudia na hanua bae henidia, mai hetabira tanodia ida. ³Hanua be bae noholaidia, bona hetabira tanodia ai edia boromakau bona edia mamoe bona edia ubu-ubu ġaudia idau-idau bae reġudia. ⁴Hari hetabira tanodia Levi taudia ba henidia na hanua maġuna amo baela, ela bona kiubit daha-ta,^a hanua kahadia iboudiai. ⁵Hanua murimurina ai ba hahetohoa, mairiveina kahana ai kiubit daha-rua,^b diho kahana ai kiubit daha-rua, lahara kahana ai kiubit daha-rua, bona mirigini kahana ai kiubit daha-rua;hanua be bogaraginai. Tano unubadana bae abia, edia ubu-ubu ġaudia na una tano ai bae reġudia. ⁶Levi taudia ba henidia hanuadia tauratoi be roho-mauri hanuadia

^z 34.11 Kinerete Gohuna: ina na Galilea gohuna ladana ta. ^a 35.4 Kiubit daha-ta = Roha sinahu-toi imahui sisivana. ^b 35.5 Kiubit daha-rua = Roha sinahu-hitu sisivana.

bae gwaurai, ala-ala tauna naediai baine heau kau, bena baine mauri; bona ma hanua hari-ahui rua danuba henidia. ⁷Levi taudia ba henidia hanuadia bae hari-ahui taurahani; iboudiai na mai hetabira tanodia. ⁸Ini hanua na Israel taudia ahudia amo ba henidia: iduhu badadia amo momo bavabi; iduhu maraġidia amo gadoi mo bavabi. Iduhu ta ta ese ahudia amo Levi taudia ahudia bae henidia.

Roho-mauri Hanuadia

⁹Iehova ese Mose ma e hereva henia, eto, ¹⁰Israel taudia ba hamaorodia, baoto: Ioridane sinaavaina ba hanaia, Kanaan tanona ai ba kau, negana ai, ¹¹hanua haida bavabidia hidi, emui roho-mauri hanuadia. Bena taunimanima ta baine hapadidia tauna na unu baine heau lao. ¹²Unu hanua lalodiai mase tauna varavarana ese basine alamui diba; hahepadidi tauna na basie alaia ela bona hebou ese baine hahemaoro henia. ¹³Levi taudia ba henidia hanuadia tauratoi be emui roho-mauri hanuadia ai ba halaodia: ¹⁴hanuatoi Ioridane sinavaina inikahana ai, bona hanua toi Kanaan tanona ai, ba henidia, roho-mauri hanuadia ai baela. ¹⁵Unu hanua tauratoi na rohomauri hanuadia ai baela, Israel taumui emui, bona idau taudia bogaragimui ai e noho hedoamu taudia edia: taunimanima ta baine hapadidia tauna na unu hanua baine heau lao.

¹⁶A tau ta ese bamona na auri amo baine botaiā mase, ia na roroma tauna: vada bae alaia mase. ¹⁷Eiava nadi imana ai baine abia, bamona baine tutulaia, bena baine mase, ia na roroma tauna: vada bae alaia mase. ¹⁸Eiava au ta imana ai baine abia, bamona baine botaiā mase, ia na roroma tauna: vada bae alaia mase. ¹⁹Mase tauna varavarana ese roroma tauna baine davarā negana ai, ia ese baine alaia mase. ²⁰Bamona na badu ai e gwadaia mase tauna, eiava bamona ialana e bani henia tauna, ²¹eiava bamona na imana amo e tutua mase mai baduna ida tauna, una tau bae alaia mase. Ia na roroma tauna: mase tauna varavarana ese baine davarā negana ai, ia ese baine alaia mase.

²²A tau ta, asi ena badu, ese bamona bema gwadaia, eiava bema hodoa, ²³eiava nadi amo bema tutua mase, bena bamona bema mase, a ia be bamona se inai henia bona iala-masena se ura, ²⁴hebou ese una hahepadidi tauna bona mase tauna varavarana baine hahemaoro henidia, ini taravatu heġereġeredia. ²⁵Hebou taudia ese hahepadidi tauna na mase tauna varavarana imana amo bae hamauria, ena roho-mauri hanuana, e heau henia hanuana, lalonai bae hakaua vareai. Unuseni ai baine noho, ela bona hahelaġa tauna badana, dehorō helaġana amo e horoa tauna, baine mase negana ai. ²⁶A nega ta hahepadidi tauna ese ena roho-mauri hanuana, e heau henia hanuana, baine rakatania, ²⁷benā mase tauna varavarana ese una roho-mauri hanuana murimurinai baine

davaria, bena mase tauna varavarana ese hahepadidi tauna baine alaia mase, ia na asi ena kerere una rara dainai. ²⁸Badina be hahepadidi tauna na ena roho-mauri hanuana ai baine noho ela bona hahelağa taunabadana baine mase; a hahelağa tauna badana baine mase murinai hahepadidi tauna na ena tano korikori baine lou henia diba.

²⁹Uru iboudiai bona emui noho gabudia iboudiai lalodai ini taravatu bona ini haheğani ba badinadia. ³⁰Tau ta ese taunimanima ta baine alaia mase, roroma tauna na bae alaia mase, dibadia taudia edia hahebade herevadia daidiai; a tau tamona ena hereva dainai basie alaia mase. ³¹Roroma tauna ena mauri ibodohilaina monina eiava kohuna na basio abia: vada baine mase. ³²Bona roho-mauri hanuana ai vada e heau kau tauna ena mauri ibodohilaina monina eiava kohuna, hahelağa tauna badana maurina ai ena tano korikori baine lou henia helaoreana, na basio abia. ³³Taunabunai, ba noholaiia tanona basio hamiroa; badina be rara ese tano e hamiroamu, bona tano ihağoevana na asi dala idauna ta, rara e habubua tauna rarana mo ese baine hağoevaia diba. ³⁴Umui o noholaiamu tanona basio hamiroa, badina be lau danu na noholaiamu; badina be lau Iehova na Israel taudia bogaragidiai na nohomu.

Headava herevadia

36 ¹Gilead Makiri, Manase tubuna, ena orea amo ruma biagudia na Mose dekena ela. Idia na Iosef iduhuna taudia. Idia ese Mose e hereva henia, Israel iduhu lohiadia bona ruma biagudia vairadiai, ²eto, Iehova ese oi, emai lohia, vada e hağanimu, tano na mari amo ba haria, Israel taudia ahudia ba henidia; bona vada e hağanimu danu ai varavaramai Selofehad ahuna na natuna hahinedia ba henidia. ³Gau tamona, idia na idau iduhu taudia ese bema adavadia, ahudia na ai senemai ahudia amo bae heabi oho, adavadia edia iduhu ahudia ai bae heato kau; bena ai emai ai bae boio. ⁴Ela bona Israel tauda eda Iubile lağanina baine kau, bena idia ahudia na adavadia edia iduhu ahudia ai bae heato kau vaitani; bona senemai ahudia ediai bae boio vaitani.

⁵Bena Mose ese Israel taudia na Iehova ena hereva e hağanilaidia, eto, Iosef garana edia hereva na maoro. ⁶Iehova ena haheğani Selofehad natuna ulatodia daidiai na iniheto: e ura henidiamu taudia bae adavadia, a tamadia ena iduhu taudia mo. ⁷Unuhetomana iduhu ta ese iduhu ta ahuna basine abihaia Israel ai; a Israel taudia ta ta ese tamadia ahudia bae abidia tarika-tarika. ⁸Bona ulato ta bema mai ahuna Israel iduhuna ta lalonai, ia ese tamana ena iduhu tauna ta baine adavaia; unu amo Israel taudia ta ta ese tamadia ahudia bae abidia tarika-tarika. ⁹Taunabunai, iduhu ta ese iduhuta ahuna basine abihaia; a Israel iduhudia ta ta ese ahudia bae abi tarika-tarika.

¹⁰Bena Selofehad natuna ulatodia ese Iehova ena haheğani e badinaia. ¹¹Selofehad natuna ulatodia, Mahala bona Tirisa bona Hogla bona Milka

bona Noa, ese tamadia varavaradia na e adavadia. ¹²Manase Iosef ena iduhu ai e headava, bena ahudia na tamadia ena iduhu ai e miava.

¹³Haheḡani bona taravatu bunu, Iehova ese Mose e henia, bena Mose ese Israel taudia e henidia, Ieriko ai, Ioridane sinavaina isena ai, Moab taorana ai.